

Elkahn

Elkahn ni jolo re bo mehl go Horeb

¹ Alum nya a nya Mosis bungu no tong anebe Isreel kpee go elka emahng, go ejang ero mfam bi Jodan, ji jolo go edamme ji Araba. Edi jio jolo wane a Suf, go elka elka ni Paran abola Tofel, Laban, Hajaroti a Dijahab.

² Nne l'sehng mbang nyi egburu ewong ji Sia, bahke koko nne ewubu efung abehng re á mehl go Horeb song rehng go Kadesi Benia.

³ Eji ma kang nnya atahl abal, go ngbokambang efung bi ewuba nnyahng amehng, owo Mosis kehm tiingi anebe Isreel nsol kpee nyi Jehova ka-e elkahn bada bo.

⁴ Ngare nyia yeb sehng Sihon ji jolo ntul no anebe Amor go ebta, ye ji kuumu etul go Hesbon. Go Edreyi, á tob sehng Og ji jolo ntul no anebe Besan go ebta, ye ji kuumu etul go Astaroti.

⁵ Go ero mfam bio bi Jodan wo Mosis bomo ellenge atahm nyaa ka bo, go ndi nyi anebe Moab re:

⁶ Jehova ji li Esowo ebahre bungu tong-r go Horeb re, <<Wahn ebkang go ewong jia afung gbalee.

⁷ Mehlen wahn soro asi asongo, song yel go ndi nyi anebe Amor, a ajahbe nya li kohlo bo kpee: go edamme ji Araba, go ejahbe ewong, a nya li go ejang ndi erikindi bi eboblum mfam, wahn song yel go ndi nyi anebe Kenan kpee, a

awong Lebanon tete song rehng go agburu aya ma Yufriti.

⁸ Nyehnene, m ma-n ka ndi nyia. Song yelen, wahn ko ndi nyio, nyi Jehova tiri re á bahke kake babnso ewahne, - Ebrahim, Aesik abola Jakob - a abon abon ebo ba bo bahke jele.>>

Mosis Yehke Atubesi Go Et'tohngo Et'tohngo

⁹ Mosisi tongo anebe Isreel ngare nyio re, <<M ma-m lub sehng re me n sol-n ana elsol antahng.

¹⁰ Jehova Esowo ebahne ma-n lim wahn ebrur, wahngka lela n kp'ruru ana alonlo nya li go elbung.

¹¹ Nong Jehova, Esowo bio bi babnso ewahne kpe-n lim wahn nyab go nkpel atahltahl nkpel ebal atahl awubu, fere fuul-n, ana á nyame no!

¹² Wo me, m bahke limi renan kehm ma sol atongtong enyahne, a elsol enahne, fere jo toobo afaabe kpee nya m kp'bele antahng?

¹³ Yehken akahnkahn ane, ba kpi ngbere, bao ba kpi ekpunu, go et'tohngo ajehng ajehng ejahne. M bahke bo kunu ana atubesi ebahne.>>

¹⁴ N faang-m re, <<Ejum ji a ma tir re wo lim, kp'nobo.

¹⁵ Owo n kehm yehke atubesi ane go egahne at'tohngo, akahnkahn ane bao ba kpi ekpunu, fere kunu bo re bo jo fil-n, ana atubesi ane atahltahl nkpel ebal atahl awubu, a ba ane atahl alon, a ba ane atahl abal ane awubu, atubesi ane awubu, ana atubesi ba at'tohngo.

¹⁶ Owo n kehm rehke abalamalam ebahne re, <<Jo wuken atongtong nya ma gbo abonane ebahne, wahn jo lam go nseenga nseenge. Jol afi

elam jio jolo a nnea Isreel a nnea Isreel noko, afi jol a nne a Isreel a nne ajahmjahm, no lene anahne.

¹⁷ Kana lam elam njahm anyehng. Wuk ntooro nyi mmonse, jangjang ana a bahke wuku ntooro nyi nnenkul. Kana jo fahl nnene, tibre Esowo bi kpi elam akimi. Elam ji l'fere gbal sehng-n, ko-n ba ka-m wahn, m bahke toobo ka-n.

¹⁸ Ngare nyio, n tong-n ejum ajehng ajehng ji jolo re wahn jo lim.

Mosis tumu ane re bo song weele feede ndi nyio

¹⁹ Owo e kehm mehle go Horeb asongo go ndi awong, ana Jehova Esowo ebahre ka-r elkahn. E sehng go emenngo nkpaange edi erikendi nyi li wum wum nyio nyi rí ma nyehn tete li ba rehng go Kadesi Benia.

²⁰ Owo n kehm bungu tong-n re, <<Wahn ebrehng edi awong ji anebe Amor, ji Jehova Esowo ebahre kp-r kake.

²¹ Nyehnen! Jehova Esowo ebahne ma-n ka ndi nyia. Songen, wahn song ko, ana Jehova, Esowo bi babnso ewahne tong-n no. Kana fahl, jol eko ki-n tan.

²² Owo wahn ane kpee rí ba no ba kpir-m, kehm bungu re, "Nong wahr tumen ane, bo gbo mbang song feede ndi nyio, bo l'feere ba, bo bahk-r tongo bada ajahbe nya e bahke yele, a abang nya e bahke sehng rehng o.

²³ Go egame, ntoobo nyio n'nob. Owo n kehm yehke ewubu ane na abal, go egahne ellong.

24 Bo kehm tahme, jo wahr asongo go ndi awong. Bo kehm song rehng go edamme ji Esikol, jo yannge jo feede.

25 Bo ko akab nti nyandiki nya lohng ndi nyio ba ka-r, kehm bungu ntoorannyo re, <<Ndi nyi Jehova Esowo ebahre kp-r kake, etingi ndi nyi.>>

Etahnsi ji anebe Isreel Esamahr bi Jehova

26 Wo wahn joom kor re wahn wahr ewong tahn o, n yiimi ekungu, tahne esi go elkahn ni Jehova Esowo ebahne.

27 N jo memme go egahna nkpatahk, fere jo bung re, "Wahr ebtehn Jehova sehng, ji ji wahnge á yehk-r go Ijib, re á ba yak-r kak anebe Amor go abo, eji bo l'wul-r.

28 Anv, gan wo e bahke kehm jeke? Abonanee ebahre eblim re eko tan-r go elfahle. Bo bungu re, <Ane bao kp'tahne, bo li akolo ane sehng-r, ajahbe ebo kp'gbale, akahme ebo sahb w'wahre. Egom ebo jindiki lohng et'tohngo ji Anak, bo li alabe labe ane fere j'jok.' "

29 Owo n kehm bungu tong-n re, <<Ki-n men-nge, jol kana fahl bo.

30 Jehova Esowo ebahne, ye ji ma-n gbo mbang asongo bahke noko ka-n, ana á limi no go Ijib, wahnfono ny'nyehn go amahr,

31 a go ndi erikendi nyi li wum wum. Ona n ny'nyehn ana Jehova Esowo ebahne rod-n no, ana nde nne kpo rod mmon ewe go mbang eljen enahne kpee tete n ba rehng edi jia.>>

32 Jol eji jolo jol ano, n tikem bum Jehova Esowo ebahne go etingitingi,

³³ ye ji jo gbo-n mbang asongo go egahne eljen, á jo ka-n agun ngare atv, fere jo jen anahne go ekparesemsem ngara njul. Á jo sebe adi ka-n nya ń bahke reke ekv, fere jo tib-n mbang nyi ń bahke sehng.

³⁴ Eji Jehova wuku ji ń bungu no, eltim rake sehng, á kehm nyame fere sahb t'tir re,

³⁵ <<Nne awohng awohng limm no wob go eying ab'bi ane baa, no bahke nyehne nnooba ndi nyi n tiri no re m bahke kake babnso ewahne ba nkul a nkul,

³⁶ sehngem Keleb wo, ji mmona Jefune. Á bahke nyehne ndi nyio, m bahk-e kake ndi nyio nyi á kadde akpade, fere tob ka et'tohngo ji abon ebe, tibre á toono Jehova a eltim eltim ene kpee.>>

³⁷ Tib go egahne esi, Jehova tob rake atahng a name, fere bung re, <<Wo fvfo, a nehm tob yel.

³⁸ Sehngem Josua mmon no Nun, ye ji li nkakebo ewa, ye wo bahke yele. Kak-e eltim, tibre ye wo bahke jene anebe Isreel rehng go edi elehkelkv.

³⁹ Abonse ba ń tongo re bo bahke bobo bo go ebta, abon ebahne ba kala kahn ebi, afi kahn eno, bo ba bahke yele ndi nyio. M bahke bo ka, bo bahke koko fere jol nyi bo.

⁴⁰ Wo wahn, senngen njahm, wahn feere asongo go ndi erikendi nyi li wum wum, mbang mbang nyi aya nkpafa.>>

⁴¹ Owo ń kehm-m faange re, <<Wahr eblim abiafem bada Jehova, e bahke tahme song nok ebta, ana Jehova Esowo ebahre ka-r elkahn. Ano

wo nne awohng awohng ewahne rodo nsol ebta gbade, tib n jo tiri re bahke jolo nkpoodo ejum ka-n re wahn wahr ewong tahm go ndi awong.

⁴² Wo Jehova bungu tong-m re, <<Tong bo re, <Kana tahm ebta, tibre n nehm jol anahne. Anebekv ebahne bahk-n sehng ebta.

⁴³ Ano wo n tong-n no, wo m me-e wuungem atung. N yiimi ekungu a elkahn ni Jehova ka no, fere mehl egahne agabbe tahm ebta, asongo go ndi awong.

⁴⁴ Owo anebe Amor ba lene o ajahbe awong nyao kehm lohngo ba bom ebta enahne. Bo kam-n ana ekon kpo kam ane, fere wul-n tuubu, bomo mbang mbang nyi Siya song rehng go Horma.

⁴⁵ N feere ba, jo ba ling go esamahr bi Jehova, jol Jehova bumem na ntir go egahne eling, á bulu na atung enye.

⁴⁶ Ano wo n kange o Kadesi afung gbalee, ana n ko ngare jol o.

2

Anebe Isreel jo yannge elka emahng

¹ Owo e kehm-n senngge, fere kunu asongo, mbang mbang nyi aya nkpafa, ana Jehova tong-m no. E ko afung gbalee jo jen senngge ndi awong nyi Sia.

² Owo Jehova kehm bungu tong-m re,

³ "Ebko afung tvv nya n kehme eljene senngge ndi awong nyia. Anv senngen feere go ejang ebobkal.

⁴ Ka ane baa elkahn nia re, <Anv , n yahke sehng go ndi nyi abonane ebahne, et'tohngo ji

Eso, Bo ji lene go Sia. Bo bahk-n jo f'fahl, wo wahn fvfo, sahb kunen kunu ekpu.

⁵ Kana lim re bo nok ebta anahne. Tibre me wahn nehm ka ndi a bo anyehng anyehng; jol morohko no nne bahke ma kadde ekpade, wahn nehm ka. Me n ka Eso ndi awong nyi Sia, re jol ka-e.

⁶ M bahke kpiki bo asilva go nsol alehke nyi m bahke lehke, a alahb ma m bahke woko.

⁷ Jehova Esowo ebahne ma-n fuulu go ntum abo enyahne kpee. Á ma-n baabe go eljen enahne sehng go nkpaange ndi erikendi nyi li wum wum. Go nnya atahl abal nyia, Jehova, Esowo ebahne ebjol anahne, jol ejumjum wahn rinem.

⁸ Ano wo e soro asi asongo, song sehng abonane ebahre, et'tohngo ji Eso bo ji lene go Sia. E gbake mbang nyi li ndi nyi li rede rede nyi Araba sa, nyi lohngo go Elati a Ejyon Geber, fere jo toono mbang ndi erikendi nyi li wum wum nyi Moab.

⁹ Owo Jehova kehm bungu tong-m re, <<Kana lim ntong a anebe Moab, jol kana lim re bo nok ebta anahne. Tibre me wahn nehm ka ejang ndi ebo ajehng ajehng. Me n ka mfam nyi Ar, re jol ejum elehkelkv ebo.>>

¹⁰ Anebe Emim jo lene o, bo ji jolo go nrur, fere t'tahne. Bo jolo akola ane ana anebe Anak.

¹¹ Ana anebe Anak, bo fvfo bo jo ko bo ana anebe Refati, wo anebe Moab jo lungu bo re anebe Emim.

¹² Anebe Hor jo tob lene go Siya, wo et'tohngo ji Eso k'kam bo yehke. Bo tane anebe Hor, fere

lene go ebo edi, ana anebe Isreel tob lim go ndi
nyi Jehova ka bo re jol nyi bo.

¹³ Owo Jehova kehm bungu tong-r re, <<Mehlen
wahn siiri edamme ji Jered.>> Ano wo e tahme
song siiri edamme jio.

¹⁴ Bomo ngare nyi e mehle go Kadesi Benia tete
e ba siiri Edamme ji Jered, ebsehng ehtahl a nnya
elku a nnya era. Ngare nyio, eying anebe ebta
anoko kohrokhro ebkpo mal go egahre ellong,
ana Jehova tiri tong bo.

¹⁵ Ebo bi Jehova noko a bo, tete 'a tane bo
egahre ellong kpee.

¹⁶ Eji erik abanoko ebta bao ba woomo egahre
ellong ma gohro kpo,

¹⁷ Jehova kehm bungu tong-m re,

¹⁸ <<Lela rí bahke sehng go Ar, go ejang ndi
nyi Moab.

¹⁹ Ní l'ba goji anebe Amon, kana lim mfem a bo,
jol kana lim re bo nok ebta anahne. Tibre me
wahn nehm ka ejang ndi ajehng ajehng ji anebe
Amon re jol j'jahne. Me n ka et'tohngo ji Loti, re
jol ji bo.

²⁰ Ndi nyio fvfo, bo jo tob ko ana ndi nyi anebe
Refa, bo ji jo lene o. Wo anebe Amon jo lungu bo
re anebe Jamjum.

²¹ Bo jolo go nrur ane, fere t'tahne. Bo jolo
akola ane ana anebe Anak. Jehova ranng bo
go esamahr bi anebe Amon. Anebe Amon kehm
kame bo yehke fere ba lene go ebo a ndi.

²² Jehova tob limi ano ka abon et'tohngo Eso,
bo ji lene go Siya, eji á ranng anebe Hor go ebo

esamahr. Bo kame bo yehke, fere song lene go ndi anebe Hor tete sik lela.

²³ Ana anebe Av ba no ba lene go abon ajahbe tete song rehng go Gaja, anebe Kabtor ba lohngo go Kabtor, ba ranng bo, fere lene go ebo a ndi.

Isreel Sehng Sihon Ji Ntula Hesbon go Ebta

²⁴ <<Jehova tob bungu>> re, <Mehlen anv, wahn song siiri edamme ji Arnon. Me n jabbe Sihon ji nnea Amon, ye ji li ntul no Hesbon kak-n go ebo, a ejahbe eje. Bom elkoko ndi enye, wo fere bohk-e ebta.

²⁵ Lela lela, m bahke nehke ajahbe kpee nya li go njini, fere kak bo elfahle ena. Bo bahke wuku eka bade anahne fere jo k'kahm, a egburu elfahle tib go ejahne esi.

²⁶ N sa go ndi erikendi nyi li wum wum nyi Kedemoti tiingi etib tv Sihon ji jolo ntul no Hesbon a alum elkoono, fere tong-e re,

²⁷ <<Nong wahr sehng go ega ejahbe. E bahke jo sehng mbang mbang, jol e nehm gahl yange ejang ebobkal afi ejang eboblum.

²⁸ Gung-r nsol alehke a alahb go ekun bi asilva, lub yak-r wahr jen akpade sehng.

²⁹ Ana abon ba Eso, bo ji lene go Siya, a anebe Moab ba lene go Ar limi no, tete n siiri aya Jodan song yel ndi nyi Jehova Esowo ebahre kp-r kake.>>

³⁰ Wo Sihon ji ntula Hesbon taamem re wahr sehng. Tibre Jehova Esowo ebahne limi re á bel etahnsi go etohko, fere bel etahneltim, eji á l'yak-e kak-n go egahne abo, ana á ma lim anv.

³¹ Jehova kehm bungu tong-m re, <<Nyehe! Me n bom elyake Sihon, a ejahbe eje ka-n. Bom-n bo esehngebta, wahn fere ko ndi enye.>>

³² Eji Sihon a nsoja enye kpee lohngo no ba elnoko anahre go Jahaji,

³³ Jehova Esowo ebahre, yak-e ka-r, ano wo e wul-e no, a abon ebe, a nsoja enye kpee.

³⁴ Ngare nyio e ko agburu ajahbe enye kpee, fere ranngge kpee, aneblum, anebkal a abonse. Jol e yakem nne awohng awohng, a jol go elkpin.

³⁵ Sehngem re atohkondi nya e da ka elnahre, a nsol nyi e da go agburu ajahbe nya e noko ebta ko.

³⁶ Bomo gona Arowe ji li go nkpe edamme ji Anon, a a egburu ejahbe ji li o edamme, tete rehng go Giled, egburu ejahbe anyehng anyehng jolem ji akahme enye wahre sehng-r, Jehova Esowo ebahre yake kpee kak-r go ebo.

³⁷ Toono ana Jehova Esowo ebahre ka-r elkahn re, Kana yel go ndi anyehng anyehng nyi anebe Amon, jol go ndi nyi li nkpe nkpe aya ma Jabok, afi ajahbe nya li sennge ajahbe awong.

3

Anebe Isreel Ga Og Ntula Besan

¹ Owo e kehm feere sennge asongo jo wahr mbang mbang asongo go Basan, fvfo Og ntula Basan kehm lohngo abake a nsoja enye kpee, re á ba nok ebta anahre go Edireyi.

² Jehova kehm bungu tong-m re, <<Kana ye fahl, tibre m m-e yake kak-n go abo, a nsoja enye

kpee a ndi a ndi enye. Limen ye ana n limi Sihon ji ntul anebe Amor, ye ji jo fili edi go Hesibon.>>

³ Ano wo Jehova Esowo ebahre tob yake Og ntula Basan kak-r ebo a nsoja enye kpee. E wulu bo ane kpee, jol nnene saam.

⁴ Ngare nyio, e ko ajahbe enye kpee. Egburu mfam anyehng anyehng saam, go ellong ejahbe atahlara nyao, nya jolo kpee go ejang erohko ndi nyi Arigob, go nji etul nyi Og go Basan, ji wahr kii ko.

⁵ Agburu ajahbe nyaa kpee bo si awahre wahre akahme sennge kak, fere kak atimbu nya bo jo ko alahmlahm akuungu bam. E tob ko abon ajahbe bako gbalee ba bo kii si akahme sennge, jol nfange wobem.

⁶ E ranngge bo kpee, ana e limi Og ji ntula Hesibon. E ranngge egburu ejahbe ajehng ajehng, wul aneblum a anebkal, abonse abonse.

⁷ Wo atohkondi kpee, a nsol nyi bo da go ebta go agburu ajahbe ebo, e ko fere jol nya nyahre.

⁸ Ano wo ngare nyio e ko ndi nyi li feere go ero mfam nyi aya Jodan, bomo go edamme Arnon tete rehng go egburu ewong ji Hermon go abo nya atul abal bao ba Amor.

⁹ (Anebe Sidon kpo lung Hermon re Sirion, anebe Amor kpo lung re Seni)

¹⁰ E ko ajahbe kpee nya li go ndi ebale bale, go ero ewong, a Giled kpee, go Basan kpee tete rehng go Saleka a Edireyi, nya jolo ajahbe nya nji etul nyi Og go Basan.

¹¹ (Og ji ntula Basan ntahngtahng wo sa, go ellong ane ba bo jo lung bo re Refa. Elko hl nkvn ene bo ko akuungu lim, labe sehngge ewubu efiti

ebra, fere kpange sehng efiti ebrakebra. Jia tiki kpe li go Raba ji anebe Amon.

Ndi Abake Go ero mfam nyi aya ma Jodan

¹² Bada ndi nyi e ko no ngare nyio, n ka anebe Ruben a anebe Gad ndi nyi bomo go ejang ebobkal mfam bi Aroye, go nkpe nyi Edamme ji Arnon, a ejang ndi nyi ndi awong nyi Gilead, nyi m bake jangjang go edi ebbal, a abon ejahbe ebo kpee.

¹³ Ejang Giled jehko a Basan kpee, ji jolo ejahbe Og, n ka ejang et'tohngo ji Manase. (Erohko ndi nyio nyi Basan kpee bo jo lungu re ndi nyi anebe Refa.

¹⁴ Jayir ji lohngo et'tohngo ji Manase wo ko ndi nyi Arigob kpee nyi li Basan, tete rehng go nseenge nyi anebe Gesu, a anebe Maaka. Bo rodo ndi nyio gung-e ebehn, ji ji wahnge tete sik lela bo kpo lung re abona ajahbe ba Jayir.)

¹⁵ Giled, n ka Makir.

¹⁶ Wo anebe Ruben a anebe Gad, n ka bo ejang ndi ji bomo go Giled rehng go edamme ji Arnon. Nseenga bo jolo elka elka ni edamme jio, sehng ano song rehng go aya ma Jabok ma li nseenge nyi anebe Amon.

¹⁷ Nseenge nyi erede mfam jolo go Jodan gona edamme ji Araba, bomo go Kenereti rehng go agburu aya ma Araba (Aya Elkv) nkpe ewong ji Pisiga ji li ero mfam.

¹⁸ Ngare nyio n ka-n elkahn re, <<Jehova Esowo ebahne ma-n ka ndi nyia re jol ny'nyahne. Wo alahmlahm aneblum ebahne kpee bahke gboko

anebe Isreel mbang, a nsol ebta ebo, song siiri Jodan.

¹⁹ Limi limi kan, akal ebahne a abon ebahne, go atohkondi enyahne <<n kp'kahne re n kpi atohkondi gbalee>> bo bahke ma sa go ajahbe nya m ma-n ka.

²⁰ M bahke tahme a abonane abahne, tete Jehova tob ka anebe Isreel ebahne bako erekek, ana á ma-n ka, bo fvfo tob ko ndi nyi Jehova Esowo ebahne ma ka bo go egbuk Jodan jehko. Jia l'jol ano, owo nne awohng awohng ewahne bahke ma feere go ndi enye nyi n ka-e no.

Esowo taamem re Mosis siiri aya Jodan

²¹ Ngare nyio n ka Josua elkahn re, <<Wobko amahr enya nyehn nsol kpee nyi Jehova Esowo eba ma lim atul abal baa. Ejum j'nehm ji Jehova bahke limi ajahbe etul kpee nya n kp'siiri song yel.

²² Kahna fahl bo, Jehova Esowo ebahne antahng, ye wo bahke noko ka-n."

²³ Ngare nyio n gboongo Jehova re,

²⁴ <<Jehova ji gbale sehng, wobbom na eltibi nlokeltum ewa agbal enya a egburu nsahm enya. Anv, Esowo abii li go elbung afi go ndi, bi bahke ma lim ntum ana nyia, a agburu nsol nya wo kpo lim?

²⁵ Titi, nong me n lub siiri song nyehn nnooba ndi nyio, go egbuk ji Jodan, nnooba ndi awong nyio, a Lebanon.>>

²⁶ Wo tib esi ejahne, Jehova rake atahng a name, jol á m-e wuung-m atung. Jehova faang-

m na re <<Jio ebgbal.>> Ka kpe tiki bung aname bade ejum jia.

²⁷ Wahr, wo song go ero ewong ji Pisiga, wo keebe seenge go erede mfam, a ejang ebobkal, tob seenge ejang eboblum a ero mfam. Ko amahr enya wo seenge ndi nyio, tibre a nehm siiri Jodan jia.

²⁸ Wo ka Josua nsahm, fere kak-e eltim, ka-e atahne. Tibre ye wo bahke koko ane baa song siiri aya ma Jodan, fere lim re bo ko ndi nyio nyi wo bahke nyehne.

²⁹ Ano wo e jol-n o edamme kohlo Beti Peor.

4

Mosis ka elkahn re Isreel kpunu Esowo

¹ Owo Mosisi kehm bungu tong ane bao re, <<Wuken anv, ajehke a atahm nya n yahk-n tib. Jo toonen atahm nyao, eji n l'kpin, fere song ko ndi nyio nyi Jehova, Esowo bi babnso ewahne kp-n kake.>>

² Kana budu ejumjum go nkahn nyi n kp-n kake, jol kana yehke. Bumen nkahn nyi n kp-n kake, nyi Jehova Esowo ebahne.

³ Wahn ebko amahr enyahne nyehn ji Jehova limi no go ewong ji Por. Jehova Esowo ebahne rannges ane kpee go egahne ellong, bo ji tahme no toono esowo bi baal go ewong ji Por,

⁴ wo wahn kpee, wahn jio ji yiimi t'tahne a Jehova Esowo ebahne, n li go elkpín lela.

⁵ Nyehnen, m ma-n tib atahm a eltibi ana Jehova Esowo ebame ka-m elkahn, eji n l'jo toono

atahm nyao, go ndi nyi n kp'yele re wahn song ko jol nyi nyahne.

⁶ Jo kunen ekpu wahn jo bum atahm. Tibre ano wo ajahbe nyako bahke nyehne ngbere a ekahnafem ejahne; bo bahke wuku bade ajehke nyaa kpee, fere jo bung re, <<Etingitingi, egburu ejahbe jia, bo li akahnkahn ane ba kpi ngbere.>>

⁷ Ejahbe ajii kpeka li go, ji gbale ana, bo ji asowo ebo li badbad a bo ana Jehova Esowo ebahre li a nahre ngare anyehng anyehng nyi e kake ero kae?

⁸ Ejahbe ajii kpeka li go, ji gbale ana, ji kpi atingi atahm a eltibi ana nya n kp'koko ba ka-n lela.

⁹ Lub jo kunen na ekpu, wahn fere jo sahb b'baabe elnahne, eji n l'k'yini nsol nyi amahr enyahne ma nyehn, afi jol l'ki-n lohng go eltim ana n li go elkpin. Jo tiben abon ebahne nsol nyia, a abon abon ebahne ba bahke toono bo.

¹⁰ Buumen efung bi n yiimi esamahr bi Jehova Esowo ebahne go egburu ewong ji Horeb, eji á bungu tong-m re, <<Lung ane kono edi ajehng go egame esamahr, eji n l'wuk alum enyame, eji bo l'kahn ana bo bahke jo ka-m egburu kpinu ngare kpe kpe nyi bo li elkpin go ndi nyia, fere tob jo tib abon ebo.

¹¹ M baa, ba yiimi go mbangenahb ewong jio, ngare nyio agun jo lulu ewong tete rehng go elbung, nnyakenyake ekparesemsem tob jolo o, a nlum ejanng.

¹² Owo Jehova kehm sake o ellul agun nio bung anahne. Wahn wuku ewahl alum alum, jol nnene n nyehnem, sehngem ellum ni ni n wuku no.

¹³ Á lennge nwongo enye ka-n, nkahn na ewubu nyio, nya á jehke ka-n re wahn jo toono, nya á fere nyon go ekpake taale na abal.

¹⁴ Ngare nyio Jehova tong-m re me n tib-n atahm a eltibi ni m bahke jo toono go ndi nyio nyi n kp'siiri Jodan song ko.

Jehova rehke re bo k'jo jom eblom

¹⁵ N nyehnem elfoongo ni ejum ajehng ajehng efung bio bi Jehova jo bung anahne gona ellula agun go Horeb. Fvfo, jo kunen elnahne ekpu n'nob,

¹⁶ eji n l'k'ranng elnahne fere lim elom ka elnahne, elkohn elok elom ji kpi elfoongo anehng anehng, ji li go elfoongo ni nnenlum, afi elfoongo ni nnenkal,

¹⁷ afi ji li ana ejum ajehng ajehng ji kp'jene go ndi, afi ana ebruk bi kp'fonngo go elbung,

¹⁸ jol k'jol ana ejum ajehng ajehng ji kpo tohng ala go ndi, afi ana nsahre anyehng anyehng nyi wob go atahng alahb.

¹⁹ N l'kpiidi amahr enyahne seenge go elbung, fere nyehn nsol nyio nyi li go elbung, ana njul a ebareka, afi alonlo, ka bel elgaare go ega eltim re wo gong ka bo fere jo kak nsol nyio nyi Jehova Esowo ebahne ma bak ka ajahbe kpee nya li go nla elbung.

²⁰ Wo wahn, Jehova ba ko-n, fere yehk-n go agun nyao nya kpo nyane akuungu, á yehk-n go Ijib re wahn jol ejum elehkelkv eje, ana n li no lela.

²¹ Jehova eltim rak-e tob-m tib go egahne esi, á sahb t'tir re me n nehm siiri Jodan fere yel go

nnooba ndi nyio nyi Jehova Esowo ebahne kp-n kake ana ejum elehkelkv.

²² Me m bahke kpoko go ndi nyia; n nehm siiri Jodan; Wo anv, wahn yahke siiri song ko nnooba ndi nyio.

²³ Jo kunen ekpu, wahn k'yini egbanngalung ji Jehova Esowo ebahne ji á limi a nahne. Kana rahm elokelom ka elnahne go elfoongo ni ejum ajehng ajehng ji Jehova Esowo ebahne ma ten.

²⁴ Tibre Jehova Esowo ebahne, ye agun nya kpo lul fere ffi nya, á li Esowo bi kpo kpu elkahre.

²⁵ Ngare nyi m ma bel abon, a abon abon ebahne, eji m ma lene ndi nyio ekidi ma lab, n l'fere rannge, fere jo rahm elkohn elokelom ajehng ajehng fere jo lim ab'bi go esamahr bi Jehova Esowo ebahne eji eltim l'rak-e,

²⁶ me n lung elbung a ndi re bo yiimi ntianse bada anahne lela re, n bahke gulu elkpoko tan go ndi nyi n kp'siiri Jodan re wahn song ko, ngare nehm lab nyi m bahke lene o, bo bahk-n lohko wul.

²⁷ Jehova bahk-n yaame kak go ellong ajahbe nyako, sehngem abon amohk ane abik abik ba bahke sake, ba bahke jolo go elkpín go ajahbe nya Jehova bahk-n kame kak.

²⁸ Ona, m bahke jo kak asowo nya ane ko nti a atal rahm, nyao nya l'k'ma nyehn, fere wuk, afi fere li nsol, jol bo nehm ma wuk es'svv.

²⁹ Wo n l'fere seb Jehova Esowo ebahne go ajahbe nyao nya n li no, m bahk-e nyehne, n l'sebe a ntim a ntim enahne kpee a atohko atohko enyahne kpee.

³⁰ Ngare nyi ń li go akanya, eji nsol nyia kpee ma gbo tub-n, owo behnjehle go, ń bahke feere goji Jehova Esowo ebahne fere jo wuk-e.

³¹ Tibre Jehova Esowo ebahne li Esowo bi ane kpo fil-e ndon. Á wahn nehm ten, á wahn nehm wul, jol a nehm yini enyam bi á nyame no tong babnso ewahne, ji á ko nwongo lim re yiimi.

Jehova Esowo Bi

³² Bahben anv, bade afung nya mahne mahne nya jolo no ngare enyahne kehm rehng, bomo go afung nya Esowo limi nne bum go ndi nyia. Bahben go ejang njini ajehng tete rehng ajehko. Egburu ejum ana jia ebj'jola? Afi ane ebw'wuk ejum ana jiaa?

³³ Ejahbe ajehng ajehng go ebw'wuk ellum ni Esowo kp'bungu a bo go ellul agun ana wahn ma wuk, fere jol go elkpina?

³⁴ Anv esowo abehng abehng ebg'gaare re á yehke ejahbe go atahng ejahbe jehko ka elne a elgare ni a jo ko wuungu bo, a nliingi, a akpokosi nsol, a nta, a egburu eko eje a nsahma? Afi esowo bio ebl'lim ano a atahntahn amenng nsol nya a limi no, ana nsol kpee nyi Jehova Esowo ebahne limi no ka-n go Ijib go egahne Esamahr?

³⁵ Jehova tib-n nsol nyia, eji ń l'kahn re Jehova Esowo bi. A l'sehng ye sa, Esowo abehng abehng kpeem li.

³⁶ Á sa go elbung jo lim-n re wahn wuk alum enye, eji á l'gonen. Ga ndi, a tib-n agburu agun enye, ń fere wuk alum enye nya jo bung go atahng agun.

³⁷ Tibre babnso ewahne ba nkul jo kor-e kor, jiji wahnge á yehke et'tohngo abon ebo, fere ko Elwo ene a egburu eko eje, yehk-n go Ijib,

³⁸ re á gbo-n mbang song kam ajahbe nya kp'gbale fere t'tahne sehng-n, fere ko-n ba kak go ebo a ndi, eji á l'ka-n ana ejum elehkelkv ana li no lela.

³⁹ Jo liingen ye, wahn fere ko kak egahna ntim lela re, Jehova wo li Esowo gona ero elbung, a atahng ndi. Esowo abehng abehng go kpeem li.

⁴⁰ Jo bumen atahm enye, a nkahn enye, nya n kp-n kake lela, eji l'nob anahne, a abon ebahne ba bahke jini toon-n, eji á bel nlaabe elkpin go ndi nyi Jehova Esowo ebahne kp-n kake re jol enyahne nkahl nkahl.

Ajahbe nya bo jo be biiri

⁴¹ Owo Mosis kehm yabe ejahbe era bum eje eje, nya jolo go ero mfam bi Jodan,

⁴² nyao nya nne awohng awohng no ma wul nne, bahke ma be song yel, l'fere jol re á wulu nnebjing ewe go efin, jol bo limm na go ekv wuku wuku. Á bahke ma be yel mfam ejahbe anyehng, go ajahbe nyaa a, tahre elne.

⁴³ Agburu ajahbe nyao nya a: Bejer ji li go ndi ebalebale nyi ero ewong, jolo ka anebe Ruben; Ramoti ji li go Giled, jolo ka anebe Gad; a Golan ji jolo go Basan, jolo ka anebe Manase.

Mosis bomo ellennge Atahm ka ane

⁴⁴ Ntahm nyia nyi Mosis lennge ka anebe Isreel.

⁴⁵ A wo li nkahn, atahm a eltibi ni Mosis ka bo, eji bo lohngo go Ijib asongo,

⁴⁶ eji bo jolo go edamme kohlo Beti Peor ero mfam nyi Jodan, go ndi nyi Sihon ji jolo ntul no anebe Amor. Ye wo jo fili Hesibon, ye ji Mosis a anebe Isreel ga-e no go ebta, eji bo lohngo go Ijib asongo.

⁴⁷ Bo song ko ndi enye, a nyi Og ji jolo ntul no Basan, bo ane abal abal jolo atul anebe Amor go ero mfam nyi Jodan.

⁴⁸ Ndi nyia bomo go Aroye, go nkahl nyio nyi edamme ji Arnon, song rehng go egburu ewong ji Siriyon (ji li Hebron.)

⁴⁹ Tob budu ndi nyi Araba kpee go ero mfam nyi Jodan tete rehng go aya akang go edamme ji Pisiga.

5

Ntahm na Ewubu

¹ Owo Mosis kehm kuku anebe Isreel kpee, kehm bungu tong bo re, <<Anebe Isreel, wuken atahm a eltibi ni n kp'bungu re wahn wuk lela. Kpilen, wahn fere jo kunu ekpu jo toono.

² Jehova Esowo ebahre limi egbanngalung anahre go ewong Horeb.

³ Babnso ewahre sang Jehova limi egbanngalung jia a bo, á limi anahre, á limi a wahr ane kpee ba li go elkpín a lela.

⁴ Yefono Jehova wo ba bung anahne, sehng go ellulagun go ewong.

⁵ Ngare nyio n yiimi elka elka ni Jehova a wahn jo lennge alum nya Jehova ka-n, tibre n jo fahle agun nyao, n wahrem je go ewong. Jehova bungu re,

⁶ <Me wo li Jehova Esowo ebahne bi yehk-n go Ijib, go ndi nyi n jolo aju.

⁷ Kana bel asowo nyako buda name.

⁸ Kana lim elok elom ka elnahne, ji li go elfoongo ni ejum ajehng ajehng go elbung, afi go ndi, afi go alahb ma li go ndi.

⁹ N nehm gong ka bo, jol n nehm gong kak bo. Tibre me, Jehova Esowo ebahne, n li Esowo bi kpo kpu elkahr. N kpo kak abon erem go abiafem nya babnde ebo rehng go eying ebra, a eying ebni bio bi ane ba n kil jo kor bo.

¹⁰ Wo n kpo tib ane bao ba n kpo kor bo elkoro, bo ji kpo bum nkahn enyame rehng eying atahltahl nkpele ebal atahl awubu.

¹¹ Kana rod mbing nyi Jehova Esowo ebahne daange, tibre Jehova nehm ka nne awohng awohng eno, no kpo rod mbing enye daange.

¹² Jo bumen efung Erekekv, wahn fere jo bum saang, ana Jehova Esowo ebahne ma-n ka elkahn.

¹³ Nfung erakera nyi n bahke koko jo lim ntum enyahne kpee.

¹⁴ wo efung bi biingi nfung esehma bahke jolo efung erekekv ka Jehova Esowo ebahne. Efung bio, a nehm lim eltum anehng anehng - Wofono afi mmon ewa no nlum, afi no nkal, afi nlokeltum ewa no nlum afi no nkal, jol nluma mfong enya, jol afi mbvankang, afi nnyam anyehng anyehng enya, afi njenne nyi ma ba lene tob-n go egahne ejahbe. Eji nlokeltum ewa no nlum a no nkal, bo l'tob re ekv ana wahn.

¹⁵ Buumen re wahn jolo aju go Ijib, re Jehova Esowo ebahne wo tanne etahntahn ebo ebe yehk-

n o. Fvfo Jehova Esowo ebahne ma-n ka elkahn re wahn jo bum Efung Erekekv.

¹⁶ Jo kpunen babnso abola babnne, ana Jehova Esowo ebahne ma-n ka elkahn, eji l'nob anahne, n fere bel nlaabe elkpín go ndi nyi Jehova Esowo ebahne kp-n kake.

¹⁷ Kana wul nne.

¹⁸ Kana lim erehbe.

¹⁹ Kana v ejv.

²⁰ Kana yiimi ntianse efahnge bade nnebjing ewahne.

²¹ Kana baare nkala nnebjing ewahne amahr. Kana yehke ntir atahng enyahne kunu go etahk nnebjing ewahne, afi ndi enye, afi nlokeltum ewe no nlum, afi no nkal, afi mfong enye, afi mbvankang enye, afi jol ejum ajehng ajehng ji nnebjing ewa.

²² Nkahn nyi a, nyi Jehova jo bung wahre wahre ka ellong ane ebahre kpee go agun nya jo lul go ewong jio, ekparesemsem jolo o, a nlum ejanngé, jol a kpeem bung ejum budu. Owo á kehm nyono go ekpake taale ebbal, faake ka-m.

²³ Eji n wuku ellum nio ni lohngo go nlum ejanngé, eji agun jo lul go ewong jio, atubesi ane kpee ba at'tohngo enyahne, a anebkul ebahne lohngo ba kpir-m.

²⁴ N kehm bungu re, <<Jehova Esowo ebahre ma-r tib ellub ene, a agbal enye, wahr ebwuk ellum ene ni jo bung go agun. Lela wahr ebnyehn re nne bahke ma kpin, jol afi Esowo bungu a ne.

²⁵ Wo anv, jenji wahnge wahr bahke kpoko? Agburu agun nyaa, bahk-r fehke, e bahke kpoko e l'fere kpe wuk ellum ni Jehova Esowo ebahre.

²⁶ Nne awoo no li go elkpín, no ma w'wuk ellum ni Esowo bi li go elkpín kp'bungu go agun ana wahr ma wuk a, fere kpe jol go elkpín?

²⁷ Wo jeere kabbe, wo wuungu atung ejum ajehng ajehng ji Jehova Esowo ebahre bahke bungu. Wo ba tong-r ajehng ajehng ji Jehova Esowo ebahre tong-a no. Wahr bahk-a wuungu atung, fere lim.>>

²⁸ Jehova wuk-n wuk eji ń bungu aname, owo Jehova kehm bungu tong-m re, <<Me n wuk ji ane baa ma bung tong-a. Ejum ajehng ajehng ji bo bungu no, bo bungu nseenge.

²⁹ Eye, li re ntim ebo bahke lub sennge feere go egame bo jo fahl-m, fere jo bum nkahn enyame ngare anyehng anyehng, eji l'nob abo, a abon ebo go njinanjini!

³⁰ <<Song, wo song tong bo re bo feere song go eboa nkpatahk.

³¹ Wo, wo bahke jolo aname a, eji n l'ka-a nkahn kpee a ajehke, a atahm nya a bahke tibi bo re bo jo toono go ndi nyi n kp'kake bo re bo ko, fere jol nyi bo.

³² Belen ekunukpu wahn jo lim ji Jehova Esowo ebahne ma-n ka elkahn; kana sennge feere go ejang eboblum afi ejang ebobkal.

³³ Jo jenen a ekpunu go nsol kpee nyi Jehova Esowo ebahne ma-n ka elkahn, eji ń l'jol go elkpín, bahke tob nob anahne, afung enyahne bahke labe go ndi nyi ń fi song ko, fere jol ny'nyahne.

Jehova Esowo ebahne Jo Kor-n

¹ <<A wo li nkahn, atahm a eltibi, nya Jehova Esowo ebahne tong-m re me n tib-n wahn jo bum, go ndi nyi n kp'siiri Jodan song ko,

² eji wahn a abon ebahne, a abon ebo, ba bahke toono bo, bahke fahle Jehova Esowo ebahne, ngare kpee nyi n bahke jolo go elkpín, fere jo bum ajehke enye kpee a nkahn nyi n kp-n kake, eji n l'bel nlaabe elkpín.

³ Wuken, wahn anebe Isreel, wahn fere jo kunu ekpu jo kpunu, eji l'nob anahne, eji n l'sahb ny'nyab go ndi nyia nyi alahbbel kp'fabe a akehng ekon ana Jehova Esowo bi babnso ewahne nyame tong-n.

⁴ Isreel wukeno! Jehova Esowo ebahre, ye antahngtahng wo li Jehova.

⁵ Nong Jehova Esowo ebahne jo kor-n, a ntim a ntim enyahne kpee, a atohko atohko enyahne kpee, a atahne atahne enyahne kpee.

⁶ Nong nkahn nyia, nyi n kp-n kake lela, woom-n go egahna ntim.

⁷ Kaken alum nyao go ntim nyi abon ebahne. Jo bungen bade o ngare nyi n jehk go etahk, a ngare nyi n kp'jene go alab mbang, ngare nyi n ma noongo, go ngare nyi n ma nyahme.

⁸ Kahnen go egahne abo, a abuk enyahne ana ejum elbuumu.

⁹ Nyonen go ntimbu nyi ntahk enyahne, a ntimbuga enyahne.

¹⁰ Ngare nyi Jehova Esowo ebahne l'ko-n ba kak go ndi nyi á tiri tong babnso ewahne, Ebrahim, Aesik, a Jakob re á bahk-n kake ndi ny'nehm o,

ndi nyi kpi agburu ajahbe nya ane kp'ruru , nya wahn kii si,

¹¹ ntahk nyi elkohn anoobo nsol anyehng anyehng li no, nya wahn ki kak, mbing elahb nyi wahn ki rahm, ebgbe bio bi agreb a oliv, nya wahn kii bahm. Ngare nyio nyi rí ma li fere w'wohngo,

¹² jo kunen ekpu, eji n l'k'yini Jehova, ye ji yehk-n no lohng go ndi nyi Ijib, go ndi nyi rí woomo eju.

¹³ Jo fahlen Jehova Esowo ebahne, jo loken ye ntahngtahng, wahn jo ko nwongo go egea mbing.

¹⁴ Kana toono asowo nyako, asowo nya ajahbe nya li senng-n kak,

¹⁵ tibre Jehova Esowo ebahne, ye ji li go egahne ellong, a li Esowo bi kpo kpu elkahr, erakatahng eje bahke jo fi-n ana agun, á bahk-n wulu tane.

¹⁶ Kana wuungu Jehova Esowo ebahne, ana n limi no go Masa.

¹⁷ Jo sahb kahnen kahn re n kp'bumu nkahn kpee nyi Jehova, a atahm, go nle nyi á ma-n ka.

¹⁸ Jo limen jio ji li go nseeenge, fere n'nob go esamahr bi Jehova eji l'nob anahne, n fere song ko nnooba ndi nyi Jehova nyame no, go nwongo tong babnso ewahne,

¹⁹ fere kam anebekv ebahne kpee yehke go egahne esamahr ana Jehova bungu no.

²⁰ Behnjehle go, mmon ewa l'bahb-a re, <<Anv ajahng nyaa, a nle, atahm a ntibi nyia nyi Jehova Esowo ebahre ka elkahn, lohngo renan?>>

²¹ Tong-e re, <<Wahr jolo aju nya Fero go Ijib, wo Jehova ko etahntahn ebo ba yehk-r go Ijib.

²² Go egahre esamahr Jehova tumu amennge akpokosi nsol tv anebe Ijib, tv Fero a ane ebe kpee.

²³ Wo á yehk-r, lohng anahre o, ko-r ba ka ndi nyi á nyame no, ko nwongo a babnssoo ewahre ba nkula nkul.

²⁴ Jehova ka-r elkahn re wahr jo kpunu atahm enye kpee, fere jo fahl Jehova Esowo ebahre, eji l'tiki jo nob anahre, e fere kpin, ana li no lela.

²⁵ E l'fere bel ekunukpu jo kpunu atahm kpee go esamahr bi Jehova Esowo ebahre, ana á ma-r ka elkahn, jio bahke jolo eno ejahre.>>

7

"M bahke kame ajahbe nyako yehke

¹ <<Ngare nyi Jehova Esowo ebahne bahk-n koko ba go ndi nyi n kp'yele re wahn song ko, ngare nyi a ma kam ajahbe gbalee yehke go egahne esamahr, ajahbe nya anebe Hiti, anebe Girga, anebe Amor, anebe Kenan, anebe Pereji, a anebe Hiv, go anebe Jebusi, ajahbe na ebsehma bi kp'kpange fere tahne sehng-n.

² Ngare nyi Jehova Esowo ebahne ma yake bo kak-n go ebo, n fere ga bo, rn bahke ranngge bo kpee, kana ko nwongo anyehng anyehng a bo, jol bo ki-n fili ndon anyehng anyehng.

³ Kana ko atem atem go mbal. Kana tang abon ebahne ba nkal ka bo, jol kana baange abon ebo ba nkal ka abon ebahne.

⁴ Tibre bo bahke sennge abon ebahne eltim tv go, re bo ki-m kpe toono. Bo bahke fere jo loko

asowo nyako. Erakatahng ji Jehova bahk gulu elgboko tub-n, á fere wul-n.

⁵ Ji m bahke bo lim ji a, waan agudu njom ebo, wahn fere wa atal eblom ebo, gbakken ago Asera ebo, wahn fere jamme alokelom ebo fi.

⁶ Tibre wahn li ane ba li saang ka Jehova Esowo ebahne. Jehova Esowo ebahne ma-n yehke go ellong anebe ejahbe kpee ba li njini re wahn jol ane ebe, ana etingi ejum ji nne kpi no, ji á kpo yehke ntir enye kunu.

⁷ Jehova yehkem ntir atahng enye kun-n fere yehk-n tibre wahn ba ga rur sehng ajahbe nyako, tibre wahn ba ga jol mobsak sehng ajahbe nyako kpee.

⁸ Wo jia jolo ano tibre n koro Jehova, á fere seb re á bum nwongo nyi á ko tir tong babnsoo ewahne ba nkul. Owo wahng á yehk-n no a etahntahn ebo, fere fak-n yehke go ndi nyi n woomo eju, fere tob yehk-n go nsahm nyi Fero ji ntul no Ijib.

⁹ Kahnen fvfo re Jehova Esowo ebahne, Esowo bi. Á li nkakesehk Esowo bi kpo bum egban-ngalung ji elgoro tete rehng eying atahltahl nkpel ebal atahl awubu ji ane bao ba ye kpo kor bo, bo fere jo bum nkahn enye.

¹⁰ Wo ane bao ba á kpo sab bo, á bahke tuuru bo go ebo esamahr eji á bahke ranng bo, jol á nehm laange ebranng ane bao ba ye kpo sab bo.

¹¹ Fvfo kunen ekpu, wahn jo toono nkahn, atahm a ntibi nya n kp-n kake lela.

¹² N l'jo kunu ekpu go atahm nyaa, fere jo toono go nseenga nseenge, owo Jehova Esowo ebahne

bahke bumu egbanngalung eje ji elkoro a nahne, ana a tiri tong babnso ewahne ba nkul.

¹³ *Í* bahk-e jo kor, á fere fuul-n, fere lim-n *ń* jol go nrur. *Á* bahk-n fuulu ka njel, a mbahmandi, nkohl enyahne, a amahm emahne ma mfemfe, a akehng ma oliv, abon efong ba lohng go ellong efong ebahne, a abon ejoro a ebul baange ba lohng go ellong enyam ebahne, go ndi nyi *á* nyame tong babnso ewahne re *á* bahk-n kake.

¹⁴ *Á* bahk-n fuulu sehng ane bako kpee. Aneblum afi anebkal nehm gbo egum, jol etohkondi ejahne ajehng ajehng nehm jol ji l'k'bel abon.

¹⁵ Jehova bahk-n yehke go eyam abehng abehng. *Á* wahn nehm tub amenng e ayam nya *ń* wuku go Ijib, á bahke tuubu ane kpee bao ba wahn kpo sab bo ayam.

¹⁶ *Í* bahke tiki wul ane kpee ba ajahbe nyaa Jehova Esowo ebahne yake kak-n ebo. Jol kana be bo ndon, kana loko asowo ebo tibre jia bahke jolo ana ekpoko ka-n.

¹⁷ *Í* bahke ma bung tong elnahne re, <<Ajahbe nyaa kp'tahne sehng-r. E bahke limi renan kehm kame bo yehke?

¹⁸ Wo kana jo fahl bo. Jo buum-n nobnob ji Jehova Esowo ebahne limi Fero a anebe Ijib kpee.

¹⁹ *Í* ny'nyehn go egahne amahr, agburu arem, a nliingi a akpokosi, go egburu eko a nsahm nyi Jehova Esowo ebahne tanne no, bi *á* ko no yehk-n. Jehova Esowo ebahne bahke tob lim ano a ajahbe nya *ń* kpi bo fahl.

²⁰ Budu o, Jehova Esowo ebahne bahke tumu

egburu ntong sehng go anyam nyame nya bo kpo lung re Horner tv bo go ellong, tete jol erik ebo ji bahke beke biiri, bahke gohro kpo tan.

²¹ Nong bo ki-n nehke, tibre Jehova Esowo ebahne bi wob-n go ellong, á li egburu emenngé Esowo.

²² Jehova Esowo ebahne bahk-n gboko mbang jo kam ajahbe nyao ebrik ebrik. Á nehm taame re wahn wul na wul bo nkpel nkpel anyehng tane, l'jol ano enyamkulugbe bahke nyabe go egahne ellong.

²³ Jehova Esowo ebahne bahke yake bo kak-n go ebo, á bahke kake bo egburu abilamahr go ebo ellong, tete bo ranngé mal.

²⁴ Á bahke yake atul ebo kak-n go egahne ebo. M' bahk fvdv abing ebo go njini ana nne fvdv ejum ji bo nyono no. Nnene nehm ma yiimi abohng anahne. M' bahke bo wul.

²⁵ M' bahke jamme alokelom asowo ebo fi. Kana baare amahr go asilva a agul nya bo ko liibi bo, jol kana rod na bum elnahne. Tohko jol ano, bahk-n bobo ana ekpoko, tibre li asabsab nsol ka Jehova Esowo ebahne.

²⁶ Kana ko ejum ji kpo sab Esowo ba go egahna ntahk. Tohko jol ano, wofono antahng bo bahk-a tob yab tv go ejang elranngé, ana ejum j'nehm. Ko ana ejum eltehb, nong sahb sab-a sab, tibre bobyab bum go nkpe re bo ranngé.

8

Kana Yini Jehova

¹ <<Jo kunen ekpu wahn jo toono nkahn kpee nyi n̄ kp-n kake lela, eji n̄ l'kpin, fere ny'nyab, eji n̄ l'yel ko ndi nyi Jehova ko nwongo nyam tong bahnsō ewahne ba nkul.

² Buumen ana Jehova Esowo ebahne gbo-n mbang sehng go ndi erikendi nyi li wum wum. go nnya atahl abal nyia, re á gon-n kak ege elwo, fere wuung-n. Á limi ano eji á l'kahn ji wob-n go eltim, joare m̄ bahke bumu nkahn enye afi n̄ nehm bum.

³ Á gon-n, lim-n njal jo yam-n, fere le-n a mmana nyi wahn a bahnsō ewahne ba nkul kii kahn, eji á l'tib-n re nsol alehke nyi nyi sang nne kpo kpin, á kpo kpin go ellum anehng anehng ni lohngo go nnyo mi Jehova.

⁴ Abomo enyahne jakem, jol akpade enyahne tungem go nnya atahl abal nyia.

⁵ Kahnen go egahna ntim fvfo re, ana nne kpo kak mmon ewe erem re a soong-e, ano wo Esowo ebahne kpo kak-n erem re a soong-n.

⁶ Jo bumen nkahn nyi Jehova Esowo ebahne, wahn jo jen jo wuk-e, fere jo ka-e egburu kpunu.

⁷ Tibre Jehova Esowo ebahne kp-n koko ba nnooba ndi, ndi nyi kpi ngbalahb, a abing alahb, go ngba nyi mb'behl alahb kp'lohngo, jo fab asongo go adamme a awong,

⁸ ndi nyi kpi akohl nya bo kpo lung re awid a bali, alehke greb a nrahn efig, pomegreneti tob li o, a akehng oliv, go akehng ekon.

⁹ Ndi nyio nyi nsol alehke l'ki-n jo rin, jol ejumjum wahn nehm jo lehng. Ndi nyio akpartal enye akuungu nya, m̄ bahke ma jo kpa abilikpi yehke go awong.

¹⁰ Ngare nyi m ma li fere w'wohngo, tehken Jehova Esowo ebahne, go nnooba ndi nyi á ma-n ka.

¹¹ Jo kunen ekpu wahn k'yini Jehova Esowo ebahne, fere kane elbumu nkahn enye, a atahm enye go nle, nya n kp-n kake lela.

¹² Tohko jol ano, n l'si li fere w'wohngo, ngare nyi m ma si atingi ntahk fere lene o,

¹³ ngare nyi nlong efong ebahne a nlong ejoro a ebul ebahne ma rur, n fere bel asilva a agul gbalee, nsol kpee nyi n kpi no, ma kpe gbal budu.

¹⁴ Owo ntim enyahne bahke kehme ellimi agabbe, m bahke yini Jehova Esowo ebahne, ye ji yehk-n go Ijib, go ndi nyio nyi n jolo aju.

¹⁵ Á gbo-n mbang sehng go nkpaange ndi erikendi nyi li wum wum. ni jolo wum wum, ndi ekor lahb nyi ane l'k'ma bel alahb, ndi nyi kpi enyo a enang bi kpi afa. Á limi alahb lohng go etahntahn ekpartal ka-n.

¹⁶ Á ka-n mmana re wahn li go ndi erikendi nyi li wum wum. jolo wumwum, ejum ji babnso ewahne kii kahn bade, eji á l'gon-n kak ege elwo, fere jo wuung-n, eji go es'kohro, l'nob na anahne.

¹⁷ A li ma bung tong elna re, "Eko ejame, a atahne nya abo enyame nya ma lim afang nyaa a ka-m."

¹⁸ Wo buumen Jehova Esowo ebahne, tibre ye wo kpo ka-n eko ji emallimi bel afang, eji l'tibre egbanngalung eje ji á tiri ka babnso ewahne ebyiimi ana li no lela.

¹⁹ N l'fere yini Jehova Esowo ebahne fere jo toono asowo nyako, jo kak bo, jo gong ka bo, n

kp'yiimi ntianse ka elnahne lela re, go etingitingi, bo bahk-n ranng.

²⁰ Ana Jehova ranng ajahbe nyaa go egahne esamahr, ano wo bo bahke tob ranng-n tib eji n ki jo wuk Jehova Esowo ebahne.

9

Esehngelbta Go Ndon Nyi Esowo

¹ <<Wuken wahn anebe Isreel: Anv, n yahke siiri Jordan song yel ko ndi nyi ajahbe nya gbale sehng-n fere tahne sehng-n, agburu ajahbe nya akahme ebo kp'wahre are yahke rehng elbung.

² Ane bao anebe Anak ba. Bo li akolo (alabelabe) ane, fere t'tahne. N kp'kahne bada bo, wahn ebwuk ana ji ane kpo bung re, <<Nne awoo bahke ma yiimi abohng a anebe Anak?>>

³ Bumen lela go egahna ntim re Jehova Esowo ebahne, wo kp-n gboko mbang siiri asongo go egbuk jehko ana agun nya kpo fi nsol. A bahke ranng bo, a bahke koko bo elfono go egahne esamahr. M bahke kame bo yehke, fere tane mbing ebo elwaare, ana Jehova ma nyam tong-n.

⁴ Ngare nyi Jehova Esowo ebahne ma kam bo egahne esamahr tv go, ka bung go ega eltim re, <<Jehova ma-m ko ba a, re me m ba ko ndi nyia tib go egame etingi eljini. E'ee! Tib go ebi eljini ni ajahbe nyaa, jiji wahng Jehova bahke kame bo yehke egahre esamahr.

⁵ Etingi eljini enahre sang wahng, afi ana m male bum elnahne a ekpunu sang wahng, n kp'yele song ko ndia bo, wo tib go esi ebi eljini ni ajahbe nyaa, jiji wahng Jehova Esowo ebahne

bahke bo kam yehke tv go eji á l'lim ji á nyame tong babnso ewahne, Ebrahim, Aesik, a Jakob.

⁶ Jo gberen fvfo re, tib go egahne etingi eljini sang wahnge Jehova Esowo ebahne kp-n kake nnooba ndi nyia re wahn ko, tibre wahn li atahnsi ane.

Mmona nfong no bo mongo go agul

⁷ Jo buumen jia, kana tiki yini ana n limi no, ka Jehova Esowo ebahne erakatahng go ndi erikendi nyi li wum wum. ni jolo wum wum. Bomo go efung bi n tahme go Ijib abake, tete m ma ba rehng a, n kp'yiimi etahnsi a Jehova.

⁸ Gona Horeb n limi re erakatahng eje melle, wahng ka á rake eltim tete rehng ji á bahk-n wulu.

⁹ Ngare nyi n wahre go egburu ewong re me n song ko nkpace taale, akpace taale nya nwongo nyi Jehova limi anahne. N sa go egburu ewong atv atahl abal a nfung atahl abal. Nsol alehke n liim, jol alahb n woom.

¹⁰ Jehova ka-m nkpace taale na ebal nya Esowo ko ebnyohkobo ebe fik. O wo bo nyono atahm kpee nya Jehova jo bung tong-n go ewong, jo lohngo go atahng agun nyao, efung bio bi m ba kono edi ajehng.

¹¹ Eji ma biingi afung atahl abal a atv atahl abal, Jehova ka-m ekpace taale na ebal nyao, akpace taale nya egbanngalung.

¹² Owo Jehova kehm-m tongo re, "Mehl wo badde song elwaare, ane eba ba á yehke bo go Ijib ebrannge. Bobtahr s'sennge njahm, tahm nsol nyi n ka elkahn sa, fere lim elokelom ka elbo."

13 Jehova kehm kpe bung tong-m re, "Me n nyehn ane baa, bo lohko li atahnsi ane go etingitingi.

14 Yak-m, eji n l'wul bo, fere fvvdv mbing abo go njini. M bahk-a limi a jol ejahbe ji kp'tahne fere r'rur sehng bo.

15 Ano wo n senng no, jo badde ewong ji jo lul agun agun abake, a akpake taale ebal ebal nya egbanngalung go egame abo.

16 Ana n tabe amahr seenge, n nyehne re wahn eblim abiafem bada Jehova Esowo ebahne, n limi elokelom ji m mongo go elfoongo mmona mfong ka elnahne, wahn ebtahr s'senng njahm, tahm mbang nyi Jehova ka-n elkahn sa.

17 Ano wo, n rodo akpake taale nyao na abal ro tub go ndi, kehm wake ajang ajang go egahne esamahr.

18 Owo n kehm kpe gbo noongo tanne go esamahr bi Jehova nfung atahl abal a atv atahl abal. Ejum alehke n liim, jol alahb n woom, tib go abiafem kpee nya n limi no, eji n limi jio ji ki nob go esamahr bi Jehova, n jo lim-e re eltim rake.

19 N jo f'fahl esumsum erakatahng a erem bi Jehova tibre eltim rak-e bada nahne sehng re jol á wul-n na. Wo Jehova wuung-m wuungu atung.

20 Jehova eltim rak-e bada Eron sehng re á wul-e, wo ngare nyio, n tob kake ero ka Eron.

21 N rodo ejum abiafem ejahne jio, mmona mfong no n limi no, jahm fi go agun. N wa fere goko r'rere fere jol ana atong, sahb r'rere ana ebtokko. N kehm yaange ebtokko bio kak go ebgbá bi jo fab asongo go edamme ewong.

²² N tob limi Jehova eltim rak-e go Tabera a Masa, a go Kibroti Hatava.

²³ Ngare nyi Jehova yehk-n go Kedesi Benia tum, a bungu re, <<Songen, wahn song ko ndi nyio nyi m ma-n kaa, fere jol ny'nyahne, wo n yiimi etahnsi ten elkahn ni Jehova Esowo ebahne. N yehkem ntir enyahne kunu go ege, jol n we-e wukem.

²⁴ N kpo yiimi etahnsi a Jehova bombo go eji me n kahn-n no.

²⁵ N noongo tanne go esamahr bi Jehova nfung atahl abal a atv atahl abal, tibre Jehova bungu re á bahk-n wulu.

²⁶ N jo kake ero ka Jehova , fere jo bung re, <<Jehova ji gbale sehng, ka wul ane eba, bo ji li nsol elehkelkv enya, bo ji á ma ko egburu eko eja tahre bo, fere yehke bo go Ijib a etahntahn ebo.

²⁷ Buumu Ebrahim, Aesik a Jakob, bo ji jolo alokeltum eba. Lub rod na rod etahnsi ji ane baa, a ab'bi ebo, go abiafem ebo bum daange daange daange.

²⁸ Tohko jol ano, ane bao ba á yehk-r go ebo ejahbe ba, bahke bungu re, <<Tib eji Jehova kii ma ko bo song yel go ndi nyi á nyame tong bo tib goji bo kil jo kor-e, jiji wahnge á yehke bo ba, re á ba wul bo go ndi erikendi nyi li wum wum.

²⁹ Wo ga, bo ane eba ba, nsol elehkelkv enya nyi, bo ji á ko egburu nsahm a eko, tanne song yehke bo.>>

10

Esowo ka Moses Akpake taale Atahm Ana Nya

Ngbokambang

¹ <<Ngare nyio Jehova bungu tong-m re, <Fik ekpake taale na ebal yehke ana nya ngbokambang, wo ko bo ba ka-m ero ewong. Tob ko ajangenti wo lim mobkohl.

² M bahke nyono go ekpake taale alum nyanehm nya jolo go agbokambang akpake taale nya a wa no. Owo a bahke rodo akpake taale nyao kak go mobkohl noo.

³ Ano wo n ko eti ji bo kpo lung re akasia lim mobkohl fere fik ekpake taale na abal ana nya ngbokambang. N kehm wahre tahm go ewong a akpake taale nyao na abal go egama abo.

⁴ Jehova kehm nyono nkahn na ewubu go akpake taale nyao na abal, ana á tohko nyon, nyao nya á jo rabe tiing-n go ewong, go agun efung nkon bio. Jehova kehm-m kake akpake taale nyao.

⁵ Owo n kehm feere badde ewong ba kak akpake taale nyao go elkohl ni m ma lim ana Jehova ka-m elkahn. Fvfo tiki wob o tete sik anv.

⁶ Anebe Isreel kehm tabe eljen ebo go mbing elahb nyi anebe Jaakan song rehng go Mosera. O wo Eron kpo no, bo kpa-e kak. Eleaja mmon ewe wo fere ba yiimi go ege enyo ana nlimanjom.

⁷ Bo kpe mehl eljen o tete rehng go Gudgoda sehng song rehng go Jotibata, go ndi nyi kpi mbing elahb gbalee.

⁸ Ngare nyio Jehova yabe et'tohngo ji Levi re bo jo sol elkohl ni egbanngalung ji Jehova, fere jo yiimi go esamahr bi Jehova jo loko eltum, fere

jo tob bung elfuulu go egea mbing, ana bo kp'tiki kpe lim lela.

⁹ Jiji a ji wahnge anebe Levi kii kpi mbaan-gansol, afi elehkelkv go ellong abonanyehn ebo. Jehova wo li ejum elehkelkv ebo ana Jehova Esowo ebahne tongo bo.

¹⁰ Ngare nyia fvfo, n kange go ero ewong atv atahl abal a nfung atahl abal ana n kange no ngare egbokombang. Jehova wuung-m atung go ngare nyia fvfo. Ntir atahng enye, we jolem re á wul-n.

¹¹ Jehova kehm buntu tong-m re, "Song wo song tv ane baa go ebo a mbang, eji bo l'yel song ko ndi nyio nyi n nyame tong babnde ebo ba nkul re m bahke kake bo.>>

Jo Fahlen Jehova

¹² Wo anv Isreel, ji Jehova Esowo ebahne kp'sebe li re, wahn jo fahl Jehova Esowo ebahne, jo jen go abang enye kpee, á jo kor-n, wahn jo loko Jehova Esowo ebahne, a ntim a ntim enyahne , a etohko etohko ejahne,

¹³ fvfo wahn fere jo buumu nkahn a eltibi ni Jehova nya n kp-n kake lela, eji l'nob anahne?

¹⁴ Jehova Esowo ebahne bi kpi elbung a nsol kpee nyi li o, ye wo kpi elbung ni ga wahre a ndi, a nsol nyi li go njini kpee.

¹⁵ Tvtv o, Jehova yehke elgoro ene kunu babnso ewahne. Bo jo kor-e, á fere yehk-n, wahn abon abon ebo, fere rod-n wahre sehng ajahbe kpee, ana li no lela.

¹⁶ Yehken asabsab nsol kpee go egahna ntim nya kpo lim re wahn k'jo kpunu Jehova. Kana kpe tahne esi.

17 Tibre Jehova Esowo ebahne li Esowo bi asowo, fere jol Nde no babnde aju, egburu Esowo bi kpi nsahm, fere m'monngo, ye ji kil jo rang ane, jol ngu á kpehme ko.

18 Á kpo yiimi ane ba ki kpi babnde, a akalebun njahm, go ebo atongtong. Ajahmjahm kpo kor-e ba lene go egahne ellong, á fere jo ka bo nsol alehke a nsol ebjing.

19 Nong ajahmjahm jo kor-n, tibre wahnfono jolo ajenne go Ijib.

20 Jo fahlen Jehova Esowo ebahne, wahn jo lok-e. Gbo-n ye ejahm wahn toon-e, fere jo ko nwongo go egea mbing.

21 Ye wo li nne no m bahke tiki jo tehk-e, ye wo li Esowo ebahne, ye ji limi agburu amenngo akpokosi nsol ka-n, nya n ko amahr enyahne nyehn.

22 Babnso ewahne ba nkul ba tahme song yel go Ijib jolo ane atahl ara ane awubu ba ba. Wo anv, Jehova Esowo ebahne ma-n lim wahn ebrur ana alonlo nya li go elbung.

11

Nong Jehova Jo Koren Wahn Jo Kpun-e

1 <<Nong Jehova Esowo ebahne jo koren, wahn fere jo lim nsol nyi li re wahn lim, a eltibi ene, a atahm enye, a nkahn enye, ngare anyehng anyehng.

2 Buumen lela, re abon ebahne baa sang nyehne erem bi Jehova Esowo ebahne kan-n no, ano nya etul ebe, egburu eko eje a atahne enye.

³ Nliingi nyi á tibi no, a nsol nyi á limi no go atahng Ijib, nya á limi Fero ntula Ijib, a ejahbe Ijib kpee;

⁴ nsol nyi á limi nsoja nyi Ijib, ebvankang ebo, a amvtv nta ebo, fvfo ana Jehova ko nnyel alahb go aya nkpafa tane bo eko eji bo jo kam-n, fere mal bo tete lela.

⁵ Abon ebahne sang nyehne ji á limi ka-n go elka emahng tete n rehng a edi jia,

⁶ a ji á limi Datan abola Abiram, abon ba nlum ba Eliyab ji lohng go et'tohngo ji Ruben, eji ndi lennge nnyo eme go ellong anebe Isreel, mele bo, a anebe etahk ebo, a ejum ajehng ajehng ji li elkpin ji bo bele no.

⁷ Wo amahr nya nyahne nya nyehne agburu nsol nyaa kpee, nya Jehova ma lim.

⁸ Fvfo jo bumen nkahn kpee, nya n kp-n kake lela, eji n l'bel atahne song yel ko ndi nyi n kp'siiri Jodan re wahn song ko fere bel.

⁹ Eji n l'bel nlabe elkpin go ndi nyi Jehova tiri tong babnso ewahne ba nkul a nkul, re á bahke kake bo a abon abon ebo. Ndi ny'nehm o alahb bel a akehng ekon kp'fabe ana alahb.

¹⁰ Ndi nyi n kp'yele re wahn song ko, limm ana ndi nyi Ijib, nyi n lohngo no ba, nyi n jo bahm amohk nti fere jo ko akpade enyahne jo rahm adi nya alahb bahke jo fab sehng, ana etahngga anyane.

¹¹ Wo ndi nyi n kp'siiri Jodan re wahn song ko jol enyahne, li ndi nyi agburu awong a adamme nya kpo wo elahb ji kp'nake go elbung abake.

¹² Ndi nyi Jehova Esowo ebahne kpo kpur nyi, amahr nya Jehova Esowo ebahne tiki kun o,

bomo ana elya kp'bomo tete rehng es'kohro.

¹³ N l'fere soro asi jo bum nkahn nyi n kp-n kake a lela, re Jehova Esowo ebahne jo kor-n wahn fere jo lok-e a eltim eltim enahne, a etohko etohko ejahne,

¹⁴ owo m bahke nake elahb wohngo go egahna ndi, go ngare enye, ngare nyi elum yahke mal, a ngare nyi elum yahke se, eji n l'banne nkohl, a amahm mfemfe a akehng oliv bum elnahne.

¹⁵ M bahke limi re ajele jo gbal go egahne ebgbe ka efong ebahne, m bahke jo li, fere w'wohngo.

¹⁶ Jo kunen ekpu, no bo bahk-n were re wahn sennge go nkpe, fere jo kak asowo nyako, fere jo gong ka bo.

¹⁷ Owo erakatahng ji Jehova bahke nyaale tob-n ana agun. Á bahke bulu elbung eji elahb l'k'kpe na, ndi nehm kpe kab nsol ndi. Jol m bahke gulu kpoko go nnooba ndi nyi Jehova kp-n kake.

¹⁸ Rod alum nyaa kak go egahne eltim a ntir atahng enyahne. Gba go ega abo ana ejum elliingi, wahn fere jo gba go egahna mbuk.

¹⁹ Tiben abon ebahne nsol nyia, jo bungen bade eji n jehk etahk, a eji n kp'jene go mbang, a eji n nong no, a ngare nyi m ma mehl.

²⁰ Nyonen go egahne ati mbu etahk a ati mbuga,

²¹ owo wahn a abon ebahne, m bahke bele nlabe elkpín go ndi nyi Jehova Esowo ebahne nyame no re á bahke kake babnso ewahne ba nkul. M bahke lene o eji elbung kpeka li go ero ndi kpeka li ga.

²² N l'fere kunu ekpu bum nkahn nyia nyi n kp-n kake re wahn toono, re Jehova Esowo ebahne

jo kor-n, wahn jo jen go ege abang kpee, fere jo tahm tonng-e,

²³ Owo Jehova bahke kame ajahbe nyaa kpee yehke, m̃ bahke taare ajahbe nya kp'gbale, fere tahne sehng-n ndi abo.

²⁴ Edi ajehng ajehng ji ñ l'jade akpade bahke jolo ejahne. Ndi enyahne bahke bomo go elka emahng rehng go Lebanon. Fere bom go aya ma Yufritis rehng agburu aya ma erede mfam, ma bo kpo lung re Mediterania.

²⁵ Nnene limm no bahke ma yiimi abohng anahne. Jehova Esowo ebahne bahke limi re elmenngo a elfahle enahne jol go ndi nyio kpee, a edi ajehng ajehng ji ñ je no ana á nyame no.

²⁶ Nyehneno, n kp-n bumu elfuulu a nkuk go egahne esamahr lela re wahn yehke,

²⁷ m̃ bahke bele elfuulu, ñ l'fere kpunu nkahn nyi Jehova Esowo ebahne nyi n kp-n kake lela;

²⁸ Nkuk, ñ l'fere ten elkpunu nkahn nyi Jehova Esowo ebahne fere senng njahm go mbang nyi n kp-n kake elkahn lela, fere jo toono asowo nyako nya ñ ki nyi.

²⁹ Ngare nyi Jehova Esowo ebahne ma-n ko ba go ndi nyi ñ kp'yele re wahn ko, m̃ bahke yiimi go egburu ewong ji Gerijim jo tiingi bada nfuulu, a go egburu ewong ji Ebal jo tiingi bade akuk.

³⁰ Ñ kp'kahne re awong nyaa li go egbuk Jodan jehko, go ejang erede mfam bi mbang nyi li asongo goji njul kpo lahm. Tob li kohlo agburu nti nya More, go ejang ndi nyi anebe Kenan ba lene go edamme ji Araba, go ejang bi Gilgal.

³¹ Anv, ñ yahke ba elsiiri Jodan song yel ko ndi

nyi Jehova Esowo ebahne kp-n kake. Ngare nyi m ma song ko ndi nyio fere lene o,

³² jo bumen re, m bahke jo bum atahm a ntibi kpee nyi n kp-n kake lela.

12

Edi Esowo Akake Na Ajehng

¹ <<Atahm a eltibi nya a, nya m bahke jo kunu ekpu jo toono go ndi nyi Jehova, ye ji li Esowo babnso ewahne ma-n ka, re wahn ko fere jol nya nyahne, go ngare kpee nyi m bahke lene go ndi nyio.

² Ranngen kohrem kohrem kohrem, adi kpee nya li go ero awahre wahre awong, a nya li go ero awong, a nya li go nla eti ajehng ajehng ji ma nyange ab'bo, nya ajahbe nya n kp'koko kpo kak asowo bo.

³ Waan agudu njom ebo, wahn tob far akahme kahme atal ebo, fere jahmen ago asera go agun; kiimi alokelom asowo ebo tuubu go, wahn fere fvvdv yehke abing ebo go adi nyao.

⁴ Wahn, kana jo kak Jehova Esowo ebahne go mbang ana nyi bo kpo kak.

⁵ Wo, m bahke sebe edi ji Jehova Esowo ebahne bahke yehke go egahne at'tohngo kpee re á kak mbing enye o, ana edi ellene eje. Edi jio ji m bahke jo je.

⁶ Jo koon ayare enyahne nya bo kpo jahm fi je o, a ajom enyahne, a ejum ajehng go nsol ewubu, a akahmekahme nsol nya elkake Esowo, nsol nyi n ko nwongo re m bahk-e kake, a ayare nya nne

toobo eltim ene, go agbokombang abon ba ellong efong ebahne, a ellong ejoro ebahne.

⁷ Ona wo, go elwo ni Jehova Esowo ebahne, wahn a ebangenahb ejahne bahke jo li, fere jo geere kak ejum ajehng ajehng ji n kunu ebo ebahne re wahn lim. Tibre Jehova Esowo ebahne ma-n fuulu.

⁸ N nehm jo lim ana e kp'limi a lela, re no nne jo lim ana kp-e koro.

⁹ eji n kala si r'rehng go edi erekekv a ejum elehkelkv ji Jehova Esowo ebahne kp-n kake.

¹⁰ Wo m bahke siiri Jodan song lene go ndi nyi Jehova Esowo ebahne kp-n kake ana ejum elehkelkv. Fvfo á bahk-n kake erekekv go abo nya anebekv ebahne kpee ba lene senng-n kak, eji abi nsol l'ki-n toono.

¹¹ Go edi jio ji Jehova Esowo ebahne bahke yehke ana edi ji m bahke jo kak mbing enye fere kpun-e, owo m bahke koko ejum ajehng ajehng ba, ana n ka-n elkahn. Nsol ana ayare nya bo kpo jahm fi, a ajomjom, ejum ajehng go nsol ewubu enyahne, a ekahmekahme nsol nya n ko ba yare Esowo, a atingi nsol enyahne kpee nya m ma ko nwongo re m bahk kake Jehova,

¹² Jo geeren o, go esamahr bi Jehova Esowo ebahne, wo a abon eba ba nlum, a ba nkal, alokeltum eba ba nlum a ba nkal, a ane ba lohng go et'tohngo Levi ba li egahna mfam ba bo ki ka bo edi ndi, afi ejum elehkelkv ji bo.

¹³ Jo kunen ekpu, wahn k'lim njom nyio nyi ayare nya bo kpo jahm fi go edi ajehng ajehng ji kor-n no.

¹⁴ Jo Limen go edi jio ji Jehova bahke yehke ji ji,

go et'tohngo ajehng, go egahna at'tohngo, owo m̃ bahke limi ejum ajehng ajehng ji n ka-n elkahn.

¹⁵ Limi limi kan, ñ li ma wul nnyam enyahne go mfam ejahbe anyehng anyehng fere li nnyam ana kor-n no, jolafi jolo mbilikpa afi ebrahng, ana Jehova Esowo ebahne fuul-n no. Ane bao ba li saang, a ba ki li saang bahke ma li.

¹⁶ Wo ka tiki li alung ma nnyam anyehng anyehng, yaange wohng go ndi ana alahb.

¹⁷ Kana li go egahna ajahbe, ejum ajehng jio ji nsol ewubu, nyio nyi nkohl enyahne go mfam ejahbe, a nyi amahm mfemfe, afi akehng oliv, afi nyi ngbokambang a mmon no ellong efong a ejoro a ebul ebahne, afi ejum ajehng ajehng ji á ma lim nwongo re a bahke kake, afi ayare nya ñ toobo egahna ntim, afi akahme kahme nsol elkake Esowo nyehko.

¹⁸ Sehngem re m̃ bahke jo li go elwo ni Jehova Esowo ebahne go edi ji Jehova bahke yehke. A bahke jo li a abon eba ba nlum a ba nkal, alokel-tum ebahne ba nkal a ba nlum, a abalimajom ba li go egahne ejahbe. M̃ bahke jo geere go esamahr bi Jehova Esowo ebahne, go ejum ajehng ajehng ji ñ kunu ebo ebahne re wahn lim.

¹⁹ Jo kunen ekpu, wahn k'yini et'tohngo ji Levayi, ngare kpee nyi ñ li go ndi nyio.

²⁰ Ngare nyi Jehova Esowo ebahne ma lim re edi ndi ejahne kpe kpange budu ana á nyame no, nnyam l'kor-n, á fere bung re, "Nnyam ma-m kor, ñ li ma li ana kor-n no.

²¹ L'jol re edi ji Jehova Esowo ewahne yehke re á kak mbing enye kp'labe mbang sehng bomo go

edi ji a li no, á bahke ma wul enyam go ellong efong a ejoro, a ebul bi Jehova ma-a ka ana n ka-n elkahn. Fvfo go egahna mfam ejahbe, m bahke ma li ana kor-n no.

²² Liin ana á kpo li mbilikpa afi ebrahng. Ane bao ba li saang, a ba ki li saang, bahke ma li.

²³ Wo jo kunen ekpu, wahn k'li alung, tibre alung ma li elkpín, fvfo m nehm tiki li nnyam a elkpín.

²⁴ Kana tiki li alung ma nnyam anyehng anyehng, yaangen wohngo go ndi ana alahb.

²⁵ Ka li alung eji l'nob anahne, a abon ebahne ba bahk-n toono, ano wo m bahke jo lim ji kp'nobo go esamahr bi Jehova.

²⁶ Roden nsol nyi á ma yab bum ejeje ka Esowo, a ejum ajehng ajehng ji m ma ko nwongo re m bahke kake, wahn song edi ji Jehova bahke yehke.

²⁷ Limen njom ayare enyahne nyi eljahme fi go egudu njom ji Jehova Esowo ebahne, jolo ayare nya nsol alehke, afi nya alung. Alung ma nnyam njom ebahne, m bahke jo yaange wohngo go nkpe egudu njom nyi Jehova Esowo ebahne, wo m bahke ma li nnyam nyio.

²⁸ Kunen ekpu wahn jo kpunu ajehke kpee nya n kp-n kake, eji l'jo nob anahne ngare kpe kpe, a abon ebahne ba bahk-n toono. Tibre l'jol ano, m bahke jo lim ji kp'nobo go esamahr bi Jehova Esowo ebahne.

²⁹ Jehova Esowo ebahne bahke tane ajahbe kpee nya m yahke yel re wahn song ko. Wo ngare nyi m ma kam bo yehke, fere lene go eboa ndi,

³⁰ fvfo ngare nyi Esowo ma ranngé bo go egahne esamahr, jo kunen ekpu eji m l'k'gbo yel

ekpoko, jo song bahb bade asowo ebo re, <<Anv, ajahbe nyaa kpo loko asowo ebo renanee? E bahke tob jo loko bo.

³¹ Kana tiki jo kak Jehova Esowo ebahne go mbang ana nyi bo kpo lim, tibre bo kpo lim elkohn asabsab nsol kpee nyi kil jo kor Jehova, bo l'kehme asowo ebo loko. Bo kpo jahm abon ebo ba nlum a ba nkal fi go agun ana ajom nya bo kp'limi ka asowo ebo.

³² Kunen ekpu wahn lim nsol kpee nyi n ka-n elkahn, kana budu ejumjum, jol kana yehke.

13

Ekake Asowo Nyako

¹ <<Nnyehnamahr l'fere lohng go egahne el-long, afi nne no kpo leeme alem, ba tong-n bade elliingi, afi nkpokosi anyehng anyehng,

² l'jol re elliingi, nio, afi nkpokosi nyio, nyi á bungu no, eblohko lim, á soro bung re, <<Wahr tahmen song toono asowo nyako, fere jo kak bo.>> (asowo nya n kil kahne)

³ Kana wuungu atung, go alum nya nnyehnamahr noo, afi nleemalem noo. Jehova Esowo ebahne kp-n wuungu, re á kahn joare re á kp-n koro a ntim a ntim enyahne kpee, a atohko atohko enyahne kpee.

⁴ Jehova Esowo ebahne ye wo m bahke jo toon-e, fere jo kpun-e. Jo bumen nkahn enye wahn jo kpun-e, jo loken ye, wahn fere gbo-e ejahm t'tahne.

⁵ Nnyehnamahr noo, afi nleemalem noo, m bahk-e tiki wul na, tibre yebtib ana ane bahke jo

yiimi etahnsi a Jehova Esowo ebahne, ye ji yehk-n lohng anahne go Ijib fere faken yehke go edi ji n jolo aju. Nnyehnamahr noo, afi nleemalem noo ebgare re á senng-n, wahn k'kpe toono mbang nyi Jehova Esowo ebahne ka-n elkahn re wahn jo toono. M bahke tiki yehke ab'bi nyao go egahne ellong.

⁶ Mmonanne antahng antahng, afi mmon ewa no nlum, afi mmon ewa no nkal, afi nkal ewa no kpo kor-a, afi ekpondahme eja, l'fere weele jo wer-a re, <<Wahr tahm song kak asowo nyako, asowo nyao nya wahnfono, afi babnso ewahne ki nyi,

⁷ asowo nya ane ba lene senng-n kak, fere jolo nya li a edahl dahle, afi nya li fee go ejang njini behko,

⁸ ka taame tv bo, jol kana bo atung wuungu. Nong bo ki-n fili ndon. Kana bo yake, jol kana bo behr,

⁹ M bahke tiki wul na bo. Wo wo bahke gboko mbang ko ebo eba bom bo elwulu, ane bako kehm tob kak abo ebo.

¹⁰ Tuuben bo atal wul, tibre bo kp'gare re bo senng-n yehke ntim enyahne goji Jehova Esowo ebahne, ye ji yehk-n go Ijib, go edi ji n jolo aju.

¹¹ Owo anebe Isreel kpee bahke wuku, fere jo fahl. Fvfo nnene go egahne ellong nehm kpe lim eb'bi ejum ana jio.

¹² N l'wuk bade mfam ejahbe anyehng anyehng nyi Jehova Esowo ebahne kp-n kake re wahn lene,

¹³ re abi ane eblohng go egahne ellong, kp'tohko anebe mfam ejahbe nyio go mbang nyi ki li nyi

nno, fere jo tong bo re, "Nong wahr tahmen song kak asowo nyako>> (asowo nyako nya n ki nyi),

¹⁴ owo m bahke bahbe, feede, fere seb kahn nob nob. L'fere jol etingitingi, eji m ma seb kahn re boblim eb'bi jia ji kpo sab Esowo go egahne ellong,

¹⁵ M bahke wulu ane kpee ba lene go mfam ejahbe nyio. Ranngen ejahbe jio kpee, ane a atohko ndi atohko ndi.

¹⁶ Kpu-n nsol kpee nyi m bahke dake, wahn ba luk go elatahkgur ji ejahbe jio, fere jahm mfam nyio kpee fi go agun a nsol nyi n da no, ana ayare eljahme fi ka Jehova Esowo ebahne. Mfam nyio bahke jolo ana ebimbim go njinanjini, jol nnene k'kpe tiki si.

¹⁷ Kana bum ejum ajehng ajehng ji li ka Jehova, ranngen kpee. Eji Jehova bahke sennge njahm go ege erakatahng, n fere jo fil-e ndon. Fvfo a fere be-n ndon, lim-n, n jol go nrur, ana a nyame no ko nwongo tong babnso ewahne ba nkul.

¹⁸ Jia bahke jolo ano tib eji n kpunu Jehova Esowo ebahne, fere jo bum nkahn enye kpee nyi n kp-n kake lela, fere jo lim jio ji li nob nob go ege esamahr.

14

Nsol alehke nyi li saang a nyi ki li saang

¹ <<Wahn abon ba Jehova Esowo ebahne ba. Kana jo gbanngge elnahne alok, jol kana jo kpoongo mbuk emahne tib eji n nong elkv,

² tibre ń li saang ka Jehova Esowo ebahne. Jehova ma-n yehke go ellong ane kpee ba li go njini re wahn jol akahmekahme ane ba li ka ye.

³ Kana li ejum ajehng ajehng ji ki li saang go esamahr bi Esowo.

⁴ Enyam bi a na, bi ń bahke ma jo li: edam-agudu, njoro, mbul,

⁵ ebrahng, mbilikpa, nrun, mbulemahng, etohk, ngu, a njoro nyi kpo jol go ewong.

⁶ ń li ma li nnyam anyehng anyehng nyi kpi ajiki nya yange ejang ebbal, nyi kpo li nsol kuuru go elbehr fere jo yehke li.

⁷ Limilimi kan, kana li enyam bia a, bi kpo jab nnyo afi bi kpi ajiki, nnyam ana ekamel, ebeso afi ebeso afukatal. Jol eji bo kpo j'jab nnyo, bo kpimm ajiki, bo limm saang ka-n.

⁸ Ekuk tobem li saang, Jol eji ekuk kpi ajiki, á kpehme jab nnyo. ń nehm jo li nnyam ekuk, jol kana lak ekuk ji ma kpo ebo.

⁹ Go enyam kpee bi li go alahb, ń bahke ma li bo ji kpi ekong a akpake.

¹⁰ Wo ejum ajehng ajehng ji tohko bel ekong a akpake, ń nehm li. Li ejum ji ki li saang ka-n.

¹¹ ń bahke ma li ebruk abehng abehng bi li saang.

¹² Wo nruk nyi a, nyi ń l'k'li: Ekpi, ebtere, nnyake ebtere,

¹³ mbilibili ekumgbakela, nnyake nyake ekumgbakela, elkohn egor ajehng ajehng,

¹⁴ elkohn ebruk abehng abehng bi bo kpo lung re raven

¹⁵ Er'kohng akpatange, er'kohng ji kpo ran na, ebruk bi bo kpo lung re gol, ye ji kpo jol go egburu aya, elkohn ekumbakela ajehng ajehng,

¹⁶ Mmor'kohng a egburu er'kohng, mbarebare er'kohng,

¹⁷ er'kohng emahng, ji kpo bim nsahre, ji bo kpo lung-e re ospehre, egburu er'kohng aya ji bo kpo lung re komoranti,

¹⁸ Nlabannyo ebruk bi bo kpo lung re Stok, ajoobo abarebare nruk nyi kpo v elv alahb, ngon a esahnge.

¹⁹ Anyamnyame kpee nya kpo fonngo, bo limm saang ka-n, kana jo li bo.

²⁰ Wo nnyam anyehng anyehng nyi kpi akpungkpung fere jol saang, m bahke ma jo li.

²¹ Kana jo li ekpakv nnyam anyehng anyehng nyi n tingi no. M bahke ma rod ka nne ajahmjahm no lene mfam ejahbe anyehng anyehng enyahne. Ye bahke ma li, afi n li ma gungu nne ajahmjahm. Wahn li ane ba li saang ka Jehova Esowo ebahne.

Kana ko alahb bel nnyehn mbul lam mmona mbul.

Ejum ajehng go ellong nsol ewubu Ji Esowo Ji (Eltahme?)

²² Jo kunen ekpu, wahn jo baange nsol nkpakandi enyahne go edi ebwubu, yehke ng'gabe anyehng, bum eje eje go elya elya.

²³ Jo liin nsol enyahne, ejum ajehng go nsol ewubu, ana nkohl enyahne, amahm mfemfe,

akehng oliv, fvfo a agbokombang abon ba elong efong ebahne, a ba ellong ebul ebahne, go esamahr bi Jehova Esowo ebahne, go edi ji á bahke yehke re ane jo kak Mbing enye. Ano wo rn bahke kpili ana rn bahke jo kak mbing enye fere jo kpunu Jehova Esowo ebahne ngare kpe kpe.

²⁴ L'fere jol re edi jio kp'labe sehng, wo ga Jehova ma-a fuulu ana a l'k'ma sol nsol nyio je a nyi o, (tibre edi ji Jehova ma yehke fere kak Mbing enye kp'labe mbang sehng),

²⁵ Yaange ag'gabe nsol enya nyao tv go akpohko, wo kuuru akpohko nob nob go ega ebo wo song go edi ji Jehova Esowo bahke yehke.

²⁶ N l'rehng go, ko akpohko nyao wo gunu ejum ajehng ajehng ji kor-a no, l'kor-a mfong, njoro, amahm, afi ekang amahm, afi ejum ajehng ajehng ji kor-a no. Owo, wo a ebangenahb eja bahke lehke fere jo geere go elwo ni Jehova Esowo ebahne.

²⁷ Kana yini ane ba lohng go et'tohngo ji Levi ba lene go egahna mfam, tibre bo kpimm edi ndi ji bo bake bo, afi ejum elehkelkv ebo.

²⁸ Eji nnya era anyehng anyehng ma biingi, koon ejum ajehng go nsol ewubu enyahne, nyi nkpakandi nyi elya nio, song kak eksp'kpa ekuuru nsol go egahna mfam,

²⁹ eji ane ba lohng go et'tohngo ji Levi ba ki kpi edi ndi ji bo bake bo, afi ejum elehkelkv ji bo, a ajenne, a abon ba babnde ma kpo bo sa, a akalebun ba lene go egahna mfam bahke ma ba, ba li, fere wohngo eji Jehova Esowo ebahne bahkn fuulu, go abo ntum enyahne kpee.

15

Elya ni elyake mbong ka go

¹ <<Eji ma biingi nnya esehma anyehng anyehng, m bahke yake abong nya ane kpi-n no ka bo.

² Ana wo m bahke jo lim. Nne awohng awohng no bongo nnea Isreel akpohko bahke yake mbong nyio ka-e. Á nehm kpe fung nnea Isreel afi mmonannyehn re á kpi-e, tibre a wo li elya ni Jehova ma fa ane nnyo re bo yake abong ka go.

³ A li ma fung nne ajahmjahm mbong. Wo a bahke yake mbong anyehng anyehng nyi mmonanne nnea Isreel kpi-a no.

⁴ Wo nkpak nehm tiki jol go egahne ellong. Tibre go ndi nyio nyi Jehova kp-n kake re wahn ko ana ejum elehkelkv, á bahk-n fuulu gb'gbal,

⁵ n l'fere jo kponu Jehova Esowo ebahne, fere jo kunu ekpu jo toono nkahn nyia nyi n kp-n kake lela.

⁶ Tibre Jehova Esowo ebahne bahk-n fuulu ana á ma nyam, m bahke jo bong ajahbe gbalee nsol, jol bo wahn nehm jo bong. M bahke jo fili ajahbe gbalee, jol ejahbe ajehng ajehng wahn nehm fili.

⁷ Nne awohng awohng l'fere gbo ekpak go ellong ni Isreel abonane ebahne, go mfam ejahbe anyehng anyehng nyi ndi nyi Jehova Esowo ebahne kp-n kake, kana jo tahne ntim, afi jo laake abo a mmonanne ewahne noo.

⁸ Ji li no li re, m bahke jo lennge na abo enyahne, fere bong bo ejum ajehng ajehng ji bo sebe no.

⁹ Jo kunen ekpu, wahn k'bel ebi ntir nya go egahne atahng re, <<Elya ni kp'biingi nnya esehma ebrehng mal, ni bo kpo yake abong ka go' eji n l'k' bel ebi ntir bada abonane ebahne anebe Isreel ba li elehng nsol k'ka bo ejumjum. L'jol ano, bo li ma ling tong Jehova bada anahne, n fere li ebi go esamahr Esowo.

¹⁰ Jo ka-n wehr abo enyahne ka bo, jol ka ka bo a elmoongo go eltim. Tib esi jia ji Jehova Esowo ebahne bahk-n fuulu go abo ntum enyahne kpee, a ejum ajehng ajehng ji a lake abo re wahn lim.

¹¹ Akpak bahke tiki jo jol go egahna ndi. Jiji wahnge n kp-n kake elkahn re wahn jo lennge abo ka abonnnane ebahne anebe Israel, a akpak go ane ba nsol ma lehng bo go egahne ejahbe.

Yaken aju bo song

¹² L'jol re nne ewahne awohng awhng no li nnea Hibru, jolo nnenlum afi jolo nnenkal, ebgungu elbo ka-n, fere lok-n go nnya na erakera, eji ma biingi nnya esehma, m bahke tiki yake bo, bo for.

¹³ Wo n l'yake bo re bo song, kana yake bo abo.

¹⁴ Wehr abo enyahne wahn yehke go ellong atohkondi enyahne, ka-n bo nkohl a amahm gb'gbal. . Ka-n bo ana Jehova Esowo ebahne ma-n fuulu.

¹⁵ Buumen re, n jolo aju go Ijib. Jehova Esowo ebahne bi tahr-n yehke. Owo wahnge, n kp-n kake elkahn nia lela.

¹⁶ Wo nlokeltum ewa l'fere tong-a re, <<N nehme seb re me n tahm-a sa,>> tibre wo a

ebangenahb eja kp-e koro, budu o, tibre a kp-e fili nob nob.

¹⁷ Rod ebkehbw wo lahm-e etung bade go mbu-tahk, á bahke fere jol nlokeltum ewa afung elkpín enye kpee. Ano wo a bahke tob lim nlokeltum ewa no nkal.

¹⁸ Nong ki-a jol ejahk jahk ejum re wo yake nlokeltum ewa re á song eje. Tibre elloko ni á ma-a loko nnya erakera nyia, ebbiingi ntum nyi a lake ane go nkpel ebal. Jehova Esowo eba bahk-a fuulu go ejum ajehng ajehng ji a limi no

Agbokombang Abon enyam

¹⁹ Jo bumen ngbokombang abon efong ba nlum, a ba ebul go ejoro, bo jol ka Jehova Esowo ebahne. Kana rod ngbokombang a mmon a mfong ewahne kak go eltum egbe, jol ka kpud ngbokambanga mmon a njoro ewa anyar.

²⁰ Elya elya, wo, a ebangenahb eja, n bahke lehke bo go esamahr bi Jehova Esowo ebahne, go edi ji Jehova bahke yehke.

²¹ Nnyam l'fere bel elem, afi á wa amahr, afi yebbanne, afi á kpi ejum ji m-e ka ebi egahme, n nehm ko-e lim njom ka Jehova Esowo ebahne.

²² M bahke lehke nyio go egahna mfam. Ane bao ba li saang a ba ki li saang, bahke ma li, jang jang ana nne bahke ma li ebrahng afi mbilikpa .

²³ Wo kana tiki li alung nyam, yaangen wohng go ndi ana alahb.

16

Elkak Ni Elsehng Sa

¹ <<Jo buumen, wahn bum nnyahng mi Abib*, wahn jo lim elkak ni Elsiiri Sehng Sa, ni Jehova Esowo ebahne, tibre go nnyahng mio wo á yehk-n no go ndi nyi Ijib ngare atv.

² Yehk-n nnyam go ellong ebul afi efong ebahne wahn lim njom nyi Elsiiri Sehng Sa ka Jehova Esowo ebahne, go edi ji Jehova bahke yehke ana edi ji bo bahke jo kak Mbing enye fere jo kpun-e.

³ Kana li semme a ebred ji bo ko ayisi lim, wo nfung na esehma, jo liin a ebred ji bo ki kak ayis, ebred ji elnohko, tibre n mehle lohng go Ijib, go elfoomo. Jia li ano eji n l'jo buumu go afung elkpin enahne kpee, bade ellohngo ni n lohngo no go Ijib.

⁴ Nong eyisi k'tiki jol anahne go ndi enyahne kpee go nfung na esehma. Kana yake re nnyam anyehng anyehng nyi n ko lim njom go elgung ni ngbokambang efung, sa erik tete rehng efungfu.

⁵ Kana lim njom nyi Elsiiri sehng Sa go mfam ejahbe ajehng ajehng ji Jehova Esowo ebahne kp-n kake,

⁶ sehngem edi jio ji ye bahke yehke ana edi ji bo bahke jo kak Mbing enye fere jo kpun-e. O wo m bahke tiki lim njom nyi Elsiiri sehng Sa, ngare elgung eji nnv ma ji egbiri. Efung bio bi kpo se efung bi n lohngo go Ijib.

⁷ Woon na nnyam nyio, wahn fere li nsol edi jio ji Jehova Esowo ebahne bahke yehke. Efungfu wahn kehm feere go abon nkpatahk ebahne.

⁸ Go nfung na erakera, jo liin ebred ji ki kpi ayisi, go efung bi biingi nfung na esehma, belen

* **16:1 16:1** Ngbokambang a nnyahng go elya ni anebe Hibru

nkon ka Jehova Esowo ebahne, kana lim eltum.

Elkak ni arahde

⁹ Fangen erahde ebsehma yehke, bomo ngare nyi rí bomo elkoko abontahme kiimi nkohlsak.

¹⁰ Ngare nyio nyi rí bahke limi elkak ni Arahde ka Jehova Esowo ebahne. Mbang nyi ana nyi rí bahke jo lim. rí bahke jo ka ayare ana nne toobo ege eltim, jangjang ana Jehova Esowo ebahne man fuulu.

¹¹ Jo geeren go esamahr bi Jehova Esowo ebahne, go edi ji á bahke yehke ana edi ji bo bahke jo kak Mbing enye, fere jo kpun-e. M bahke limi ano, wahn a abon ebahne ba nlum a ba nkal, alokeltum ebahne ba nlum a ba nkal, a anebe et'tohngo ji Levi, a ajahmjahm, go ane ba ki kpi babnde, a akalebun ba lene go egahne ellong.

¹² Buumen re, n jolo aju go Ijib, wahn jo kunu ekpu toono atahm nyaa.

Elkak Ni Abonkpatahk

¹³ Limen elkak ni abonkpatahk go nfung na esehma ngare nyi rí ma fv nsol enyahne, fere kaame mahm bum.

¹⁴ Jo geeren, go egahne elkak, wahn a abon ebahne ba nlum a ba nkal, alokeltum ebahne ba nlum a ba nkal, a anebe et'tohngo ji Levi, ajenne, abon ba ki kpi babnde, a akalebun, ba lene go egahna mfam.

¹⁵ Jo limen elkak nio nfung na esehma ka Jehova Esowo ebahne, go edi ji Jehova bahke yehke, tibre Jehova Esowo ebahne bahk-n fuulu go nsol kpee nyi rí bahke fohko, a eltum abo enahne

kpee, ano eyebatahng ejahne bahke biingi rehng nseenge.

¹⁶ Aneblum ebahne bahke tiki ba wane go esamahr bi Jehova Esowo ebahne nkpel na era go elya, go edi ji ye bahke yehke. Bahke jolo go elkak ni ebred ji eyisi ki wob; go elkak ni Arahde, a elkak ni abonkpatahk. Nnene k'ba yiimi esamahr bi Jehova abo abo.

¹⁷ M bahke koko ayare ba a nya, no nne, jangjang ana Jehova Esowo ebahne ma-n fuulu.

Ana Abalamalam Bahke jo lam ane

¹⁸ Yehken abalamalam kunu, a atubesi ntum go et'tohngo ajehng ajehng go mfam anyehng anyehng nyi Jehova Esowo ebahne kp-n kake. Bo bahke jo lam ane go mbang nyi nno.

¹⁹ Kana jo bvrvr elam, jol kana jo rang ane. Kana jo ko ngu, tibre ngu akoko kpo wa ebang-bang nne amahr, fere yaange alum nya nne a mbolmbol.

²⁰ Jo toono mbang nyi elam alame ji nno nyi nyi, eji n l'kpin fere ko ndi nyi Jehova Esowo ebahne kp-n kake.

Elkake Asowo nyako

²¹ Kana tiki lo eti elokelom ji Asera, kohlo egudu njom ji n bahke sehke ka Jehova Esowo ebahne,

²² Jol kana lo eltal ni li re nne jo kak, tibre nsol nyia nyi kpo tehn Jehova Esowo ebahne.

17

¹ <<Kana ko mmona mfong, afi njoro nyi kpi elem ajehng ajehng, afi nyi kpi akpafeme lim

njom ka Jehova Esowo ebahne, tibre jio li ejum ji kpo sahb sab-e sab.

² L'jol nnenlum, afi nnenkal no lene go egahne mfam anyehng anyehng nyi Jehova Esowo ebahne kp-n kake, kp'limi ab'bi go esahmahr bi Jehova, jo daange nwongo nyi Jehova,

³ eji á ma sennge njahm go nkahn enyame, fere kp' kake asowo nyako, jo gong ka bo, afi á jo kak njul, afi ebareka, afi alonlo nya li go elbung,

⁴ bo l'ba tong-n ejum ana jia, m bahke feede nob nob. Bo l'feede kahn re etingitingi ji, re yeblohko lim esabsab ejum ana jia go Isreel,

⁵ Roden nnenlum afi nnenkkal noo no ma lim eb'bi ejum ana jia song go etimbu mfam ejahbe enyahne, wahn song tuub-e atal wul.

⁶ Ane abal afi, ane ara, l'yiimi ntianse lohng nne njahm, m bahke wulu nne noo. Kana toono ntianse nyi nne awohng nyi nyi wul nne.

⁷ Atianse nya bahke gboko mbang bom-e elwulu, ane bako kpee kehm tob kak ebo. Go mbang nyia m bahke tiki kam na ab'bi yehke go egahne ellong.

Ntahk Alam

⁸ <<Ngare nyi bo l'ko atongtong ba go ntahk alam enyahne, nya kp'tahne sehng-n re wahn lam, afi jolo ji bo limi nne ejum, afi ewulunne, afi jolo re nne ebgbbo ntahm, afi jolo ji nne noko a ntem, roden bo song go edi ji Jehova Esowo ebahne bahke yehke.

⁹ Songen go eji ane ba kpo lim ajom, bo ji li anebe Levi, a nlamalam no kun ngare nyio. Bahben bo, bo bahk kimi elam.

¹⁰ M bahke limi ana bo kimi elam ka-n, go edi ji Jehova bahke yehke. Jo kunen ekpu, wahn lim nsol kpee nyi bo tiben re wahn lim.

¹¹ Limen ana bo tib-n no, fvfo ana bo kimi elam ka-n. Kana ten ellimi ji bo tong-n no, senngge feere eboblum afi ebobkal k'lim ji bo tong-n no.

¹² Nne no l'lim edaangenne a nlamalam, afi njomanjom no kpo yiimi jo loko Jehova Esowo ebahne, m bahk-e wulu. Go mbang nyia m bahke tiki yehke abiafem go Isreel.

¹³ Ane kpee bahke wuku, fere jo fahl, bo nehm kpe jo lim edaangenne.

Elle Bada Ntul

¹⁴ Ngare nyi m ma yel go ndi nyi Jehova Esowo ebahne kp-n kake, eji m ma ko, fere lene o, n l'bung re, <<Wahr bob-n ntul kunu á jo fil-r ana ajahbe nyako kpee nya li senng-r kak.>>

¹⁵ Kunen ekpu, wahn bob ntul no Jehova Esowo ebahne me-e yehke re á fil-n. Á bahke tiki lohng go ellong abonane ebahne Isreel . Kana rod njenne kunu etul re á jo fil-n, ye ji ki li nnea Isreel no li mmonanne ewahne.

¹⁶ Budu o, ntul noo nehm da any'nya gbalee bum elne, jol á nehm lim re ane kpe feere go Ijib song ko any'nya, tibre Jehova ma-n tong re, <<Wahn nehm kpe tiki feere song sehng go mbang nyio.>>

¹⁷ Á nehm baange akal gbalee, eji á l'k' senngge eltim ene tv go. Á k'tiki da asilva a agul gbalee luk elne.

¹⁸ Ngare nyi á ma ji eti etul ji ejahbet eje, á bahke nyono atahm nyaa go nlaba nwer, nya á ko goji anebe levi ba li abalimajom.

¹⁹ Bahke jolo a ne, á jo lung afung kpe kpe nya á li go elkpin, eji á l'kpili ana á bahke jo kpunu Jehova Esowo ebe, fere jo kunu ekpu toono alum kpee nya ntahm nyia, a nle nyia.

²⁰ Eji á l'k' jo nyehn elne re á kp'nobo sehnge abonanyehn Isreel, fere sennge njahm go ntahm feere go ejang eboblum, afi ejang ebobkal. Owo ye, a et'tohngo eje bahke fili ane ekidi l'lab go ege eti etul go Isreel.

18

Ayare Nya Li Ka Abalimajom a anebe Levi

¹ <<Abalimajom ba li anebe Levi, a et'tohngo ji Levi kpee, bo nehm bel mbaangandi afi ejum elehkelkv a anebe Isreel. Bo bahke jo kpin go ayare nya anebe Isreel bahke jo lim ajom ka Jehova, tibre nya nya li ejum elehkelkv ebo.

² Bo nehm bel ejum elehkelkv go ellong abonanyehn ebo, anebe Isreel. Jehova wo li ejum elehkelkv ebo, ana á nyame tong bo.

³ A wo li mbaka nsol nyi li ka abalimajom go abo nya ane ba ko mfong, afi njoro lim njom: ebo, ala a ajoobo nya wob atahng, a esi.

⁴ M' bahke jo ka bo agbokombang akabenti nya nkohl enyahne, amahm mfemfe, a akehng oliv, go anyar nya n' gbo mbang kpud ejoro ebahne.

⁵ Tibre Jehova Esowo ebahne ebyehke bo, a abon ebo ba bo bahke jele toono bo, go egahna

at'tohngo kpee re bo jo yiimi jo loko go Mbing nyi Jehova ngare kpe kpe.

⁶ Nnea Levi l'lohng go mfam ejahbe enyahne anyehng go edi ajehng ajehng ji á lene no go Isreel, ba go eltim anehng edi ji Jehova bahke yehke,

⁷ á li ma loko eltum go Mbing nyi Jehova Esowo ebe, ana anebe Levi bako kpo loko o elwo ni Jehova.

⁸ Bo bahke tob bak ka-e jang jang go mbaange anyehng anyehng nyi li no, jol afi yebko akpohko nya bo gungu ndi nyi ebangenahb eje.

Atahm nya li bade Elsehk ni ki nyi Esowo

⁹ Ngare nyi m ma yel go ndi nyi Jehova Esowo ebahne kp-n kake, kana kpili ana m bahke leeme asabsab abang nya elkpín nya ane bao ba ajahbe nyao nya li o.

¹⁰ Nong nnene k'jol go egahne ellong no kpo rod mmon ewe no nlum afi no nkal lim njom nyi eljahme fi, afi no kpo bu mbu, nnea ntaane, nne no kpo lennge ana ebi ejum ji ma gbo tub nne lohng no, afi nne no kpo lim aje,

¹¹ afi nne no kpo jahng ane, afi nnyehnamahr akvne, nne no kpo bung a atohko, afi nne no kpo bung a akvne.

¹² Nne awohng awohng no kpo lim nsol nyia li esabsab ejum ka Jehova, tib go asabsab nsol ana nyaa, Jehova Esowo ebahne bahk-n gboko mbang song kam ajahbe nyao yehke go egahne esamahr.

¹³ M bahke jolo ane ba l'k'bel ebi egahme go esamahr bi Jehova Esowo ebahne.

Nnyehnamahr ana Mosis

¹⁴ Ajahbe nya ń fi song taare bo ndi, kpo wuungu anebe ntaane a abuku mbu atung. Wo ana wahn, Jehova Esowo ebahne wahn ka yake re wahn jo lim ano.

¹⁵ Jehova Esowo ebahne bahk-n kake nnyehnamahr ana me, no bahke lohngo go egahne ellong, goji abonane ebahne Isreel. M bahke jo wuung-e atung.

¹⁶ Tibre ejum ji a, ji m bahbe Jehova Esowo ebahne go ewong Horeb efung nkon bio, eji m bungu no re, <<Nong wahr k'kpe wuk ellum ni Jehova Esowo ebahre, jol wahr k'kpe nyehn agburu agun nyaa, tohko jol ano e bahke kpoko.

¹⁷ Jehova bungu tong-m re, <<Ejum ji bo ma bung a, ebno.

¹⁸ M bahke kake bo nnyehnamahr no li ana wo, no bahke lohngo go ellong abonanyehn ebo Isreel, m bahk-e kake alum enyame go egea nnyo, á bahke jo tong bo ejum ajehng ajehng ji n ka-e elkahn.

¹⁹ Nne awohng awohng no tohko wuungu atung go alum enyame nya nnyehnamahr noo bahke bungu go egama Mbing, mefono antahng m bahk-e jabbe.

²⁰ Wo nnyehnamahr no l'yiimi jo kiimi afah-nge, go egama Mbing, eji n ki-e tum na, afi nnyehnamahr no bungu go mbing asowo nyako, bo bahk-e tiki wul na.>>

²¹ Anw, m bahke jo bung tong elnahne re, <<E bahke limi renan, kehm kahne, etib tohko fere lohng goji Jehova?>>

²² L'jol re ejum ji nnyehnamahr noo kp'tooro go Mbing nyi Jehova, limem ano, afi lim go etingitingi, lohngo re etib bio, bi Jehova ki tum. Nnyehnamahr noo kp'tob bung na bung go egea nsahm. Kana ye fahl.

19

Ajahbe Nya elbeke Biiri

¹ <<Ngare nyi Jehova Esowo ebahne ma ranng e ajahbe nya á kp-n kake ndi a bo, ngare nyi m ma kam bo yehke fere lene go ebo mfam ajahbe a ntahk ebo,

² M bahke yehke egburu mfam ejahbe na era ka elnahne, go ndi nyi Jehova Esowo ebahne kp-n kake.

³ Gaben ana mbang bahke labe , wahn fere baange ndi nyi Jehova Esowo ebahne kp-n kake ana ejum elehkelkv go edi ebra, eji nne awohng awohng no wulu nne bahke beke song biirimfam ejahbe anyehng nyio.

⁴ Atahm nya a, nya li bada nne no wulu nne fere be song yel o, re á tahre elkpin ene. Nne no l'wul nnebjing ewe go efin, eji á ki lohko toobo na go eltim re á wul-e, jol go ekv bo limm wuku wuku.

⁵ Ntugare li re, nne bahke ma tahm ekulugbe a nnebjing ewe re á song gbakke nti. Ana á fohko elfuk ene bahke ma juk song tub nnebjing ewe noo, á soro kpo. Nne noo bahke ma be song yel ejahbe ajehng go ejahbe ebra bio for.

⁶ Tohko jol ano, mmonannyehn nne no li re á bongo go ewul bio, bahk-e kame go eraketahng

song kpiri, l'jol re mbang kp'labe sehng, fere wul-e, jol eji li li re fuumem re bo wul-e. Tibre á limi nnebjing ewe ejum jia, jol ekv bo limm

⁷ Jia ji wahnge n kp-n kake elkahn nia re wahn yehke ejahbe na ebra bum elnahne.

⁸ Jehova Esowo ebahne l'fere lim re edi ndi ejahne kpe yange budu, ana á nyame no go nwongo tong babnso ebahne ba nkul, fere ka-n ndi kpee nyi á nyame tong bo,

⁹ tib eji wahn kp'kunu ekpu jo toono atahm nyaa kpee nya n kp-n kake elkahn lela re Jehova Esowo ebahne jo kor-n, wahn fere jo jen go abang enye ngare kpe kpe, owo m bahke kpe yab mfam ejahbe na era nyehko bum eje eje.

¹⁰ Limen jia eji ane l'k'jo wul ane, alung mbol mbol jo lohng go ndi enyahne nyi Jehova Esowo ebahne kp-n kake ana ejum elehkelkv, eji n l'k'li ebi ji m ma yehke alung mbol mbol.

¹¹ Wo, l'jol re nnebjing a nne kp-e sabe, á song biiri jo sik nnebjing ewe noo, nok a ne, fere wul-e, á l'be song yel mfam ejahbe anyehng nyia,

¹² Anebkul ejahbe eje bahke tumu ane tv-e, bo ko-e go mfam nyio feere a ne ba yake kak mmonannyehn no li re á bongo go ewul bio.

¹³ Á ki-n fili ndon anyehng anyehng. M bahke kame ebi alehke jio ji alung nne a mbol mbol yehke go Isreel, eji l'nob a nahne.

¹⁴ Ka yehke eltal nkonandi ni nnebjing ewa ni ane ba gbo mbang jol o, ni bo lo no go ndi nyi á li elkv, nyi Jehova Esowo ebahne kp-a kake re wo ko.

Atianse

¹⁵ Ntianse nyi nne awohng, gbalem re wahn ko, ka nne ebi go ejum ajehng ajehng ji á limi no. Elbungu bahke yiimi go nnyo elam mi ntianse ebal afi ntianse era.

¹⁶ Nkimfahnga ntianse l'ba yiimi elam re á bung ka nne ebi, re nne noo eblim esabsab ejum,

¹⁷ ane abal ba kpi elam jio bahke tiki yiimi na, go esamahr bi Jehova, fvfo go elwo ni nlimajom, a abalamalam ba li eltum ngare nyio.

¹⁸ Abalamalam bahke kunu ekpu feede nob nob, l'fere jol re ntianse nyio bob seb kahn re á li nkimfahnge nyi kp'yiimi ntianse efahnge ka mmonannnyehn nnea Isreel,

¹⁹ Limen ye, ana ye tiri re á lim mmonannnyehn. M' bahke tiki kam na ab'bi nyao yehke go egahne ellong.

²⁰ Erik ane bako bahke wuku ejum jia soro jo fahl. Nnene nehm kpe tiki lim ebi ejum ana jio go egahne ellong.

²¹ Kana be nne ndon: M' bahke jo ko elkpin gal elkpin, ko elmahr gal elmahr, ko elmahn gal elmahn, ko ebo gal ebo, fere ko ekpade gal ekpade.

20

Atahm nya Li bade Ebta ajeke

¹ <<N' l'tahm ebta anoko a anebekv ebahne, n' l'song nyehn any'nya a amvtv ebta, a nsoja nyi kp'ruru sehng-n, kana fahl bo, tibre Jehova Esowo ebahne bi ko-n no go Ijib ba, á bahke jolo anahne.

² Ngare nyi í yahke bom ebta anoko, nlimajom bahke lohngo yiimi, bung a nsoja.

³ Á bahke bungu re, <Anebe Isreel wuk-m wahn! Anv, lela í yahke nok ebta a anebekv ebahne. Nong ntim ki-n kim go ala, jol kana fahl bo, kana taame ntim gbehk-n afi bo menng-n .

⁴ Tibre Jehova Esowo ebahne wo fi a nahne, re á song nok a anebekv ebahne ka-n, eji á l'ka-n esehngebta.>>

⁵ Atubesi abalimeltum bahke bungu tong nsoja re, <<Nne awohng awohng noa no ma si etahk mfemfe ji á kala rod kak Jehova go eboa? Nong a feere kehnge, tohko jol ano, á li ma kpo go ebta, fvfo nne nondiki bahke feere song bom ellene o.

⁶ Nne awohng awohng ebbahm abgbe agreb ji á kala kehme ellehka? Nong á feere kehnge, tohko jol ano, á li ma kpo go ebta nne nondiki song ting li.

⁷ Nne awohng awohng eblim ellennge go esi nnenkal no á kal-e baang-a? Nong á feere song kehnge, tohko jol ano, á li ma kpo go ebta, nne nondiki fere song baang-e.'

⁸ Atubesi nsoja bahk kpe bung re, <<Nne awohng awohng noa no kp'fahla, afi no eko kp-e tana? Nong á feere song kehnge, eji atem asoja l'k'tob gbo eltim.

⁹ Ngare nyi atubesi nsoja ma bung a nsoja mal, bo bahke yehke atubesi nsoja ba bahke jo fili bo go nlong a nlong.

¹⁰ Ngare nyi m ma tahm eljen asongo re wahn song nok a ejahbe, bungen ane bao re, í yahke lim elkoono a bo.

11 Bo l'taame, fere lennge ati mbu ebo ane ba lene o kpee bahke jolo jolo aju enyahne fere jo lok-n, bo bahke jo lim eltum ka-n.

12 Bo l'fere ten elkoono alimi, fere yiimi re bo yahke nok a nahne, noongen sennge mfam nyio kak wahn kohko bo tv.

13 Jehova Esowo ebahne l'jabbe kak-n go ebo, wulen aneblum kpee ba li o.

14 Wo anebkal, abonse a atohkondi go ejum ajehng ajehng ji li mfam nyio. M' bahke ma ko nyao ka elnahne ana nsol nyi n' da go ebta. M' bahke ma ko nsol nyio nyi Jehova ka-n no, nyi n' da go ebta lim ji kor-n no.

15 Ana wo m' bahke jo lim ajahbe kpee nya li go fee nya ki li kohl-n, nya ki li ka ajahbe nya li kpidikpidi.

16 Wo go agburu ajahbe nyao nya ajahbe nya Jehova kp-n kake ana ejum elehkelkv, kana yake ejum ajehng ajehng ji kp'vohko elv, re jol go elkpín.

17 Malen na mal bo kpee, ana Jehova Esowo ebahne ka-n elkahn. Ajahbe nyao nya a: anebe Hiti, anebe Amor, anebe Kenan, anebe Periji, a anebe Hivi, go aneb Jebusi.

18 Tohko jol ano, bo bahk-n tibi re wahn jo toono asabsab nsol ebo nyi bo kpo lim eji bo kpo kak asowo ebo toono o, n' lim abiafem bade Jehova Esowo ebahne.

19 N' l'noongo sennge ejahbe afung gbalee, eji n' kp'noko, re wahn ko, kana ko elfuk gbakke nti nyi li o ranngé, tibre m' bahke ma li akab nti nyao.

Kana gbakke nti nyio tub. Anv, nti nyio ane baa, nyi ń bahke song noongo sennge bo kaka?

²⁰ Limi limi kan, ń li ma gbakke nti nyi ń kp'kahne re kpehme kab akab, eji ń l'ko si adi elkuumu tete mfam ejahbe nyio nyi kp'noko ebta anahne gbo.

21

Elgongo Ni Li Bade Ewul Nne Ji Bo Ki Kahn Nwula Nne

¹ <<Ń l'nyehn nne no bo me-e wul, nong go ekane, go ndi nyi Jehova Esowo ebahne kp-n kake re jol ny'nyahne wahn, l'jol ji ń kil elkahne nne no wul-e no,

² anebkul ebahne, a abalamalam, bahke song gaare ana labe no, bomo edi ji nkvn nong no, tete rehng go mfam ejahbe nyi li kohlo o.

³ Anebkul ba mfam ejahbe nyi ga kabbe ekv nne jio, bo bahke koko mmona mfong no bo kala k'ko lim eltum, jol bo w-e ka k'kak eb' bini go emel.

⁴ Bo bahk-e kohko song rehng go edamme ji bo kala job, jol bo ka bahm nsol, edi ji ebgbalahb bi kp'fabe li no. O edamme jio wo, bo bahke bahne mmona mfong noo emel.

⁵ Abalimajom, anebe Levi, bahke lohngo yiimi, tibre bo ba Jehova ma yehke bo re, bo jo lim eltum, fere jo biri elfuulu go mbing nyi Jehova, fere jo toobo atongtong nya nfaabe, a abohng.

⁶ Anebkul kpee, ba lene mfam nyi li kohlo ekv nne jio, bahke ruku abo ebo wohngo mmon a mfong no bo bahn-e emel go edamme,

⁷ fere bung re, "Abo enyahre sang yehke alung maa, jol wahr nyehnem na, nne no limi no.

⁸ Jehova, ko elgongo nia, go esi Isreel ane eba, bo ji á ma fak bo. Ka jabbe ane eba re bobli ebi go alung nnea mbol mbol." Owo bo bahke gongo, go alung ma bo yehke no.

⁹ Ano wo m bahke fulu elnahne ebi jio ji m ma yehke alung mbol mbol tib eji m ma lim ji li nseenge go esamahr bi Jehova.

Baange nnenkal no bo bob-e go ebta

¹⁰ N l'je re wahn song nok ebta a anebekv ebahne, Jehova Esowo ebahne l'yake bo kak-n go ebo, n fere bob anebekv kehnge a bo,

¹¹ a l nyehn nnobonoba nnenkal go ellong ane ba bo bobo no, á l'fere kor-a, a bahk-e ma ko ana nkal ewa.

¹² Ko-e kehnge a ne go ega etahk, tong bo kpud-e esi, fere kiim-e anyaange,

¹³ Bo yehk-e nsol ebjing nyi á kake no, ngare nyi bo bob-e no. Eji á ma lene go ega etahk, noongo elkv nde a nnyehn go nnyahng amehng kohro kohro, owo a bahke ma noongo a ne, á jol nkal ewa, wo jol nlum ewe.

¹⁴ Á tohk-a fere kor, nong á song eje, edi ajehng ajehng ji kor-e no. A w-e nehm gungu, jol k-e ko ana nju, eji li re a me-e rod daange.

Ji li ka ngbokambanga mmon

¹⁵ Nnenlum l'fere ko akal abal, nkal awohng l'jo kor-e sehng noko, bo ane abal abal l'jel abon ba nlum ka-e, l'jol re ngbokambang a mmon noo, nkal no kil jo kor-e wo jel-e,

¹⁶ ngare nyi á kp'nyono nwer bak abon ebe ba nlum bada nsol enye, á nehm tiki rod ekul bi ngbokambanga mmon no nnenkal no ki jo kor-e, ka mmon no nnenkal no jo kor-e, fere tahm ngbokambang sa, no nnenkal no kil jo kor-e.

¹⁷ Á bahke tiki liingi mmon no nkul ewe no nnenkal no ki-e jo kor, ana ngbokambanga mmon, fere ka-e nsol kpee nyi á kpi no, go edi ebbal. Mmon noo wo li ngbokambang elliingi ni atahne nya nde. Ekul bi ngbokambanga mmon li ka-e.

Bada mmon no kil jo wuk nde

¹⁸ Nne l'bel mmon no kpo tahne esi, no kpo yiimi etahnsi k'jo kpunu nde ewe a nnyehn, no kil jo wuk bo l'kak-e erem.

¹⁹ Nde abola nnyehn bahk-e tubu ejahm ko-e ba go eji anebkul go eti mbu mfam.

²⁰ Bo bahke bungu tong anebkul re, <<Mmon ewahre noa kpo tahne esi, jo yiimi etahnsi anahre. Jol á wahr kpehme kpunu. Á li nne elwur a nwokamahm a nne.

²¹ Owo aneblum kpee ba mfam ejahbe enye bahke tuubu mmon noo atal wul. M bahke tiki ful eb'bi yehke go egahne ellong. Anebe Isreel kpee bahke wuku bade, fere jo fahl.

Ajoobo Atahm

²² Nne no ma li ebi go elam, ji li re bo wul-e, bo l'kahn-e nlehke wul, ekv eje bahke tokko o eti,

²³ n nehm tiki yake ekv eje re tokko o eti sene etoono efung. Kahnen re, nobo re wahn kpa-e kak efung b'nehm, tibre nne awohng awohng no bo kpak-e go eti, elsu ni Esowo li a ne. Kana tiki

lim ndi nyi Jehova Esowo ebahne kp-n kake ana ejum elehkelkv k'jol saang.

22

¹ <<Ń l'nyehn mfong nyi mmonanne nnea Isreel, afi njoro enye nyi ma tan, kana tong re, ''O ntong enyahre sang>>. Bumen go egahna ntim re wahn ko nnyam nyio feere song ka mfono.

² L'jol re bo lenem kohl-a, afi á nyimm nne no li mfono, ko nnyam nyio kehng anyi go ega etahk, ba bum-e tete á seb-e ba. Fvfo, feere anyi ka-e.

³ Tob limen ano, ń l'nyehn mbvankanga mmonanne ewahne, afi mbomo elbulu esi eme, afi ejum ajehng ajehng ji tan-e no. Kana tong re o 'Ntong enyahre sang'.

⁴ Ń l'nyehn mbvankang nyi mmonanne ewahne nnea Isreel, afi mfong enye, eji á ma gbo go mbang, kana tong re, o ntong enyahre sang. Toben mfono, wahn mehl-e yiimi.

⁵ Nnenkal k'tiki kak nsol ebjing nyi aneblum, jol nnenlum k'kak nyi nnenkal. Tibre Jehova Esowo ebahne nne awohng awohng no limi nsol nyia kpo sabe sehng.

⁶ Ń l'nyehn etahk ebruk go nkpea mbang, afi jolo eti, afi go ndi, eji nnyehn ebruk kehm walle abon, afi aje, kana bob nnyehn ebruk a abon.

⁷ Ń li ma bob abon, tiki yaken nnyehn a song, eji l'nob anahne, ń fere bel nlabe elkpín.

⁸ Ń l'si etahk mfemfe, siin mmokahme sennge elbulu etahk enahne ni bale bale, eji nne l'k'fooro o gbo, toono o, ko ebi alehke ji alung ba ka-n egahne ntahk.

⁹ Kana bahm nkohn amohk nti na abal go egahne ebgbe agreb. A l'lim ano, mbahmandi nyio nyi nyi sang bahke jolo ejum eltehb go esamahr Esowo, yefono egbe agreb nyao fvfo bahke tob jol eltehb eltehb.

¹⁰ Kana rod mfong a mbvankang, kak bo eb'bini fadde re bo jo job ndi ka-n.

¹¹ Kana kak nsol ebjing nyi bo ko av a abomo jahm semme.

¹² Kanen akpud, kak go nsongo eni nyi ekpa-wobo ji elkonngo.

Elbal Adaange

¹³ Nne l'ko nkal, eji á ma noongo a ne, l'jol re nnenkal noo we-e nehme kpe kor,

¹⁴ á l'kehme eltooro nnenkal noo yanng fere ka-e ebi mbing re, <<M baange nnenkal noa, wo eji n noongo a ne, n nyehnem elliingi ni tib-m no re á ka sahb nne.>>

¹⁵ Owo nde abola nnyehn no mmonse nkal noo bahke koko ejum ji tibi re á ka sahb nne, ba goji anebkul mfam go eti mbu.

¹⁶ Nde mmonse nkal noo bahke bungu tong anebkul re, <<N tange mmon ewame no nkal ka nnenlum noa, wo mmon ewame we-e nehme kpe kor.

¹⁷ Anv, á kp-e tooro yanng fere jo bung re, <Me n nyehn re, mmon ewa no nkal ebsahb nne.> Wo ejum ji a ji kp'tibi re mmon ewame sahbem nne. <Babnde bahke tanne mbomo mio bum go esamahr bi anebkul mfam,

¹⁸ fvfo anebkul bahke jabbe nnenlum noo kak-e erem.

¹⁹ Bo bahk-e kimi ngale re á gal ebahk esekel asilva atahl alon, nya bo bahke faake kak nde mmonse nkal go ebo. Tibre nnenlum noa ebka mongunga nnenkal ebi mbing go Isreel. Á bahke soro asi jol nkal ewe, jol á nehm yehk-e go elbal afung kpee nya á li go elkpín.

²⁰ Wo l'fere jol re ebi ji bo ka-e no lohko li go etingitingi, ejumjum limm ji bahke tibi re mmonse nnenkal noo sahbem nne.

²¹ Bo bahk-e koko ba go mbutahk mi etahk nde, edi jio wo aneblum ba mfam ejahbe enye bahk-e tuubu atal wul. Tibre yeblim ejum esono go Isreel tib eji á jo famme yanngé ngare nyi á kpeka li go etahk nde. M bahke tiki yehke eb'bi go egahne ellong.

²² N l'bob nnenlum no kp'noongo a nkala nne, nnenlum noo no noongo a ne, a nnenkal noo, bo ane abal abal bo bahke bo wul. M bahke tiki yehke eb'bi jia go Isreel.

²³ Nne l'song noongo a mongunga nnenkal go mfam, no bo ma lam elbal a ne,

²⁴ M bahke koko bo ane abal abal tahm go etimbu ji mfam ejahbe nyio, song tuubu bo atal wul. Mmonse nkal noo bahke kpoko tibre eji á jolo jol o mfam ane, á rabem lung ane, nnenlum noo bahke kpoko tibre yebrod nkala ntem daange. M bahke tiki yehke eb'bi jia go egahne ellong.

²⁵ Wo, l'fere jol re go ekulugbe wo nnenlum song nyehn mmongunga nnenkal no bo ma lam elbal a ne, fere bob-e noongo a ne, nnenlum noo, ye ji limi ejum jia, ye wo bahke kpoko antahng.

²⁶ Kana lim mmonse nkal noo ejumjum, abi-afem á ka lim nya fuumu re á kpo. Elkohn elam jia li ana nne no song bohko nnebjing ewe abohng, wul-e.

²⁷ Tibre nnenlum noo nyehne mmonse nkal no bo ma lam elbal a ne go ekul, jol afi á rabe na, nnene jolem no bahk-e tahre.

²⁸ Nnenlum l'song kpiri mongunga nnenkal no bo kala lam elbal a ne, bob-e noongo a ne, bo l'bob bo,

²⁹ á bahke kpiki nde mmonse nkal noo ebahk asilva atahl ebal ewubu. Á bahke tiki ko monse nkal noo, tibre á me-e rod daange. Jol á nehm ma tiki mal elbal a ne, afung kpee nya nnenlum noo li go elkpín.

³⁰ Nong nne k'ko nkala nde, á k'tiki song lennge ngubjinga nde sa ebun ebun.

23

Ane Ba l'k'jo Woomo Go Ellong Anebe Jehova

¹ <<Nne awohng awohng no ma wa amohk nfahn, afi no bo yehk-e bo na kim-e eri, nehm yel go ellong ni ane ba Jehova.

² Nnene k'yel go ellong ane ba Jehova, no bo jele go elbal ni ki toono ntahm nyi Jehova, afi abon abon ebe ba, jol afi kange rehng eying na ebwubu.

³ Nnea Amon awohng awohng, afi nnea Moab, afi jolo anebe et'tohngo ebo, k'yel go ellong ane ba Jehova. Jol afi kange rehng eying na ebwubu.

⁴ Tibre bo wahn wanem go mbang a nsol alehke go alahb, eji n lohngo go Ijib asongo . Bo song

yaame na Balam ji mmona Beor, ye ji lohngo go Peto ji li Aram Naharem re á ba su-n.

⁵ Limi limi kan, JEHOVA Esowo ebahne wu-ungem Balam atung; á fere kpiidi na nkuk nyio tv elfuulu ka-n, tibre wahn kp'koro Jehova Esowo ebahne.

⁶ Kana ko nwongo nyi etem a bo, afung kpee nya á li go elkpin.

⁷ Nong nnea Edom ki-n jo daange go amahr, tibre ye ekunu ejahne ji. Nong nnea Ijib ki-n jo daange go amahr, tibre wahn lene ana ajahmjahm go ebo ejahbe.

⁸ Abon ebo bao ba bo jele ka bo, tete rehng eying ebra, bo bahke ma yel go ellong ane ba Jehova.

Eltehb go edi erekekv ji nsoja

⁹ Á l'jol go edi erekekv ji nsoja go emahng ebta, kp'siki anebekv ebahne, yaben elnahne go ejum ajehng ajehng ji ki li saang.

¹⁰ L'jol re nnenlum awahne awohng awohng limm saang tib go ebjing bi long-e no go ngare atv, á bahke lohngo tahm edi erekekv sa song jol fee.

¹¹ Elgung l'kehme elbake, á bahke wuumu alahb, eji njul ma lahm, á feere go edi erekekv.

¹² Yehken edi go nkpe edi erekekv ji m bahke jo je esuku.

¹³ Go nsol ebta nyi m bahke bele, tob belen ejum ji m bahke jo ko kpa ndi. A l'je abahng nyi kpa elbing, wo nyi kak, tamme ndi bulu.

¹⁴ Tibre Jehova Esowo ebahne kp'jene yanng go egahne edi erekekv, eji á l'baab-n, fere jabbe

anebekv ebahne kak-n go ebo. Edi erekekv bahke tiki jo jol saang, eji á l'k'nyehn ejum eltehb ajehng ajehng go egahne ellong, fere senng njahm.

Ajoobo atahm

¹⁵ L'jol re nju ebbe yel etul go egahne, kana yake ye kak nde ewe go abo.

¹⁶ Nong á lene anahne edi ajehng ajehng ji kor-e no, a mfam anyehng anyehng nyi á yehke no. Kana ye fili nyaame nyaame.

¹⁷ Nnenlum, afi nnenkala Isreel awohng awohng k'jol nne as'sa etahk elom.

¹⁸ Kana ko akpohko nya bo kpi nnenkal as'sa, afi nnenlum as'sa, ba a nya go etahk Esowo ebahne re wahn ba ka nwongo nyi á n ko no, tibre Jehova Esowo ebahne ane baa kpo sab-e sehng.

¹⁹ Kana ko mmonanne nnea Isreel nsehng go ejum ajehng ajehng ji n bong-e no, afi jolo go akpohko afi nsol alehke, jol go ejum ajehng ajehng ji bahke kuumu nsehng.

²⁰ M bahke ma ko nsehng goji anebe ajahm-jahm, wo goji nnea Isreel mmonanne ewahne sang, eji Jehova Esowo ebahne, l'fuul-n go ejum ajehng ajehng ji a lake ebo re wahn lim go ndi nyi n kp'yele re wahn song ko.

²¹ N l'ko nwongo a Jehova Esowo ebahne, kana laange elkake ejum jio, tibre Jehova Esowo ebahne bahke tiki bahb-n ejum jio, ngare nyio n bahke ebi li, re woblim abiafem.

²² Wo n l'fere kpuumu k'ko nwongo, n nehm li ebi.

²³ Ejum ajehng ajehng ji n l'lenng nnyo emahne bung, jo bum ntir re wahn tiki lim, tibre

ń ko nnyo emahne antahng ko nwongo nyio a Jehova Esowo ebahne.

²⁴ ń l'yel go egbe agreb ji nnebjing ewahne, a li ma li akab enye ana kor-n no, sehngem re, kana rod nkab anyehng anyehng kak go egahna ejeere.

²⁵ ń l'yel go egbe nkohl ji nnebjing ewahne, ń bahke ma fohko go egahne abo nya ma gbo go ndi, kana tiki ko ntahme ja arahn nkohl ebo nya yim na.

24

¹ <<Nnenlum l' ko nnenkal, l'jol re nnenkal noo w-e nehme kpe kor, tib eji á ma nyehn ejum bade nnenkal noo ji kil-e ebkpe kor. á l'nyon nwer elbal amale ka nnenkal noo, kam-e yehke go ege etahk,

² ngare nyi á ma lohng elbal nio, tahm etahk nnenlum noo sa, á l'fere song bal nnenlum nondiki,

³ á tohko kpe kor etoono nlum we noo, nlum tob nyon nwer elbal amale ka-e fere kam-e yehke go ege etahk, afi etoono nlum noo l'fere kpo na,

⁴ ngbokambanga nnenlum noo no male elbal a ne, we nehm ma kpe ko go elbal eji bo m-e lim re a k'kpe jol saang. Jia bahke jolo esabsab ejum go esamahr bi Jehova. Kana ko abiafem ba kak go ndi nyi Jehova Esowo ebahne kp-n kake ana ejum elehkelkv.

⁵ L'jol re nne kpehna koko nkal, ń we-e nehm tum tv ebta, jol kana ye ka eltum anehng anehng. Á bahke jolo etahk go elya kohro kohro jo ka nkal ewe no á ma baange eyebatahng.

⁶ A l'bong nne ejum, kana ko eltal egoko nsol ni nne yahk-a na, jol mmon eltal noo go nkpaneka. Tibre jia li ana a ma ko ejum ji kpo ka nne ejum alehke.

⁷ N' l'bob nne no ma weele bob nnea Isreel mmonannnyehn ewahne, fere jo bum-e ana nju, afi á gung-e na, nvohkane noo bahke tiki kpo. M' bahke tiki ful ab'bi nyao yehke go egahne ellong.

⁸ Go atongtong nya li bade eyam abili, jo kunen ekpu wahn lim jang jang ana abalimajom, bo ji li anebe Levi, tuben elle. M' bahke tiki kunu ekpu toono ji m ma ka bo elkahn.

⁹ Buumen ji Jehova Esowo ebahne limi Meriam go mbang, eji n lohngo go Ijib abake.

¹⁰ N' l'bong nnebjing ewahne ejum ajehng ajehng, kana yel go ege ekp'kpa song rod ejum ji á kp-a yahke ana nkpaneka.

¹¹ Yiimi elatahk, nong nne no a kp-e bongo ejum, ko ejum ji á kp-a yahke ba ka-a.

¹² L'jol re nne noo nkpak nyi, ka rod mbomo elkonngo eme mi á yahk-a no song bum tete sene efungfu.

¹³ Feere a mbomo elkoongo eme, song ka-e, njul kehm lahme, eji nneljing ewa l'konngo elne kehm lale. Owo á bahk-a kake saam, bahke jolo etingi ejum go esamahr bi Jehova Esowo eba.

¹⁴ Kana jo seb re wahn jo li nne no n lak-e eltum nsehng, ye ji li nkpak nyi nsol m-e rin, jol afi á jolo nnea Isreel mmonanne ewahne, afi nne ajahmjahm no lene go mfam ejahbe anyehng enyahne.

¹⁵ Jo kpi-n bo akpohko eltum ebo efung efung, njul kehm lahme. Tibre ye nkpak nyi, amahr enye kpee kun o. Tohko jol ano, á li ma ling ka Esowo bada na, a fere li ebi.

¹⁶ Babnde nne, bo nehm jo wul bo tib esi ji ab'bi nsol nya abon ebo, jol abon bo nehm jo wul tib esi ji ab'bi bahb nsol nya babnde ebo. Nne awohng awohng bahke kpoko go ege abiafem.

¹⁷ Kana taare njenne, afi mmon no ki kpi nde eno elam. Jol kana ko mbomo eme mi elkonngo nkalebun ana ejum nkpaneka.

¹⁸ Buumen re wahn jolo aju go Ijib, Jehova Esowo ebahne wo tahr-n yehke o. Owo wahnge n kp-n kake elkahn re wahn jo lim jia.

¹⁹ N' l'kehm elfohko nsol go egahne ebgbe,, n' l'nyehn agba nya rn ma sehng sa, kana feere song rod. Yake bum aneb ajahmjahm, ane ba ki kpi babnde, a akalebun, eji Jehova Esowo ebahne l'fuul-n go ntum abo enyahne kpee.

²⁰ N' l'kum akabe oliv go elrahn, kana kpe feere song feede ab'bo. Yaken nya ma sa o ka aneb ajahmjahm, ane ba ki kpi babnde, a akalebun.

²¹ N' l'bong agreb go egahne ebgbe agreb, kana kpe feere song feede agreb nyao. Yaken nya ma sa o ka ajenne, ane ba ki kpi babnde, a akalebun.

²² Buumen re wahn jolo aju go Ijib. Owo wahnge n kp-n kake elkahn re wahn jo lim jia.

25

¹ <<Ane l'bel mfaabe nyi ma jol ntong, bo bahke koko tahm go etahk elam, abalamalam bahke

toobo mfem nyio. Bo bahke kake nne a mbol mbol eno re á song eje, nne no li ebi, bo ka-e ebi.

² L'jol re nne no li ebi, fuumu re bo dv-e na, nlamalam bahk-e tongo re, á noongo. Bo bahk-e dohko nfanga nti ana ebi eje gbale no rehng, go esamahr bi nlamalam,

³ wo nlamalam nehm yake re bo dv-e sehng nti atahl abal. Bo l'dv-e sehng ano, mmonanne ewahne, nnea Isreel noo bahke fere daange go egahne esamahr.

⁴ Kana jo gba mfong nnyo ngare nyi á kp'dohko nkohl.

Ji li re nne lim ka mmonannyehn no ma kpo no ki kpi mmon

⁵ Abonanyehn nne l'lene edi ajehng, awohng l'kpo, no ki kpi mmon, nkalebun ewe nehm tiki tahm ebangenahb jio sa song bal nlum go njahm. Mmonannyehn nlum we bahk-e koko fere baang-e, jo lim eltum nio ni nnara nne ka-e.

⁶ Ngbokambanga mmon no nlum no nnenkal noo bahke jele ka-e, bahke jo taame mbing nyi mmonannyehn no ma kpo, eji mbing enye l'k'tan go Isreel.

⁷ L'fere jol re nne nehme seb re á baange nkala mmonannyehn, nnenkal noo bahke tahme song kpiri anebkul go eti mbu ji mfam, tongo bo re, <<Mmonannyehn nlum ewame ebten re á nehm soro asi a mbinga mmonannyehn go Isreel. Á nehm lim eltum nio ni nnara nne ka-m.>>

⁸ Owo anebkul mfam enye bahk-e lung fere bung a ne. Á l'fere soro asi yiimi re, <<N nehme seb re me m baang-e,>>

⁹ nkalebun noo bahke jene song kpiri mmonannyyehn nlum go esamahr anebkul mfam kpee, yehke nnenlum noo ekpade ekpaketa ajehng, fere so atel wohng-e go ege esamahr, kehm bungu re, <<Ejum ji a ji bo kpo lim nne no kil sebe re ebangenahb ji mmonannyyehn gbal.>>

¹⁰ Anebe Isreel bahke jo lung abangenahb ji nnenlum noo re, ebangenahb nne no bo yehk-e ekpaketa go akpade.

Atahm nyako

¹¹ Aneblum abal l'kehme abohng nok, nkala nne awohng ebo, l'ba re á ba tahre nlum ewe yehke go abo nya nne no kp-e dohko, nnenkal noo l'jabb-e go elfahn,

¹² ń bahke kimi nnenkal noo ebo, á ki-n fili ndon.

¹³ Kana jo bel ejum edumu nsol ebbal go egahne ebam, ji kp'lubu a ji kp'yaare.

¹⁴ Kana jo bel ejum nsol agaare ebbal go egahne etahk, ji kp'gbale a ji kp'seke.

¹⁵ ń bahke tiki bel nsol eldumu, nya li songo songo fere jol go nseenge, eji ń l'bel nlabe elkpin go ndi nyi Jehova Esowo ebahne kp-n kake.

¹⁶ Tibre Jehova Esowo ebahne, nne awohng awohng no kpo lim nsol nyia we kpehme kor, jol nne awohng awohng no kpo lim nsol enehm.

¹⁷ Buumen ji anebe Amalek lim-n no go mbang eji ń lohngo go Ijib abake.

¹⁸ Ngare nyi ń lahng no fere k'kooko, bo kpirin go mbang jo gboro ane kpee ba sa go njahm. Elfahle Esowo bo belem.

¹⁹ Ngare nyi Jehova Esowo ebahne ma-n ka erekekiv go abo anebekiv kpee ba lene no senng-n kak, go ndi nyi á kp-n kake re wahn ko ana ejum elehkelkv, m bahke yehke mbing nyi anebe Amalek go njini. Kana yinao!

26

Agbokombang akabe nti a Ejum ajehng go nsol ewubu

¹ <<Ngare nyi m ma yel go ndi nyi Jehova Esowo ebahne kp-n kake ana ejum elehkelkv, eji m ma ko, fere lene o,

² nong no nne ko agbokombang akabe nti nyandiki go nsol nkpakandi kpee nyi n fv go ndi nyio nyi Jehova Esowo ebahne kp-n kake, wahn kak go ejeere. Songen go edi ji Jehova Esowo ebahne bahke yehke re bo jo kak Mbing enye,

³ wo bung tong nlimajom no bahke kuumu ngare nyio re, <<N kp'bungu gbul gbul gbuul lela tong Jehova Esowo eba re, me m ba go ndi nyi Jehova tiri no, ka babnso ewahre ba nkul re á bahk-r kake.>>

⁴ Nlimanjom bahke taare ejeere jio go ega abo, song jehke go mbuksong egudu njom ji Jehova Esowo ebahne.

⁵ Owo a bahke bungu gbul gbul gbuul esamahr bi Jehova Esowo eba re, <<Nsoo ewame jolo nne Aram no jo jen yanng. Á tahme song jol go Ijib, a abon amohk ane, song lene o, kehm fere jol egburu ejahbe ji kpi eko, fere r'rur go nfange.

⁶ Wo anebe Ijib jo fil-r mband nyi kii nob, fere jo kak-r erem tib go atahntahn ntum nya bo jo kak-r.

⁷ Owo e kehm lingi tong Jehova Esowo bi babnsoo ewahre. Jehova kehm wuku aling enyahre, fere nyehn akanya enyahre, a erem bi e jo nyehn go elfili ni bo jo fil-r nyaame nyaame.

⁸ Jehova koo etahntahn ebo ebe yehk-r go Ijib, a ekv ebo ji á tanne no, a amenngo nsol, a nliingi, go akpokosi.

⁹ Á ko-r ba edi jia, fere ba ka-r ndi nyia nyi alahbbel, a akehng ekon, ma tv fad.

¹⁰ Anv Jehova me n ko agbokombang akab nti nya ndi nyia, nya a ma-m ka, ba a nya''. Bum ejeere jio go esamahr bi Jehova Esowo eba, wo fere gbo kohk, go ege esamahr.

¹¹ Wo, a ane ba lohng go et'tohngo ji Levi, go ajahmjahm nya lene go egahne ellong, m bahke geere kak anoobo nsol kpee nya Jehova Esowo ebahne ma-n ka, a ebangenahb eja.

¹² Ngare nyi m ma mal elyabe nsol nkpakandi enyahne, go elya ni limi nnya era, ni li elya ni ejum ajehng go nsol ewubu enyahne kpee, m bahke kake anebe Levi, ajahmjahm, a ane ba ki kpi babnde, akalebun, eji bo l'li nsol go mfam ajahbe enyahne kpee fere wohngo.

¹³ Owo m bahke bungu tong Jehova Esowo ebahne re, <<Me n yehke ekahmekahme ejum ji li ka Esowo go egame etahk. Me n ka anebe Levi, a ajahmjahm, a ane ba ki kpi babnde, go akalebun jang jang ana á ka elkahn. Jol n ka gbake feere go nkpe, tahm nkahn enya sa, jol n ka yini ejumjum.

¹⁴ N ka li ekahmekahme ejum ajehng ajehng ji li ka Esowo ngare nyi n noongo elkv, jol n yehkem ejum ajehng ajehng, ngare nyi n ki jol saang, jol

n rodem ajehng ajehng lim njom ka akvne. Me n kpunu Jehova Esowo ebame, me n lim ejum ajehng ajehng ji wo ka-m elkahn.

¹⁵ Sa go elbung go ega edi ellene ji li saang, wo seenge, fuulu Isreel ane eba, a ndi nyi a ma-r ka, ana a nyame no ko nwongo ka babnso ewahre ba nkul, a ndi nyi alahbbel a akehng ekon ma tv fad.>>

Toonen Nkahn Nyi Jehova

¹⁶ Jehova Esowo ebahne kp-n kake nkahn lela, re wahn toono ntibi nyia, a atahm. Jo kunen ekpu, wahn jo bum atahm nyaa, a ntim ntim enyahne, a atohko atohko enyahne.

¹⁷ Wahn ebbung gbul gbul gbuul lela re Jehova wo li Esowo ebahne, re m bahke jo jen a ne , m bahke jo bum ntibi enye, a nkahn go atahm enye, m bahke jo wuk-e.

¹⁸ Jehova ebbung gbul gbul gbuul lela re, wahn ane ebe ba, ba a ma-n bum ka elne, ana á nyame no, re wahn bahke jo bum nkahn enye kpee.

¹⁹ Yebbung gbul gbul gbuul re, á bahk-n mehle wahre, sehng ajahbe kpee nya á ma lim, bo bahke jo tehk-n, jo ka-e elgahm a ekpunu. Fvfo m bahke jolo ejahbe ji li saang ka Jehova Esowo ebahne, jang jang ana á nyame no.

27

Egudu Njom Go Ewong Ebal

¹ <<Mosis a anebkul ba Isreel kehm kake ane elkahn re, <<Jo bumen nkahn nyia kpee nyi n kp-n kake lela.

² Ngare nyi m̃ ma siiri Jodan song yel go ndi nyi Jehova Esowo ebahne kp-n kake, loon agburu atal, wahn fere kpee.

³ Nyonen alum kpee nya ntahm nyia, go atal nyao, ngare nyi m̃ ma siiri song yel go ndi nyi Jehova Esowo ebahne kp-n kake, ndi nyi alahbbel a akehng ekon ma tv fad, jang jang ana Jehova Esowo babnso ewahne nyame no tong-n.

⁴ Ñ l'siiri Jodan, loon atal nyaa ewong Ebal wahn kpee, ana n kp-n kake elkahn lela.

⁵ Limen egudu njom ji atal o ka Jehova Esowo ebahne. Kana ko ejum eltum ajehng ajehng ji bo limi go akuungu lim eltum o.

⁶ Limen egudu njom ji Jehova Esowo ebahne, go atal nya bo ki soongo na, wahn jo lim njom nyi eljahme fi o, ka Jehova Esowo ebahne.

⁷ Jo limen njom nyi ayare, nya elkoono o, wahn jo li fere jo geere go esamahr bi Jehova Esowo ebahne.

⁸ M̃ bahke nyono alum kpee nya ntahm nyia gbul gbul gbuul, go atal nyao nya m̃ ma lo.>>

Akuk nya Lohng go Ewong Ebal

⁹ Owo Mosis a abalimajom, bo ji li anebe Levi, kehm bungu tong anebe Isreel kpee re, <<Wahn anebe Isreel, rahken ewok, wahn wuungu atung! Anv wahn ebjol ane ba Jehova Esowo ebahne.

¹⁰ Jo kpunen Jehova Esowo ebahne, wahn fere jo toono nkahn a ntibi enye, nya n kp-n kake lela.>>

¹¹ Efung b'nehm o, Mosis kehm kake anebe Isreel elkahn re.

¹² Ngare nyi rí ma siiri Jodan, at'tohngo nyaa bahke yiimi go ewong ji Gerijim jo fuulu ane; Et'tohngo ji Simion, a ji Levi, a ji Juda, a ji Isaka, a ji Josef, go et'tohngo ji Benjamin.

¹³ At'tohngo nyaa bahke yiimi go ewong Ebal jo su akuk; Et'tohngo ji Ruben, a ji Gad , ji Asa, a ji Jebulon, a ji Dan go ji Naftali.

¹⁴ Anebe Levi ba bahke gboko mbang jo bung ka anebe Isreel kpee wahre wahre re,

¹⁵ <<Nkuk li ka nne no rahme elok elom ji li esabsab ejum ka Jehova, rod jehke go edi elbiiri, ji li eltum ni anebe agb'gbe.>> Owo ane kpee bahke faange re, <<Jol ano!>>

¹⁶ Nkuk li ka nne no kil jo kpunu nde ewe, afi nnyehn ewe. Ane kpee bahke bungu re, <<Jol ano!>>

¹⁷ Nkuk li ka nne no l'rennge eltal go nseenga ndi nyi nnebjing ewe. Owo ane kpee bahke bungu re, <<Jol ano!>>

¹⁸ Nkuk li ka nne no limi nwakamahr tan mbang. Ane kpee bahke bungu re, <<Jol ano!>>

¹⁹ Nkuk li ka nne no ki lam elam go nseenge, ka nne ajahmjahm, afi nne no nde ma kpo, afi akalebun. Owo ane kpee bahke bungu re, <<Jol ano!>>

²⁰ Nkuk li ka nne no noonga nkala nde, tibre á kpunem edilnong nde ewe. Owo ane kpee bahke bungu re, <<Jol ano!>>

²¹ Nkuk li ka nne no noonga nnyam anyehng anyehng. Owo ane kpee bahke bungu re, <<Jol ano!>>

²² Nkuk li ka nne no noonga mmonannnyehn no nkal, mmon no nkal no nde, afi mmon no nkal

no nnyehn. Owo ane kpee bahke bungu re, <<Jol ano!>>

²³ Nkuk li ka nne no noonga nnyehn nkal ewe. Owo ane kpee bahke bungu re, <<Jol ano!>>

²⁴ Nkuk li ka nne no weelee no wul nnebjing ebe. Owo ane kpee bahke bungu re, <<Jol ano!>>

²⁵ Nkuk li ka nne no ko ngu re a wul nnea mbol mbol. Owo ane kpee bahke bungu re, <<Jol ano!>>

²⁶ Nkuk li ka nne no kil jo yiimi go alum nya ntahm nyia, k'fere jo lim. Owo ane kpee bahke bungu re, <<Jol ano!>>

28

Elfuulu Ni Toono Ekpunu

¹ <<Ní l'jo kpunu Jehova Esowo ebahne ngare kpe kpe, fere jo kunu ekpu jo toono nkahn enye kpee nyi n kp-n kake lela, Jehova Esowo ebahne bahk-n mehlee wahre sehngé ajahbe kpee nya li go njini.

² Nfuulu nyia kpee bahke bake go egahne fere jo toon-n, ní l'jo kpunu Jehova Esowo ebahne:

³ Jehova bahk-n fuulu go mfam, fere fuul-n go egahne ebgbe.

⁴ Abon ebahne bahke bele elfuulu, a nsol mbah-
mandi enyahne, a atohko ndi enyahne, abon
efong ba nlong efong enyahne a abon ejoro ba
nlong ejoro enyahne.

⁵ Jehova bahke fuulu ajeere nkohl enyahne, a
agbojok abred enyahne.

⁶ Elfuulu bahke jolo anahne ní l'lohng, fere tob
jol anahne ní l'feere kehngé.

⁷ Jehova bahke limi re wahn jo ga anebekv ba bahke yiimi abohng anahne. Bo bahke lohngo ejang abehng ba yiimi abohng anahne, fere be yaame toono mbang na esehma.

⁸ Jehova bahke fuulu abuungu enyahne, a ejum ajehng ajehng ji n lake abo re wahn lim. Jehova Esowo ebahne bahk-n fuulu go ndi nyi á kp-n kake.

⁹ Jehova bahke limi re wahn jol afuulu fuulu ane ebe, ana á nyame no ko nwongo, n l'fere jo bum nkahn nyi Jehova Esowo ebahne, fere jo jen jo kpun-e.

¹⁰ Owo ajahbe njini kpee bahke nyehne re bo kpo lung-n kpiida mbing nyi Jehova, bo fere jo fahl-n.

¹¹ Jehova bahk-n kake afang gb'gbal. Á bahk-n kake abon gbalee, go atohkondi gb'gbal, fere tob ka-n nsol mbahmandi gb'gbal, go ndi nyi á tiri no tong babnso ewahne ba nkul re á bahk-n kake.

¹² Jehova bahke lennge elbung, etahk ekuuru nsol enye, tum elahb tv go egahna ndi ngare nyi nno, fere fuulu ntum abo enyahne kpee. M bahke jo bong ajahbe gbalee nsol, wo, wahn nehm jo bong goji nne awohng awohng ebo.

¹³ Jehova bahke limi re wahn jol esi, n nehm jo jol elsil. N l'jo wuungu atung go nkahn nyi Jehova Esowo ebahne, nya n kp-n tongo lela, fere jo kunu ekpu jo toono, n bahke tiki jo jol agbokombang, n nehm jol akahlenjahm.

¹⁴ Kana kane ellimi nkahn anyehng anyehng nyi n kp-n kake lela. Kana sennge bum go nkpe, jol go ejang ebobkal, afi go ejang eboblum. Kana

toono esowo abehng abehng behko, jol kana loko bo.

Akuk nya li ka ane ba ki kpi ekpunu

¹⁵ Limi limi kan, n tohko jo kpuu Jehova Esowo ebahne, fere jo kunu ekpu jo toono nkahn enye kpee, a ntibi nyi n kp-n kake lela, akuk nyaa kpee bahke gboko tub-n, fere ko-n elfono:

¹⁶ M bahke bele nkuk go mfam, fere bel nkuk go egahne ebge.

¹⁷ A bahke suku ajeere nkohl enyahne, a agbo-jok abred enyahne.

¹⁸ Jehova bahke suku abon abahne, a nsol mbahmandi enyahne, a abon efong ebahne, a abon ejoro ebahne go abon ebul baange.

¹⁹ Jehova bahk-n suku, n l'jo feere kehng, a bahk-n suku n l'lohng asongo.

²⁰ Jehova bahke tumu akuk tv-n, a ebilanghr, fere sare agan go ejum ajehng ajehng ji n l'lak abo enyahne re wahn lim, tete a rangng-n, n kpo tan tvtv. Jia bahke jolo ano tib go ab'bi nya m ma lim eji m me-e ten.

²¹ Jehova bahk-n tuubu ayam tete a rangng-n yehke go ndi nyi n kp'yele re wahn song ko.

²² Jehova bahk-n tuubu afubu ayam, arumbum, go afahl, a bahke tumu elum a efubfub elfeb re ba rangng mbahmandi enyahne. Mbaare nyi bake rangng nsol enyahne, bahke jolo anahne tete n kpo tan.

²³ Elbung go egahne esi bahke jolo ana abilikpi, eji elahb l'k'ma kpe na, ndi nyi n kun no jol ana ekuungu, ejumjum nehm ma kpe mahng o.

24 Jehova bahke limi re elahb ji bahke nake go egahne ejahbe fere siingi ebtohko a atong. Bahke jo na go elbung abake, tete n kpo tan.

25 Jehova bahke limi re anebekv ebahne jo gan go ebta. M bahke lohngo go ejang abehng re wahn ba nok a bo, m fere be yaame sehng mbang esehma. M bahke jolo emennge emennge ejum ka ajahbe kpee nya li go njini.

26 Akv enyahne bahke jolo nsol alehke ka nruk kpee nyi kpo fonngo go elbung, a enyam ekulegbe bi li go ndi, jol nnene nehm jol no bahke kame bo tv go.

27 Jehova bahk-n tuubu afahl nya jo yam anebe Ijib, atungu tungu, ngubjing bahk-n jolo akpakolo akpakolo, fere gbo akpake, jol n nehm bel enobayam.

28 Jehova bahk-n bumu esahl, fere wa-n amahr, fere kak-n ebilangahr go eltim.

29 Ngare efin, m bahke jo dam yanng e ana nwakamahr go ejanng. Ejum ajehng ajehng ji n limi no, nehm jo nob, efung abehng abehng, bo bahk-n jo nyede na tv, fere jo v nsol enyahne, jol nnene nehm jol no bahk-n tahre.

30 A bahke lame elbal re wo ko nnenkal, wo nne nondiki wo bahk-e fere bob, jo noongo a ne. A bahke sehke etahk jol a nehm lene. A bahke bahme egbe agreb, jol a nehm lub bom na elbongo akab enye.

31 Bo bahke wulu nlum a mfong enya ega esamahr, jol bo wa-a nehm ka re wo li. Bo bahk-a taare mbvankang enya go egban, jol bo nehm kpe feere a nyi. Bo bahke rodo ejoro eba, ka nnekv

ewa, jol nnene nehm tahre bo.

³² Bo bahke rodo abon eba ba nlum, a ba nkal, ka go njahm ejahbe nyehko. A bahke jo kpur bo go mbang efung efung tete a lahng, jol eko a nehm bel ji á bahke ma yiimi abohng.

³³ Ane ba a kii nyi bo bahke lehke nkpakandi enya a nsol abo ntum enya. Ejumjum a nehm bel, sehngem re bo bahk-a jo lim eblum, afung kpee nya elkpin ena.

³⁴ Nsol nyi m bahke jo nyehn go egahna amahr, bahk-n bumu esahl.

³⁵ Jehova bahk-n tuubu afahl nya kp'sahb y'yam go alahng, a akpade jol nehm kpo, bahk-n limi bomo go adabkpade tete rehng go egahne elka esi.

³⁶ Jehova bahk-n kame, a ntul no n kun-e re á jo fil-n, tv go ejahbe ji n kii nyi, jol babnso ewahne kii kahn. Owo m bahke jo loko asowo nyako, asowo nti a nya atal.

³⁷ M bahke jolo emenng ejum, a ejum enyok, a asol, ka ajahbe kpee nya Jehova bahk-n kame tv.

³⁸ M bahke jo bahm amohk nti gbalee go egbe, wo m bahke jo fv ntiil, tibre agohrobi bahke jo l'li.

³⁹ M bahke jo bahm ebgbe agreb, jol n nehm jo fohko akab enye, afi jo wo amahm, tibre aroongo bahke jo l'li.

⁴⁰ M bahke bele nrahna oliv go egahne ajahbe kpee, wo akehng oliv n nehm jo bel, tibre akab bahke jo kum anyod anyod.

⁴¹ M bahke bele abon ba nlum a ba nkal, wo bo nehm jo jol anahne, tibre bo bahke bobo bo ana

aju ebta.

⁴² Nkpa agohrobi bahke lehke nti enyahne kpee, a nsol mbahmandi enyahne.

⁴³ Anebe ajahmjahm ba lene go egahne ellong, bahke jo gbal go afang sehng-n, fere bel eko sehng-n. Wo wahn bahke sahb gb'gbo ekpak, jol eko n nehm bel.

⁴⁴ Bo bahk-n jo bong nsol, wo bo nehm jo bong egahne. Bo ba bahke jolo asi, wahn jol nsil.

⁴⁵ Akuk nyaa kpee bahke gboko tub-n. Bahk-n jo kam, fere kpir-n tete n kpo tan, tibre n kpunem Jehova Esowo ebahne, fere jo bum nkahn, a ntibi nyi á ka-n no.

⁴⁶ Akuk nyaa bahke jolo elliingi a nkpokosi ka-n, a abon ebahne go njinanjini.

⁴⁷ Tibre n lokem Jehova Esowo ebahne go eyebatahng a elgeere go ngare nyi n jolo go efel.

⁴⁸ Fvfo, go ngara njal a ekorlahb, ngare nyi n li ebunjuku a egburu ekpak, m bahke jo loko anebekv ba Jehova tumu re bo ba nok anahne. Á bahk-n kake eb'bini ekuungu go egahne amel tete á ranng-n.

⁴⁹ Jehova bahke koko ejahbe ji lohng go ejang njini behko, re bo ba nok anahne, ana ekpi ji kp'fooro na fooro abake, ejahbe ji n l'k'jo wuk ebliki ebo.

⁵⁰ Ane bao kp'menngge go esamahr, jol bo kpehme kpunu ek'kulu nne, jol mmonse kpehme fili bo ndon.

⁵¹ Bo bahke lehke abon atohkondi ebahne a nsol mbahmandi enyahne tete bo ranng-n. Bo nehm tahm erik nkohl, afi amahm mfemfe, afi akehng sa-n, jol abon efong ebahne afi ejoro, a

ebul, tete bo ranng-n.

⁵² Bo bahke bake ebta, ba senng-n kak, kohk-n tv go egahne ejahbe tete atahntahn awahre wahre akahme nya á si sennge mfam ejahbe, nya n kpo yehke ntir enyahne kunu gbo. Bo bahke ba sennge ajahbe kpee nya li ndi nyi Jehova Esowo ebahne kp-n kake.

⁵³ Tib go erem bi anebekv ebahne bahk-n kake ngare nyi bo bahke sennge mfam ejahbe kak, á bahke jo li abon ebahne. M bahke jo li agubjing nya abon ebahne, ba n lum a ba nkal ba Jehova Esowo ebahne ma-n ka.

⁵⁴ Jol nne no ga naange eljini go egahne ellong, no ejum kpo fil-e ndon, mmonannyehn ewe w-e nehm fili ndon, áfi nkal no kpo kor-e, áfi abon ebe ba kpeka li elkpin,

⁵⁵ á nehm ka nne awohng awohng ebo, nnyama ngubjing abon ebe, nyi á kp'lehke. Nnyam nyio nyi nyi bahke jolo ejum alehke kpee, ji ye kpi no, tib go erem bi anebekv bahk-n kake ngare nyi bo bahke ba sennge ajahbe kpee kak, kohk-n tv.

⁵⁶ Nnenkal no ga naange eljini kpee go egahne ellong, no ejum kpo fil-e ndon, ye ji l'k'ma kadde ekpade eje t'tahne go ndi, á bahke jo baare n lum we no kpo kor-e amahr, áfi mmon ewe no n lum, áfi no nkal,

⁵⁷ nkpahde ejel enye, a abon ba á jele no. tibre á tiri re á weelee wul bo li, tib go egburu erem bi anebekv kp-m kake eji bo ma sennge ejahbe kak fere kohk-n tv.

⁵⁸ N tohko kunu ekpu, bum alum ntahm nyia kpee, nya bo nyono go nwer nyia, k'fere jo kpunu mbing nyia nyi kpi ellub, fere m'menngé, mbing

a Jehova Esowo ebahne,

⁵⁹ Jehova bahk-n tubu amenнге ayam, a aban-genahb enyahne, atong tong nya bahke jo ko ngare, fere jo sahb yam-n yam, a ariidi ayam, nya l'k'jo mal.

⁶⁰ Á bahk-n tuubu ayame Ijib kpee, nya n jo fahl, ano wo bahk-n laake.

⁶¹ Jehova bahk-n tob tuubu nkohn ayam kpee nya bo ki nyon nwera ntahm nya a agburu atong tong tete n kpo tan.

⁶² Wahn ji ruru na, ana alonlo nya li go elbung, m bahke fere sa amohk ane abik abik, tibre n kpunem Jehova Esowo ebahne.

⁶³ Ana jo yebe Jehova atahng re á lim-n wahn jol efel, fere jo nyab go nrur, ano wo eltim bahke jo yebe re á ranng-n fere demm-n. Bo bahk-n melle ana arahn nti, yehke go ndi nyi n kp'yele re wahn song ko fere jol ny'nyahne.

⁶⁴ Owo Jehova bahk-n kame faade kak ajahbe kpee, bomо go ejang njini ajehng rehng ajehko. Owo m bahke jo kak asowo nyako, nya nti a nya atal nya wahn, afi babnso ewahne ki nyi.

⁶⁵ Go ellong ajahbe nyao, erekekv n nehm bel, jol n nehm bel edi erekekv ji m bahke kadde akpade. O wo Jehova bahk-n kake egbiingi eltim, m bahke jo seb re wahn nyehn ejum ji n kp'sebe, wo amahr enyahne nehm nyehn, fvfo ntim enyahne bahk-n woono.

⁶⁶ Eltim bahk-n jo kahd ngare anyehng anyehng, fere jol elfahle elfahle atv a njul, n nehm tiki jo kahn ana elkpin enahne li li.

⁶⁷ Ngare efungfu, m bahke jo bung re, "Li re

elgung eclub ba, elgung m bahke bungu re li re efungfu eclub se, tib go amenng nsol nya bahk-n ruru go nltim a nsol nyi amahr enyahne bahke jo nyehn.

⁶⁸ Jehova bahk-n tumu n feere go Ijib go asohkkahng, go eljen ni m bungu re, n nehm kpe tiki je. O wo m bahke jo seb re wahn gungu elnahne ana aju nya nlum a ba nkal, ka anebekv ebahne, wo nnene wahn nehm gunu.

29

Isreel kpe buumu nwongo

¹ Awo li alum go ntoora nti nya egbanngalung ji Jehova limi ka Mosis elkahn re á lim a anebe Isreel go ejahbe Moab, budu a egbanngalung ji á tohko lim a anebe Isreel go Horeb.

² Mosis kehm kuku anebe Isreel kpee, kehm tongo bo re,

<<Wahn ebnyehn go egahne amahr nsol kpee nyi Jehova limi Fero go Ijib, a atubesi abal-imeltum ebe kpee, a ndi enye kpee.

³ N nyehne go egahne amahr agburu ngaare, a agburu nliingi, a agburu akpokosi.

⁴ Wo ga, tete sik lela, Jehova wahn ka ka eltim ni ngbere, afi amahr nya kpo nyehn, jol atung nya elwuku.

⁵ Wo Jehova bungu re, <<Go nnya atahl abal nyi n rod-n sehng anahne go elka emahng, nsol ebjing enyahne alahb kpoom, jol akpaketa nya n kake no go akpade jakem kpee.

⁶ Ebred n̄ liim, amahm n̄ woom, afi nkang amahm. N limi jia, eji n̄ l'kahn re me wo li Jehova Esowo ebahne.>>

⁷ Eji n̄ rehngedi jia, Sihon ji jolo ntula Hesbon a Og ji jolo ntula Basan, bo lohngo ba re bo ba nok anahre, wo e g'ga bo go ebta.

⁸ E taare ndia bo, rod ka anebe et'tohngo ji anebe Ruben a ji Gad, go ejang et'tohngo ji Manase, ana ejum elehkelkv.

⁹ Kunen ekpu, wahn toono agbak nya nwongo nyia, eji l'nob anahne, go ejum ajehng ajehng ji n̄ limi no.

¹⁰ Wahn ane kpee n̄ yim go esamahr bi Jehova Esowo ebahne lela. Atubesi ebahne, atubesi aneblum, anebkul ebahne, a atubesi abalimeltum, go aneblum Isreel bako kpee,

¹¹ budu abon ebahne, a akal ebahne a ajahm jahm nya lene go egahne nsi erekek, bo ji kpo rak nkun, fere jo tuk alahb ka-n.

¹² N̄ yim ana, eji n̄ l'ko nwongo a Jehova Esowo ebahne, nwongo nyi Jehova yahke ko anahne lela, fere tir kak elliingi,

¹³ eji á l'taame lela re wahn ane ebe ba, eji ye l'jol Esowo ebahne ana á nyame no tong-n, fere tir tong babnso ewahne, Ebrahim, a Aesik go Jakob.

¹⁴ Wahn wahn sang Jehova kp'koko nwongo nyia a nahne, fere tir,

¹⁵ wahn ji yim a anahre lela, go esamahr bi Jehova Esowo ebahre, wo Jehova kp'tob ko a ane ba ki li a lela.

¹⁶ Wahnfono antahng kp'kahne ana e lene no go Ijib, fere kahn ana e sehng ajahbe nyako sa, ba rehng a.

17 Ñ nyehne asabsab alokelom go ebo ellong, a asowo nya bo ko nti lim, a nya bo ko atal lim, nya asilva, a nya agul.

18 Seben kahn re nnenlum limm afi nnenkal, esi ejahbe, afi et'tohngo go egahne ellong lela, no ma sennge fere yehke eltim ene goji Jehova Esowo ebahre re á jo song kak asowo nya ajahbe nyao. Seben kahn re, jol nlohk anyehng anyehng limm go egahne ellong nyi kpo kab alul lul afa ana nyaa.

19 Elkohn nne ana noo l'wuk alum nwongo nyaa, á l'kak ero jo biri elfuulu tv elne fere tir re, "M bahke jolo go edi elforo, jol afi n soro asi jo toono abang enyame", á bahke koko egburu elranng ba go ndi nyi li alahb alahb, a nyi li wumwum.

20 Jehova nehm tiki seb re á tahm ka bo. Erakatahng a elkahra akpuku ene bahke gboko tub bo. Akuk kpee nya bo nyono kak nwer nyia bahke gboko tub bo. Jehova bahke fvdv abing ebo yehke go njini.

21 Jehova bahke jake bo yehke go ellong at'tohngo nya Isreel kpee re bo nyehn ebi erem bio, ana nkuk anyehng anyehng nyi nwongo nyi bo nyono go Nwer nyia nyi Ntahm li no

22 Abon ebahne ba bo bahke jele bo, toon-n eying jehko, a ajahmjahm nya lohng go fee ba, bahke nyehne atongtong nya ma gbo tub ejahbe ejahne, a ayam nya Jehova ma tub bo.

23 Ndi kpee bahke ranng ana ndi akang a asolfo, ejumjum bo nehm ma bahm, ejumjum nehm ma mahng, jol ejumjum nehm ma gbal o. Bahke jolo ana bo ranng Sodom a Gomora,

Ad'ma abola Jeboyim, ajahbe nyao nya Jehova ranng-e no go ege egburu erakatahng.

²⁴ Ajahbe kpee bahke jo bahb re, <<Jenji wahnge Jehova ma lim ejum jia go ndi nyia?>> Jenji wahnge egburu erakatahng eje ma maange anae?

²⁵ Owo bo bahke faange re, <<Ebjol ano tibre ane baa senng-e njahm, ten nwongo nyi Jehova ji li Esowo bi babnde ebo, nyi á ko a bo eji á yehke bo go ndi nyi Ijib.

²⁶ Bo tahme fere song kehme asowo nyako kak, fere jo gong kak bo, asowo nya bo ki nyi, nya Jehova ki ka bo.

²⁷ Ano wo wahnge Jehova eltim kehm-e rake gbalee bada ndi nyia. Owo wahnge a kehm suku bo akuk kpee nya bo nyono go nwer nyia.

²⁸ Ana eltim maang-e no, a egburu erakatahng, Jehova melle bo ana arahnti go eboa ndi, fere song ro bo kak go ndi nyindiki, ana li no anv.

²⁹ Nsol nyi li mbehr mbehr, li ka Jehova Esowo ebahre, wo nsol nyio nyi bo ma lennge, li ka wahr a abon abon ebahre go njinanjini, eji e l'toono alum kpee nya ntahm nyia.

30

Ana Bahke Nobo Abo Ngare Nyi Bo Ma Feere Goji Jehova

¹ <<Ngare nyi nfuulu nyia, a akuk nyaa kpee, nya m ma lennge ka-n, l'gbo tub-n go edi ajehng ajehng ji Jehova ma-n kam kak ajahbe nyako, n l' buumu go egahna ntim.

² N l'feere goji Jehova a abon ebahne fere kpun-e a ntim a ntim enyahne, a atohko atohko enyahne jang jang ana n ka-n elkahn lela,

³ owo Jehova Esowo ebahne bahke feere efa ebahne ka-n*. M bahk-e fili ndon, á fere ku-n yehke go ajahbe nya á kam-n no kak, n fere egahna ndi.

⁴ Jol afi bo kam-n tv go ejahbe ji li go ejang njini ji ga lab, Jehova Esowo ebahne bahk-n kuku o, feere go egahna ndi.

⁵ Á bahke feere anahne ba go ndi nyi babnso ewahne, m bahke koko ndi nyio fere jol ny'nyahne. Á bahk-n limi n sahb gb'gbo afang, fere r'rur sehng babnso ewahne.

⁶ Jehova Esowo ebahne bahke limi ntim enyahne a ntim nyi abon ebahne bo jo wuk-e, eji ye, l'jo kor-n, a ntim a ntim enyahne kpee, a atohko atohko enyahne kpee, eji n l'kpin.

⁷ Jehova Esowo ebahne bahke rodo akuk nyao kpee kunu anebekv ebahne, bao ba kpo ko-n ekv, fere jo gbak-n.

⁸ M bahke kpe kehme Jehova kpunu, fere jo toono nkahn enye kpee nya n kp-n kake lela.

⁹ Owo Jehova Esowo ebahne bahke limi re wahn sahb gb'gbo afang go egahne abo ntum kpee, a abon bahne, a atohkondi enyahne, fvfo nkpakandi enyahne bahke gbale budu. Jehova eltim bahk-e kpe yebe bade anahne, a fere lim re wahn gbo afang, ana eltim yeb-e tob babnso ewahne,

* **30:3 30:3** tahre bo go eju ebta fere fuulu bo

¹⁰ ń l'fere jo wuk Jehova Esowo ebahne, fere jo bum nkahn enye, a ntibi nyi bo ma nyon go Nwer nyia nyi Atahm, fere feere goji Jehova Esowo ebahne, a ntim a ntim enyahne kpee.

Yehk-n elkpín afi elkv

¹¹ <<Elkahn ni n kp-n kake anv lela nehm ga riidi sehng-n, jol lim na fee ji ń l'k'ma rehng.

¹² Limm na go elbung, ji ń bahke bahbe re, <<Nne awoo bahke wahre tahm go elbung song ko, feere ba tiing-r eji e l'kpunu?

¹³ Jol lim na go egbuk aya jehko, ji ń bahke bahbe re, "Nne awoo bahke siiri agburu aya song ko ba tiing-r, eji e l'kpunu?

¹⁴ E'ee, ellum nio li-n kpidi kpidi. Wob-n go egahna nnyo a ntim enyahne, eji ń l'kpunu.

¹⁵ Nyehne! Lela me n rod elkpín a afang bum-n go egahne esamahr, fere tob bum-n elkv a elranng.

¹⁶ Anv lela, m ma-n ka elkahn re, Jehova Esowo ebahne jo kor-n. Jo jenen wahn jo kpun-e, fere jo bum nkahn enye, a ntibi enye, a atahm enye, ano wo ń bahke kpini fere nyab, fvfo Jehova Esowo ebahne bahk-n fuulu go ndi nyi ń kp'yele re wahn song ko jol ny'nyahne.

¹⁷ Wo ntim enyahne l'fere senng go, ń k'jo kpun-e, ń l'fere yehke ntir enyahne tv go re wahn jo gong kak asowo nyako, fere jo loko bo.

¹⁸ N kp'lennge tong-n lela re bo bahk-n lohko ranng. ń nehm ga kang go ndi nyi ń kp'siiri aya Jodan song yel re wahn ko.

¹⁹ Lela n kp'lungu elbung a ndi re yiim-m ntianse bade anahne, me n rod elkpín a elkv, go

elfuulu a nkuk bum-n go egahne esamahr. Anv yehken elkpín, eji wahn a abon ebahne n l'kpín.

²⁰ Nong Jehova Esowo ebahne jo kor-n, wahn jo wuungu atung go ellum ene, fere gbo-e ejahm t'tahne. Tibre Jehova wo li elkpín enahne. Á bahk-n kake aya gbalee, go ndi nyi á tiri no re á bahke kake babnso ewahne, Ebrahim, Aesik a Jakob.

31

Josua Koo Nji Nyi Mosis

¹ Owo Mosis kehm tahme song bung alum nyaa kpee tong anebe Isreel re,

² <<Anv me n kang nnya atahl arakera. Me wahn nehm ma kpe gbo bang asongo. Jehova mam tong re, 'Á nehm siiri aya ma Jodan.'

³ Yefono Jehova Esowo ebahne wo bahk-n gboko mbang song siiri aya mao. Á bahke song ranngé ajahbe nyao go egahne esamahr. N bahke song ko ndia bo, fere jol ny'nyahne. Josua bahke tob gbo-n mbang song siiri, ana Jehova bungu no.

⁴ Jehova bahke limi bo, ana á limi Sihon abola Og, atul ba anebe Amor, bo ji á ranngé bo a ajahbe ebo.

⁵ Jehova bahke yake bo kak-n go ebo. M bahke tiki lim bo nsol kpee ana m ma-n ka elkahn re wahn lim.

⁶ Belen atahne a ekakelltim. Kana fahl bo. Jol bo ki-n menngé, tibre Jehova Esowo ebahne kp'jene anahne. Á wahn nehm tiki yake, jol á wahn nehm ten.>>

⁷ Owo Mosis kehm tumu bo lung Josua, kehm-e tongo go ellong anebe Isreel kpee re, <<Bel atahne a ekakeltim. Tibre á bahke tiki rod ane baa tahm abo go ndi nyi Jehova tiri tong babnde ba nkul re, á bahke kake bo. Wo wo bahke tiki bak bo ndi nyio ana ejum elehkelkv ebo.

⁸ Yefono Jehova kp-n gboko mbang asongo. Á bahke jolo anahne; á wahn nehm tiki yake, jol á wahn nehm ten. Ka bel elfahle, jol eltim ki-a woono.

Atahm alungu

⁹ Mosis kehm nyono ntahm nyia, kehm faake ka anebe Levi ba li abalimajom, bo ji kpo sol elkohl egbanngalung ji Jehova, fvfo jolo ka anebkul ba Isreel kpee.

¹⁰ Owo Mosis kehm kake bo elkahn re, <<Eji nnya esehma anyehng anyehng ma biingi, go elya nio ni ane kpo yake abong ka, go ngare Elkak Abonkpatahk,

¹¹ ngare nyi anebe Isreel kpee ma ba yiimi go esamahr bi Jehova Esowo ebahne, gona edi jio ji á bahke yehke, a bahke lungu atahm nyaa eji bo l'wuk.

¹² Ku ane kpee bo ba kono asi, aneblum a anebkal, abonse, go ajahmjahm nya lene go egahna mfam ejahbe bo ane kpee, eji bo l'wuk fere kpili ana bo bahke jo fahl Jehova Esowo ebahne, fere kunu ekpu jo toono alum kpee nya ntahm nyia.

¹³ Abon ebo ba ki nyi ntahm nyia bahke wuku, eji bo l'kpili ana bo bahke jo fahl Jehova Esowo ebahne go ngare kpee nyi n lene go ndi nyio nyi n kp'siiri Jodan re wahn song ko.

Enyehnamahr bade Etahnsi ji Isreel

¹⁴ Owo Jehova kehm bungu tong Mosis re, <<Efung bi a bahke kpoko ebkabbe. Lung Josua, wahn ba go ebkpatahk bi elwane, edi ji m bahke fake nnyo. Mosis a Josua kehm song yiimi go Mbuksong Ebkpatahk bi Elwane.

¹⁵ Owo Jehova kehm bake go ebkpatahk. Á ba go ekparesemsem. Ano wo ekparesemsem yiimi no, go ero mbutahk mi ebkpatahk bio.

¹⁶ Jehova kehm bungu tong Mosis re, <<A bahke kpoko, tahm goji babnso ba nkul. Ane baa bahke gulu as'sa jen, bo bahke jo toono ajen asowo nya ajahbe nya bo kp'yele. Bo bahk-m tene, fere range nwongo nyi n ko a bo.

¹⁷ Efung bio, m bahke rake eltim a bo, fere ten bo. M bahke fake esamahr ebame go nkpe, bo bahke ranng bo. Agburu atongtong gbalee a ajahkjahk nsol bahke gboko tub bo. Fvfo efung bio bo bahke jo bahb re, <<Anv, eji atongtong ana nyaa kp'gboko tub-r, jia nehme tib re Esowo limm anahra?

¹⁸ M bahke yehke esamahr ebame go ebo ejang, tib go ab'bi ebo kpee nya bo kp'limi eji bo ma senng kp'fere toono asowo nyako.

¹⁹ Anv nyon ese jia, wo fere tib anebe Isreel, bo jo yim. Eji ese j'nehm l'yiim-m ntianse bada bo.

²⁰ Ngare nyi n ma koko bo ba yel go ndi nyi alahbbel a akehng ekon kp'fabe, nyi n nyame no, fere tir tong babnde ebo, ngare nyi bo ma li wohngo, fere jo gbal, bo bahke senng, fere jo kak asowo nyako. Bo bahk-m tene fere range nwongo enyame.

²¹ Ngare nyi agburu atongtong a ajahkjahk nsol

ma lim bo, ese jia bahke yiimi ntianse bada bo, tibre at'tohngo ebo nehm yini. N kp'kahne ji li go ebo eltim re bo lim, jol tvtv re me n kehm koko bo ba ndi nyi n nyame tong bo fere tir.

²² Owo Mosis kehm nyono ese jia efung bio fere tib anebe Isreel.

²³ Jehova kehm kake Josua mmona Nun elkahn nia re, <<Bel atahne, wo bel ekakeltim. Tibre a bahke koko anebe Isreel ba go ndi nyi n nyame no, fere tir re m bahke kake bo. Mefono antahng m bahke jolo a na.

²⁴ Eji Mosis ma nyon alum atahm nyaa kpee kak go nwer mal, bomomo mbomo tete rehng es'kohlo,

²⁵ á kehm kake anebe et'tohngo ji Levi ba kpo sol elkohl atahm ni nwongo Jehova elkahn nia re,

²⁶ <<Koon Nwer Atahm nyia, wahn bum go nkpe elkohl ni Nwongo nyi Jehova Esowo ebahne. O, wo bahke jolo ntianse bada nahne.

²⁷ Tibre n kp'kahne re n li atahnsi ane ba kil jo wuk nyi etung. L'jol re wahn ebtahne asi a Jehova ngare nyi me n kpeka li anahne go elkpín, l'lim rejen n l'gohro kpo tahm.>>

²⁸ Kuun anebkul ba at'tohngo enyahne kpee, a atubesi abalimeltum, ba go egame, eji n l'bung alum nyaa kak go ebo atung.

²⁹ Tibre n kp'kahne re n l'kpo tahm, m bahke ranngé abang enyahne, fere sennge njahm go mbang nyi n ka-n elkahn. Go afung nya kp'bake, egburu ntong bahk-n limi, tibre m bahke jo lim ab'bi go esamahr bi Jehova. M bahke jo ka-e erakeltim tib go nsol nyi abo enyahne ma lim.

Ese Ji Mosis

³⁰ Mosis kehm bungu alum ese jia tong nkon nyi anebe Isreel kpee, bomo go mbomo tete rehng go es'kohlo.

32

¹ <<Wuungen atung wahn elbung, n yahke bung, wuken wahn, ndi, alum nnyo emame.

² Nong eltibi ename jo na ana elahb, fvfo alum nnyo enyame ana ebohng, ana mmolahb no nyeme wohngo ajele, ana egburu elahb kp'nake wohngo abon arahn nti.

³ M bahke tooro bada mbing nyi Jehova. Kaan Esowo ebahre agburu agbal.

⁴ Ye wo li Ekpartal. Ntum enye li go nseenga nseenge, abang enye kpee li go etingitingi. Esowo bi kpi ekakesehk, ye ji kil jo lim ebi, á li go nseenga nseenge a li go etingitingi.

⁵ Bobranng, fvfo bo kpeem li abon ebe; Esono limm a bo, fvfo bo li eying ji li galle galle galle.

⁶ Wahn agboolo ane ba ki kpi ngbere, anv mbang nyi a, nyi n kp'sebe re wahn feere kpi Jehovaha? Ye sang li Nso ewahna, ji gun-n noa, ye ji lim-n no, fere lim-n re wahn jol ejahba?

⁷ Buumen afung nya mahne mahne. Tiren bada aying nya jolo mahne mahne. Bahb nso ewa, á bahk-a tongo; bahb anebkul ebahne, bo bahke lennge tong-n.

⁸ Ngare nyi Esowo bi Gbale sehng jo bak ajahbe nsol elehkelkv ebo, ngare nyi á yabe ane, á jo kake nseenga ndi ka ane, ana nfange nyi abon ba Isreel jolo no, baben anebkul bo bahke lennge tongen

⁹ Tibre ane ebe ba li ejang mbake nyi Jehova. Jakob wo jolo ejum elehkelkv ji Jehova.

¹⁰ Á ting-e go emahng ji ajele ki li, go ndi nyi li nehme nehme, ndia mbol mbol.

Á konng-e ana ekum, fere kpur-e, Jehova jo baab-e ana mon nehm nehm elmahr ene,

¹¹ ana ekpi ji kp'tibi abon ebe ana bo bahke jo fonngo, fere jo babbe senng-e abon ebe kak. Ye ji kp'solo bo ege akpungkpung re bo k'gbo, fere jo fili bo go ege anyange.

¹² Jehova antahng wo jo tv-e. Jol njen esowo jolem a Jekob.

¹³ Á lim-e re á jo fonngo go awahre wahre adi nya ndi, fere jo ko akab nti nya egbe jo le-e. Á ka-e elfo nio ni akehng ekon ma akpartal, a akehng ma lohng ekpartal ji ma bahng-e,

¹⁴ Á ka-e alahbbel efong ma ma kang, a alahbbel nfenfe ma ejoro a ebul; Á le-e a abon ejoro a ebul; a ekom bi nno a nno bi Basan, a amohk awid nya ga nob, a woo amahme greb ma jo tub nfahl, ma bili ana alung.

¹⁵ Anebe Jehova ba kp'jene go nseenge kehm gboko afang fere jok. Eji bo wohngo no, bo kehm lubu go ngubjing fere jol yangg. Bo tahme Esowo bi lim-e bo sa, fere ten Ekpartal ji li nt'tahra abo.

¹⁶ Bo ko ajen asowo ebo jo lim-e re á jo kpu elkahre, fere jo ko asabsab alokelom ebo jo ka-e erakatahng.

¹⁷ Bo jo fuulu ajom ka asowo, bi ki li Esowo, asowo nya bo ki nyi, asowo nya kpehna lohngo ba, asowo nya babnso ewahne ki jo fahl.

¹⁸ N tahme Ekpartal sa, ye ji jolo nso ewahne, n yini Esowo bi jel-n no.

¹⁹ Jehova nyehne kan ano, á kehm tene bo, tibre abon ebe ba nlum, a ba nkal ka-e erakatahng.

²⁰ Á kehm bungu re, <<M bahke behre bo esamahr ebame, nyehn ana es'kohro ebo bahke jolo. Tibre bo li eying ji kp'tahne asi, bo li ebon ba ki kpi ekakesehk.

²¹ Bo ko nsol nyi ki li esowo jo lim-m re me n jo kpu elkahre, fere ko alokelom ebo jo ka-m arakatahng. M bahke koko ane ba ki li ejumjum lim, re bo bel eteelala. M bahke koko ejahbe ji ki kpi ngbere, ka bo erakatahng.

²² Tibre erakatahng ejame bahke kimi ellulu, agun nyao bahke lulu rehng go nnahbandi nyi ejahbe akvnne. Bahke lulu ndi a akab enye, fere lul abangenahb akahme nya awong.

²³ <<M bahke kunu bo agburu atongtong go esi, fere ta mban enyame kpee tv bo.

²⁴ M bahke tumu egburu njal tv bo, m bahke tumu abi ayam tv bo a ayam elkv; M bahke tumu nlong ab'bi enyam a enyo bi kpi afa bi kpo tohng ndi.

²⁵ Ekahngkahng bahke wulu abon ebo go afak mbang, bo bahke jolo go egburu elfahle go ebo a ntahk. Ajangkun a agbahme bahke kpoko tan, ano wo abon mbili a ak'kulu ane bahke tob kpo.

²⁶ M bungu re, m bahke kame bo faade fere fvvdv mbinga bo go ellong ane,

²⁷ wo gana n fahle enyok bi anebekv, eji anebekv l'k'kahn bung re, abo enyahre nya ma-r ka esehnge ebta. Jehova sang ma lim nsol nyia kpee.' "

²⁸ Bo li ejahbe ji ki kpi ekahnafem, jol ngbere

bo kpimm.

²⁹ Jol-m koro re bo jol bange, fere bel ngbere a ekahnafem, bade ana es'kohlo ebo bahke jolo!

³⁰ Anv, bahke limi renan, nne awohng kehm ma kam ane atahltahl nkpel ebal atahl awubu, afi ane abal fere kam ane atahltahl nkpel ewubu, tohko jol re Ekpartal ji ma gungu bo. Afi Jehova wo ma yake bo?

³¹ Tibre ekpartal ebo limm ana Ekpartal j'jahre. Bofono anebekv ebahre kp'taame ano.

³² Agreb ebo lohng go elrahn agreb ni Sodom, tob lohng go egbe ji Gomora. Akab egreb ebo li afa afa, atasok ebo kp'lulu.

³³ Amahm ebo, afa nya nnyo nya, afa nya ebgbodo, nya kpo wul.

³⁴ <<Anv, me sang kuuru nsol nyia buma, fere behr go edi nsol akuuru ejama?

³⁵ Me wo li mb'bongo, m bahke bongo. Ngare l'biingi, bo bahke roongo go akpade, efung ntong ebo ebkabbe, elranngge kp'bake ka bo ana nfehre alahb.>>

³⁶ Jehova bahke foro ane ebe yake, á bahke beke alokeltum ebe ndon, á l'si nyehn re eko ebtan bo, fere nyehn re nnene beem for jolo nju afi nne no ma for.

³⁷ Á bahke bahbe re, <<Anv asowo ebo nya na? Akpartal nya bo jo be biiri nya na?

³⁸ asowo nyao nya jo li afom enyam nya ajomjom ebo, fere jo wo amahm ma ayare amahm ebo. Nong bo mehl yiimi tob-n, nong bo ka-n edilkang.

³⁹ Nyehnen anv, me wo li Esowo! esowo bindiki go kpeem li, buda name. Me n kpo wul, fere ka

elkpin, me n kpo yehke nne alok, fere lim kpo. Nnene limm no bahke ma tahre nne yehke go egame ebo.

⁴⁰ Me n tab abo enyame ton go elbung, fere tir t'tahne re, etingitingi ana me n li no go njinanjini,

⁴¹ n l'si b'bange nnyane nyane ekahngkahng ebame, fere rod fili re me n lam elam, m bahke bongo anebe ejahng ebame, m bahke kpiki ane ba n kpo sab bo.

⁴² M bahke limi re atake mban enyame leele alung alung, wo ekahngkahng ebame bahke lehke agubjing ebo, fere wo alung ane ba bo ma wul, a ane ba bo ma bob go ebta, bahke tob li asi nya atubesi anebekv.

⁴³ Ajahbe Wahn, geeren a ane ba Jehova, tibre á bahke bongo ane, tib go alung ma alokeltum ebe. Á bahke bongo anebekv ebe, fere gongo ndi enye a ane ebe.

⁴⁴ Owo Mosis kehm bake, a Josua ji mmona Nun, kehm ba bung alum ese nyaa kpee tong ane.

⁴⁵ Eji Mosis ma bung alum ese nyaa ka anebe Isreel kpee,

⁴⁶ Á tongo bo re, "Roden alum nyaa kpee nya m ma lennge t'tahne tong-n lela kak go egahna ntim, eji n'ka abon ebahne elkahn, re bo jo kunu ekpu, jo kpuu alum atahm nyaa kpee.

⁴⁷ Alum nyaa, alum mbol mbol sang ka wahn, nya nya li elkpin enahne, nya nya m bahke koko lim afung elkpin enyahne lab, go ndi nyi n'kp'siiri Jodan re wahn song ko fere jol ny'nyahne.

Elkv ni Mosis go ewong ji Nebo

⁴⁸ Efung b'nehm o, Jehova kehm bungu tong Mosis re,

⁴⁹ <<Wahr song, go elkudu ni Abarim, wo song go ero ewong ji Nebo ji li go Moab, go egbuk Jeriko jehko, wo seenge nyehn ndia Kenan, ndi nyio nyi n kp'kake anebe Isreel ana ejum elehkelkv ebo.

⁵⁰ Go ewong jio ji a bahke wahre, o wo a bahke kpoko tahm eji ane eba, ana Eron mmonanne kpo no go ewong ji Hor. Tahm goji ane ebe

⁵¹ Jia li ano, tib go nsodo nyi n sood-m no, go elkab ni anebe Isreel, go alahb ma Meriba ji li go Kadesi, go emahng ji Jin, m m-e kpunem ana n li saang go ellong anebe Isreel.

⁵² Fvfo, a bahke sake nyehn ndi nyio go fee, wofono nehm yel go ndi nyio nyi n kp'kake anebe Isreel.>>

33

Mosis fuulu At'tohngo Nya Isreel

¹ Elfuulu ni a, ni Mosis nne Esowo biri tv anebe Isreel kehm kpoko.

² Á bungu re,

Jehova lohngo go ewong Sinayi ba, kehm sake go Siya ya ellenge tub bo. Ano wo á ya no go ewong ji Paran abake. Jehova lohngo go ejang eboblum mfam ba, go ege egbunggbung ewong, a ellong enjel atahl aku akuu enye ba jolo a ne, a agun nya jo lul go ejang eboblum ebe.

³ Bo kp'toono ariidi akpade enya. Etingitingi ji re wo wo ane kor-a no, abarebare ane kpee, wob-a go abo. Go ega akpade wo bo kpee kpo gong go ndi, fere ko elle go ega,

⁴ Nyia nyi li ntahm nyi Mosis ka-r no, nyi sahb l'i ejum ekpunu ji et'tohngo ji Jakob ma bel.

⁵ Á jolo ntul no anebe Isreel, ngare nyi atubesi ane ba kono edi ajehng, a at'tohngo nya Isreel.

⁶ <<Nong Ruben lub kpin na, á k'kpo, jol ane ebe k'jol ntiil.>>

⁷ Ejum ji a ji á bungu no bada Juda; Jehova wuk eling bi Juda; wo ko-e ba goji ane ebe. Juda kp'koko abo enye antahng jo nok ka elne. Jehova tob-e nok a anebe ejahng ebe!

⁸ Bada et'tohngo ji Levi, á bungu re, <<Nsol elfaange atubu enya, nya bo kpo lung re Tumim abola Urim li ka nkakesehka nlokeltum ewa. A wuung-e go Massa; fere nok a ne go nkpe alahb ma Meriba.

⁹ A bungu bade nde a nnyehn re, <Bo me-e nehme lub.> Á liingem abonanyehn ba nlum jol abon ebe á kahnem bo. Wo á kpo baabe alum enya, fere jo kunu amahr go nwongo enya.

¹⁰ Bo kpo tib Jakob ajehke enya, fere tib Isreel atahm enya. Bo kpo lim ajom nya insen go ega esamahr, fere lim njom nyi bo kpo jahm fi kpee go ega egudu njom.

¹¹ Jehova lub fuulu agb'gbe enye kpee. Nong eltum abo enye jo kor-a. Rum ane ba kp'mehle abohng a ne tub ndi. Raade anebekv ebe bo k'kpe mehl abohng.

¹² Bada et'tohngo ji Benjamin, á bungu re, <<Nong akor-m ji Jehova bel erekekv ji lohng go elbaabe ni Jehova. Tibre á kpo konng-e ekum efung kpe kpe. Nong nne noo no kpo kor Jehova kuumu soom, go akpakebahk nya Jehova.

13 Bada et'tohngo ji Josef, á bungu re, <<Nong Jehova ko ebohng bi nno a nno bi kpo na elbung fuulu ndi abo, a alahb ma wob go nla ndi;

14 Nong ndia bo bel elfuulu ni akab nti nya njul ma lim ma bil, fvfo bahke bele akab nti nya nno nnyahng amehng amehng;

15 Nong nti nyi li agburu awong ebo nya mahne mahne nya bo yehke no tokko akab, a nlak nyio nyi awong nya li njinanjini;

16 Nong anoobo nsol rur eboa ndi, elfuulu ni nnoobo nyi Jehova, ye ji bungu alum go ekulegbe ji jo lul agun. Nong nsol nyia kpee gbo kuumu et'tohngo ji Josef. Tibre á jolo ntubesi, go ellong abonanyehn.

17 Go atahne, á li ana ngbokambanga mmona mfong no nlum. Á kpi atang nya mfong nkul. Nyanya á bahke koko jamme ajahbe, afi fere jolo go ejang njini jehko. Ano wo ane atahltahl nkpel ewubu ba Efriim li no, ano wo ane atahla nku aku ba Manase li no.

18 Bada et'tohngo ji Jebulon, a ji Isaka á bungu re, <<Jebulon, jo geeren go egahne ellohngo ni n kp'lohngo. Fvfo nong et'tohngo ji Isaka tob geere go ege abonkpatahk.

19 Bo bahke jo ku ane ba at'tohngo nyako tahm go awong, wo owo bo bahke song lim ajomjom nya atingi ane; Bo bahke koko anobo nobo nsol go agburu [aya jo le elbo]nya ma, jo le elbo, a atingi nsol afang nya bo behre go erikendi.>>

20 Bada et'tohngo ji Gad, á bungu re, <<Eltehke ELFUULU] jol ka Jehova, ye ji bahke limi re ndi nyi Gad nyanye, Gad lene o ana Egabe, ji kp'jaake

abo afi esi ji nnyam anyehng anyehng nyi jene kabb-e.

²¹ Ka anebe Isreel, á yehke edi ndi ji ga nob ka anebe Isreel. Bo bum-e erohko ndi ji li ka ntubesi. Eji atubesi ane wane no, á limi nnooba ntoobo nyi Jehova, a elam ji Jehova toobo no bada anebe Isreel.>>

²² Bada et'tohngo Dan, á bungu re, <<Dan mmon egabe wo, no kp'yehbe lohng go Basan.

²³ Bade et'tohngo Naftali, á bungu re, <<Nnoobo nyi Jehova kp'gbale asongo asongo ka Naftali. Jehova me-e fuulu gbalee. Ye bahke lehke elkv go ejang eboblum mfam, tete rehng go eto Galili.

²⁴ Bada et'tohngo ji Aser, á bungu re, <<Aser wo bo ga-e fuulu, go abon ba nlum. Nong abonanyehn jo lim-e nnoobo, á fere ru akpade enye go akehng.

²⁵ Fvfo abil eti mbu nya bahke jolo akuungu, a abil ekpi, fvfo atahne enya bahke kange ana afung kpee nya elkpin ena.

²⁶ Nnene limm no li ana Esowo bi Isreel. Ye ji kun go elbung re á tob-n, fvfo go akparesemsem go ege atahne.

²⁷ Esowo bi li go njinanjini, ye wo li edi elbiiri eja. Abo enye nya kpa-a fili go njinanjini. Á bahke kame anebekv eba, yehke go ega esamahr, fere bung re, <<Ranngen bo.>>

²⁸ Ano wo anebe Isreel bahke jolo go elforo; Et'tohngo ji Jakob bahke jolo go elforo go ndi nyi nkohl a amahm mfemfe, edi ji elbung bahke jo na ebohng.

²⁹ Elfuulu li ka anebe Isreel! Nne awo li ana wo, ane bao ba Jehova ma tahre boa? Ye wo li ekum a ekakebo eja, go ekahngkahng eba bi kpi ellub. Anebekv eba bahke jo kahn gub gub gub ega esamahr. A bahke jo jade bo go akpade.

34

Elkv ni Mosis

¹ Owo Mosis kehm mehle edi ebalebale ji Moab, song wahr ewong ji Nebo, song rehng go ero ewong jio ji Pisiga ji jolo songo songo wane Jeriko. O edi jio wo Jehova sa tib-e ndi nyio kpee, bomo go Giled, rehng go Dan,

² ndi nyi Naftali kpee, a ejang mbakandi nyi Efriim a Manase a ndi Juda kpee tete rehng go agburu aya ma nlen ma bo kpo lung re Meditere-nia.

³ Tob rehng go Emahng ji ejang ebobkal a erohko ndi jio kpee, ji bomo go edamme ji Jeriko ji li ejahbe mbohng asongo tete rehng go Joar.

⁴ Owo Jehova kehm bungu tong-e re, <<Ndi nyi a, nyi n nyame no ko nwongo a Ebrahim, Aesik abola Jakob re, <M bahke kake ebangenahb ejahne.> M ma-a yake re wo ko amahr amahr nyehn, jol wo á nehm siiri song yel o.

⁵ Mosis nlokeltuma Jehova kpo o Moab, ana Jehova bungu no.

⁶ Jehova kpa-e kak go edamme ji li songo songo wane Beti Peor go Moab. Tete sik lela, jol nnene nehme kahn edi ji elahm ebe li no.

⁷ Mosis kange nnya atahl arakera kehm kpoko. Jol amahr enye bammem, jol á kohkem go ngub-jing.

⁸ Anebe Isreel noongo elkv Mosis gona edi ebalebal ji Moab eltahl a nfung na ewubu, tete ngare eling a elkv anoongo nyio sehng.

⁹ Etohko ji elkahne jolo a Josua ji mmon no Nun, tibre Mosis kun-e kunu abo enye. Anebe Isreel jo wuung-e wuungu atung, fere jo lim ji Jehova ka Mosis elkahn.

¹⁰ Bomo ngare nyio go Isreel, nnyehnamahr awohng awohng ka kpe jol ana Mosis, ye ji Jehova jo bung a ne gbul gbul gbuul.

¹¹ Ye ji limi akpokosi nyaa kpee, a nliingi nyi Jehova tum-e re á lim go Ijib, nya á limi tib Fero a atubesi ntum ebe kpee, go ndi nyi Ijib kpee.

¹² Tibre nnene limm, no ma t'tib egburu eko jio, fere lim amennge mennge nsol nya Mosis limi no, go esamahr bi anebe Isreel kpee.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4